

LAIP STORI NA OL PASIN BILONG

SANTU
Josep



FR. TOMÁS RAVAIOLI, IVE

FR TOMÁS RAVAIOLI, IVE

LAIP STORI NA OL PASIN BILONG

SANTU

Josep

Imprimatur: ✠ Francis Meli
Bisop bilong Vanimō

© IVE Fathers in Papua New Guinea
ive.png@gmail.com

*Dispela buk i kamap
olsem «**tok tenkyu**»
i go long santu Josep.*

INSAIT

Tok i go pas.....	1
Laip stori bilong santu Josep	3
1 - Lain tumbuna na ples bilong santu Josep	5
2 - Santu Josep i maritim santu Maria.....	9
3 - Santu Josep i poromanim santu Maria long go visitim santu Elisabet	15
4 - Santu Josep na santu Maria i go long Betlehem	19
5 - Santu Maria i karim bebi Jisas	25
6 - Santu Josep i givim nem long bebi Jisas.....	31
7 - Santu Josep na santu Maria i kisim pikinini Jisas i go long Tempel.....	35
8 - Santu Josep i kisim santu Maria na bebi Jisas na i ranawe i go long kantri Isip	41
9 - Holi Famili i lusim kantri Isip na i go bek long Nasaret	45
10 - Pikinini Jisas i lus long Tempel	49
11 - Indai bilong santu Josep	53
12 - Santu Josep em i bikpela santu tru.....	61
13 - Santu Josep i winim ol santu bilong heven	69
14 - Santu Josep, man bilong bilip.....	75
15 - Santu Josep, man bilong hop.....	85
16 - Santu Josep, man bilong laikim pasin	91
17 - Santu Josep, man bilong daunpasin	97
18 - Santu Josep, man bilong harim tok bilong God.....	105

19 - Santu Josep, man bilong bihainim laik bilong God	111
20 - Santu Josep, man bilong laikim ol arapela manmeri	117
21 - Santu Josep, man bilong klinpela pasin.....	123
22 - Santu Josep i stap virgo oltaim.....	129
23 - Santu Josep, man bilong prea	133
24 - Santu Josep, man bilong trupela devosen.....	139
25 - Santu Josep, man bilong strong	145
26 - Santu Josep, man bilong peisens	151
27 - Santu Josep, man bilong wok	159
28 - Santu Josep, man i no gat planti samting.....	163
29 - Santu Josep, was santu bilong Katolik Sios	171
30 - Santu Josep, was santu bilong ol manmeri i laik i dai	177
31 - Santu Josep, was santu bilong ol papa.....	189
Ol prea na litani bilong santu Josep	197
Prea bilong putim yumi yet	
aninit long lukaut bilong santu Josep	199
Prea bilong askim ol samting long santu Josep	200
Prea long santu Josep Pop santu Pius namba 10 i bin mekim	201
Prea long santu Josep Pop Lio namba 13 i bin mekim	203
Prea bilong askim santu Josep long dai	
wantaim grasia bilong God	205
Prea bilong askim santu Josep	
long helpim ol manmeri i laik i dai	206
Ol litani bilong santu Josep 1	207
Ol litani bilong santu Josep 2.....	210
Ol litani bilong santu Josep santu Jon Eudes i bin mekim	213
Devosen bilong 30-pela de i go long santu Josep.....	216
Ol 7-pela sori na amamas bilong santu Josep	223

TOK I GO PAS

Dispela buk i kamap olsem tok tenkyu i go long santu Josep, long wanem oltaim santu Josep i save helpim yumi. Oltaim dispela santu em i redi long harim ol singaut bilong yumi, na em i amamas long yumi i singaut long em long taim yumi sot long ol samting.

Santu Tomas bilong Akwainas em i nambawan Tisa na saveman bilong Sios. Na em yet i tok: «God yet i bin makim ol santu bilong helpim mipela, ol manmeri i stap yet long graun. Wan wan santu i gat pawa bilong em yet bilong helpim mipela long wan wan hevi na wari bilong yumi. Na God i makim sampela ol santu bilong helpim mipela long mekim sampela wok, na em i makim arapela santu bilong halivim mipela long arapela samting, na em i makim arapela santu bilong helpim mipela long ol arapela samting yumi sot long em. **Tasol God i givim strong na pawa long santu Josep bai em i ken helpim mipela long olgeta samting mipela i sot long em,** olsem na strong na pawa

bilang santu Josep i winim tru strong na pawa bilang ol arapela santu bilang heven».

Insait long dispela buk yumi bai i painim laip stori bilang santu Josep wantaim ol gutpela pasin em i bin mekim. Na tu yumi bai i painim ol prea bilang em, bai yumi ken beten long em na askim em long helpim yumi. Yumi bin brukim ol meditesen long 31 sapta, bai yumi ken yusim wan wan meditesen long wan wan de bilang mun Mas, long wanem mun Mas em i mun bilang santu Josep.

Yumi askim God long helpim yumi long bihainim oltaim ol gutpela eksampel na pasin bilang santu Josep. Na yumi askim santu Maria, em meri bilang santu Josep, long helpim yumi long laikim na trastim santu Josep moa moa yet.

LAIP STORI BILONG SANTU JOSEP

Nupela Testamen i no toktok planti long santu Maria. I no gat planti stori bilong em. Tasol maski Nupela Testamen i no toktok planti, ol liklik hap tok i stap long em, i gat bikpela mining na i skulim yumi long planti samting long sait bilong santu Maria. Yumi save olsem em i kisim bel long Holi Spirit na em i kamap Mama bilong God. Na dispela nem «Mama bilong God» i bikpela tru na i winim tru ol arapela nem bilong dispela graun. **Tasol long sait bilong santu Josep, Nupela Testamen i toktok liklik tru**, na em i hat tru long painim planti informesen long laip stori bilong em.

Tasol pastaim long yumi go insait long laip stori bilong em, yumi mas save olsem long bipo bipo tru i kam inap nau Mama Sios na ol santu i bin soim bikpela laik na ona long santu Josep,

na oltaim ol i bin beten long em. Maski yumi no save planti samting long laip bilong em, dispela tupela nem bilong «**Man bilong Maria**» na «**Papa bilong Jisas**» i gat bikpela mining tru na i givim bikpela namba na ona na glori long santu Josep. Dispela tupela nem i mekim santu Josep i winim tru ol santu na ol ensel. Dispela tupela nem i mekim santu Josep i stap antap tru long heven. Dispela tupela nem i givim strong long santu Josep bilong helpim yumi long olgeta wari na hevi. **Long wanem dispela tupela nem i min olsem God yet i bin makim santu Josep bilong lukautim Jisas na mama bilong em yet.**

I

LAIN TUMBUNA NA PLES BILONG SANTU JOSEP

Lain tumbuna bilong santu Josep

Em i tru olsem santu Josep i bin i stap tarangu na em i wanpela man i no gat planti samting, tasol em i kam long lain bilong King Devit stret. Buk Baibel yet i tok: *Long namba 6 mun bilong Elisabet i gat bel, God i salim ensel Gebriel i go long wanpela taun bilong Galili, nem bilong em Nasaret. Em i go long wanpela yangpela meri ol i bin makim bilong maritim **wanpela man bilong lain bilong King Devit, nem bilong em Josep.** Nem bilong dispela yangpela meri em Maria (Luk 1:26-27).*

Nem bilong ol lain tumbuna bilong santu Josep i stap long Gutnius bilong santu Matyu na Luk. Santu Matyu i toktok long ol lain tumbuna bilong santu Josep i go inap long Abraham. Em i kolim nem bilong ol tumbuna wan wan long Abraham yet i kam inap long santu Josep: *Dispela em i tok long ol lain tumbuna bilong Jisas Krais. Jisas em i bilong lain bilong Devit na Devit em i bilong lain bilong Abraham... Na Jekop em i papa bilong Josep. Na Josep em i man bilong Maria* (1:1-16). Na santu Luk i toktok long ol lain tumbuna bilong santu Josep i go long Adam yet, na em kolim nem bilong ol tumbuna wan wan: *Taim Jisas i kirapim wok bilong em, em i gat samting olsem 30 krismas. Na ol manmeri i ting em i pikinini bilong Josep. Josep em i pikinini bilong Heli. Na Heli em i pikinini bilong Matat... Na Enos em i pikinini bilong Set. Na Set em i pikinini bilong Adam. Na Adam em i pikinini bilong God* (3:23-38).

Sapos yumi bin putim yau, yumi bai i luksave olsem Gutnius bilong santu Matyu i tok olsem Josep em i pikinini bilong Jekop, na Gutnius bilong santu Luk i tok olsem Josep em i pikinini bilong Heli. **Olsem wanem? Husat em i papa bilong Josep: Jekop o Heli?** Planti ol santu na Tisa bilong Sios (olsem santu Ogastin, santu Ambros, santu Jastin na santu Jon Damasenus) i tok olsem Jekop em i brata tru bilong Heli, olsem na santu Josep em i pikinini tru bilong Jekop, tasol ol i bihainim kastam bilong ol Juda, na sampela i tok olsem santu Josep em i pikinini bilong Heli, long wanem Heli em i smolpapa o ankel bilong santu Josep.

Ol tumbuna bilong santu Josep i kam long lain bilong King Devit yet, na dispela i mekim Jisas i stap tumbuna bilong Devit tu. Maski santu Josep i no trupela papa bilong Jisas, long wanem santu Maria i kisim bel long Holi Spirit, long kastam bilong ol Juda ol pikinini i kisim lain na namba bilong ol tumbuna bilong papa tasol. **Olsem na santu Josep i mekim Jisas i stap tumbuna tru bilong King Devit.**

Ples bilong santu Josep

Gutnius i no tok long santu Josep em i bilong wanem ples stret, olsem na ol saveman bilong Sios i tingting planti. Sampela i tok olsem mama i karim em long Betlehem, na sampela i tok olsem mama i karim em long Nasaret. Santu Jon Krisostom i tok: «Betlehem em i as ples bilong Josep na Maria, tasol bihain tupela i lusim ples bilong ol na i go i stap long Nasaret, na ol bin i stap longpela taim long dispela ples, olsem na planti manmeri i tingting olsem Nasaret em i as ples bilong tupela». O gutpela ples bilong Betlehem! Maski yu liklik ples tumas namel long ol ples bilong Israel, yu winim olgeta ples bilong Israel, long wanem yu as ples bilong santu Josep, santu Maria na Jisas yet!

Long ples Nasaret santu Josep i wok olsem kamda. Buk Baibel yet i tok olsem taim Jisas i wok long autim ol skul bilong em, olgeta manmeri i kirap nogut tru na i tok: «*Yumi save, dispela man em*

i pikinini bilong wanpela kamda, na Maria em i mama bilong em» (Matyu 13:55). Tasol long taim bilong Jisas, wok bilong ol kamda i no wankain olsem wok bilong ol kamda nau. Nogat tru. Nau ol kamda i save wokim ol samting long timba tasol. Ol i save mekim ol sia, na tebol na ol dispela samting long timba tasol. Tasol bipo tru, long taim bilong Jisas, ol kamda i save wokim planti samting! Ol i save wokim ol haus, ol sip na ol bikpela bilding tu! Na santu Josep i skulim Jisas tu long mekim dispela wok, long wanem yumi save olsem Jisas tu i wok wantaim santu Josep. Dispela samting i skulim yumi olsem wok em i bikpela samting tumas! Na pasin bilong i stap nating em i samting nogut tru. Jisas yet em i Pikinini bilong God Antap, tasol em i daunim em yet na i givim eksampel na tuhat long taim bilong wok olsem kamda.

2

SANTU JOSEP I MARITIM SANTU MARIA

Santu Josep em i trupela man bilong santu Maria, long wanem tupela i bin marit long ai bilong God. Buk Baibel yet i tok klia olsem: *Na Jekop em i papa bilong Josep. Na Josep em i man bilong Maria.* (...) *Stori bilong Jisas Krai i kamap, em i olsem. Mama bilong em, Maria, ol i makim em pinis bilong maritim Josep. Tasol taim tupela i no i stap wantaim yet, ol i lukim Maria i gat bel. Holi Spirit tasol i bin mekim na Maria i gat bel. Man bilong em, Josep, em i stretpela man. Em i harim olsem Maria i gat bel, na em i laik lusim em. Tasol em i no laik givim sem long Maria long ai bilong ol manmeri. Olsem na em i laik lusim em isi tasol. Josep i*

*tingting yet long dispela, na long driman wanpela ensel bilong Bikpela i kamap long em. Ensel i tok olsem: «Josep, yu man bilong lain bilong Devit, **yu no ken pret long kisim Maria olsem meri bilong yu.** Harim. Dispela pikinini i stap long bel bilong em, em Holi Spirit i bin givim long em. Bai em i karim pikinini man, na **yu mas kolim nem bilong em Jisas**, long wanem, em bai i lusim sin bilong ol manmeri bilong em na kisim bek ol». (...) Taim Josep i kirap long slip, orait em i mekim olsem ensel bilong Bikpela i bin tokim em. **Em i kisim meri bilong em** (Matyu 1:16-24).*

Long dispela hap tok bilong Gutnius bilong santu Matyu Buk Baibel i tok klia planti taim olsem Josep em i «man bilong Maria» na tupela i bin marit. Na tu dispela hap tok i kolim Maria olsem «meri bilong Josep».

Holi Famili i bin i stap long ples Nasaret, na long ai bilong ol manmeri Jisas em i pikinini bilong Josep. Ol manmeri i no save long bikpela misteri bilong santu Maria i bin kisim bel long Holi Spirit, olsem na ol i tingting santu Josep em i trupela papa bilong pikinini Jisas. **Santu Maria yet i kolim Jisas pikinini bilong Josep**, maski em i kisim bel long Holi Spirit na i no santu Josep i bin givim bel long em! Taim Jisas i gat 12-pela krismas na i lus long Tempel, mama bilong em i tokim em olsem: «*Pikinini, bilong wanem yu mekim dispela pasin long mitupela? Bel bilong **mi tupela papa bilong yu** i hevi tumas na mitupela i wok long painim yu*» (Luk 2:48). Na long sapta 3 santu Luk tu i tok: *Taim Jisas i kirapim wok*

bilang em, em i gat samting olsem 30 krismas. Na ol manmeri i ting em i pikinini bilang Josep. Josep em i pikinini bilang Heli (3:23). Na wankain samting i stap long Gutnius bilang santu Jon: Ol [Juda] i tok: «Dispela man em Jisas, pikinini bilang Josep. Yumi save long papa wantaim mama bilang em» (6:42).

Stori bilang santu Josep i maritim santu Maria em i olsem: Tradisen bilang Katolik Sios i tok olsem taim santu Maria i gat 3-pela krismas tasol, papamama bilang em i givim em long han bilang ol pris bilang Tempel bilang Jerusalem, bai Maria i ken i stap wantaim ol na givim em yet olgeta long God. Tasol taim Maria i kamap yangpela gel, em i lusim Tempel, long wanem lo bilang ol Juda i tok olsem ol yangpela gel i no ken i stap moa long Tempel wantaim ol pris. Na kastam bilang ol Juda i olsem: ol pris yet i mas painim wanpela gutpela man, bai ol gutpela gel i bin i stap wantaim ol, ol i ken kamapim wanpela gutpela famili. Na lo bilang ol Juda i tok olsem dispela man i mas kamap long lain bilang papa bilang gel stret. Buk Baibel i tok: «*[Ol yangpela meri] i ken maritim wanpela man long laik bilang ol yet, **tasol ol i mas maritim man long lain bilang ol yet tasol.** (...) Olgeta meri... i mas maritim man long lain bilang papa bilang ol yet*» (Namba 36:6-8). Olsem na santu Maria i bihainim dispela kastam na em i maritim wanpela man bilang lain bilang King Devit, na dispela man em i santu Josep.

Tradisen bilang Katolik Sios i tok tu olsem taim santu Maria em i liklik pikinini yet, em i laik givim em yet olgeta long God. Olsem

na em i bin mekim wanpela promis long God, long em i laik i stap virgo oltaim na givim lewa bilong em na bodi bilong em olgeta long God tasol. Olsem na ol pris bilong Tempel i save pinis long dispela promis em i bin mekim, olsem na ol makim santu Josep bilong maritim santu Maria, long wanem ol pris i save pinis olsem santu Josep em i wanpela stretpela man, na em bai i rispektim dispela promis bilong Maria, olsem na tupela bai i stap virgo na bihainim klinpela pasin tasol.

O santu Josep! Yu ken amamas tru! God Papa i bin givim santu Maria olsem meri bilong yu! God Pikinini i bin makim yu olsem waspapa bilong em yet! God Holi Spirit i trastim yu bilong was na lukautim dispela pikinini em yet i bin mekim kamap long bel bilong santu Maria! God Triwan i amamas long yu, santu Josep, na mipela olgeta i onarim yu na litimapim nem bilong yu! Yu stap antap tru long heven, na nem bilong yu i winim tru nem bilong ol arapela santu!

*Krismas bilong santu Josep
taim em i kisim santu Maria olsem meri bilong em*

Buk Baibel i tok olsem taim santu Josep i maritim santu Maria, Maria em i wanpela yangpela gel. Ol saveman bilong Sios i tok olsem Maria i gat 14-pela o 15-pela krismas samting tasol. Tasol Buk Baibel i no toktok long krismas bilong santu Josep, olsem na ol

saveman bilong Sios i wok long stadi na tingting planti bilong painimaut dispela samting. Bipo tru sampela saveman i tok olsem santu Josep em i wanpela lapun man, na long dispela as long planti piksa bilong santu Josep yumi lukim em i olsem wanpela lapun man. **Tasol nau yumi save olsem taim santu Josep i kisim santu Maria olsem meri bilong em, Josep em i yangpela man.** Na yumi mekim dispela tok, long wanem ol lapun i no gat strong bilong lukautim ol liklik pikinini o bilong wok olsem kamda, na santu Josep i bin lukautim Jisas na i wok olsem kamda. Ol lapun i no inap long wokabaut planti tumas, na long Gutnius i tok klia olsem santu Josep i wokabaut na i go long ples Betlehem, na em i karim meri bilong em i gat bel. Na tu Gutnius i stori long santu Josep i wokabaut na i go long kantri Isip, long wanem King Herot i laik kilim pikinini Jisas i dai. Ol lapun man i no inap long mekim ol dispela samting, long wanem ol i no gat strong moa. Olsem na yumi no ken tingting olsem santu Josep em i wanpela lapun man taim em i kisim Maria olsem meri bilong em. Nogat tru. Santu Josep em i wanpela yangpela man, tasol yumi no save gut long krismas bilong em taim em i maritim santu Maria. **Plantu saveman bilong Sios na santu i tok olsem em i gat 30 krismas samting taim em i kisim Maria olsem meri bilong em.** Na tu planti santu na saveman bilong Sios i tok olsem dispela tok profet i stap long buk bilong Profet Aisaia i kamap klia long santu Josep: *...yangpela man i maritim yangpela meri na tupela i stap gut wantaim* (62:5).

Wanpela saveman bilong Sios, nem bilong em Suares, i tok olsem: «Taim Josep i kisim Maria olsem meri bilong em, Josep em i wanpela yangpela na strongpela man. Na i gat 4-pela as bilong dispela samting: **Namba wan**, long wanem long kastam bilong ol Juda, ol i save maritim ol yangpela meri long ol yangpela man tasol. Ol Juda i no save maritim ol yangpela meri long ol lapun. **Namba 2**, long wanem Buk Baibel i tok olsem olgeta manmeri i tingting olsem santu Josep em i trupela papa bilong Jisas, na sapos santu Josep em i wanpela lapun, ol manmeri bai i no inap long mekim dispela toktok. Ol bai i tingting olsem santu Josep em i tumbuna o bubu bilong Jisas. **Namba 3**, long wanem yumi ritim long Buk Baibel olsem santu Josep i bin wokabaut na i go long kantri Isip na tu em i bin wok planti yia olsem kamda, na ol lapun i no inap long mekim ol dispela samting. **Na namba 4**, long wanem Buk Baibel yet i tok olsem Maria i maritim *wanpela man*, na em i no tok olsem em i maritim *wanpela lapun man*».

3

SANTU JOSEP I POROMANIM SANTU MARIA LONG GO VISITIM SANTU ELISABET

Taim ensel Gebriel i tokim santu Maria olsem em bai i kamap mama bilong God, ensel tu i tokim Maria olsem kandere bilong em, Elisabet, i gat bel. Na Gutnius bilong santu Luk i tok: *Long dispela taim Maria i kirap na i hariap i go long ples maunten, long wanpela taun bilong distrik Judia* (Luk1:39).

Kandere bilong Maria, Elisabet, i stap long taun Hebron, long distrik Judia. Na Hebron i longwe long Nasaret olsem 130 kilomita. Na rot i go long Hebron i no gutpela rot. Nogat. Dispela rot i bagarap olgeta, na i gat sampela hap we rot i mas abrusim ol ples

nating i no gat man. Olsem na i no gutpela long santu Maria i wokabaut wanpis tasol namel long dispela rot. Nogat. Olsem na santu Josep i poromanim santu Maria, long wanem Josep i save pinis olsem Maria i gat bel, na em i karim Pikinini bilong God long bel bilong em. Ol saveman bilong Sios i tok olsem ol i wokabaut klostu 6-pela de olgeta long dispela rot. Wanpela saveman bilong Sios i tok: «Taim Maria i toksave long Josep olsem em i laik go na visitim kandere bilong em, orait Josep i tokim Maria olsem em tu bai i go. Na Josep i no laik long Maria i wok planti, long wanem Maria i gat bel, na Josep i laik helpim em. Olsem na Josep yet i redim ol samting bilong dispela longpela wokabaut bilong ol. Josep i redim ol kaikai samting na em i redim tu wanpela donki, bilong helpim tupela long karim ol kargo. Josep i mekim Maria i sindaun antap long donki, bai em i ken i stap isi na i no ken wokabaut planti. Tasol Josep i wokabaut long rot 6-pela de olgeta».

Planti santu i tok olsem namel long rot santu Maria i stori long santu Josep long olgeta samting ensel Gebriel i bin tokim em. Yumi no ken lustingting olsem santu Josep i no lukim ensel Gebriel. Nogat. Santu Josep i bin kisim toksave olsem Maria i gat bel long driman tasol. Olsem na taim tupela i wokabaut long rot, orait tupela i toktok planti long bikpela misteri bilong God i kamap man long bel bilong santu Maria.

Buk Baibel i tok olsem Maria i stap wantaim Elisabet inap 3-pela mun samting, na bihain em i go bek long ples bilong em. Olsem

na santu Josep tu i bin i stap 3-pela mun samting wantaim Maria na Elisabet long haus bilong em.

Dispela pasin bilong poromanim meri bilong em i soim yumi olsem santu Josep em i wanpela gutpela man. Em i laikim tru meri bilong em, olsem na em i no les long mekim dispela longpela wokabaut bilong halivim meri bilong em. Pasin bilong laikim meri em i bikpela samting long ai bilong God na tu long lo bilong ol Juda. Buk Baibel i toktok planti long ol man i mas laikim tru ol meri bilong ol na mekim gut long ol. Long bipo bipo tru taim God i kamapim Adam tupela Iv, God yet i tok olsem man i kisim meri i kamap wanpela bodi tasol wantaim em. Olsem na ol man i mas laikim ol meri bilong ol wankain olsem ol i save laikim ol yet. Na tu long Olpela Testamen i gat planti eksampel bilong ol gutpela tumbuna bilong Israel i bin mekim gut long meri bilong ol, na long dispela as tasol God i bin blesim ol.

Long Nupela Testamen santu Pol i tok klia olsem: ***Yupela man, yupela i mas laikim tumas ol meri bilong yupela, olsem Krai i laikim tumas sios na i givim laip bilong em yet bilong helpim sios.*** (...) *Olsem tasol yupela man, yupela i mas laikim tru ol meri bilong yupela, olsem yupela i save laikim bodi bilong yupela yet. Man i laikim tru meri bilong em, em i laikim tru em yet. Yumi save, i no gat wanpela man i save birua long bodi bilong em yet. Nogat. Em i save givim kaikai long em na lukautim gut, olsem Krai i save mekim long sios, long wanem, yumi olsem lek han na ai samting bilong bodi*

*bilang Krai. Buk bilang God i tok olsem: «Olsem na man i save lusim papamama na i pas wantaim meri bilang em, na tupela i kamap wanpela bodi tasol». Dispela tok hait em i gat bikpela tingting bilang em. Mi yet, mi ting em i tok long Krai wantaim sios bilang em. Tasol dispela tok i tok tu long **yupela man wan wan long yupela i mas laikim tru meri bilang yupela, olsem yupela i save laikim yupela yet** (Efesus 5:25-33).*

Maski santu Josep i gat planti wok bilang mekim long ples Nasaret. Maski dispela wokabaut em bai i longpela tumas na em bai i tait nogut tru long rot. Em i save pinis olsem meri em, em i bikpela samting tumas na i winim olgeta samting, olsem na em i no laik lusim ol hevi long Maria. Nogat. Santu Josep i laik helpim Maria, olsem na em i lustingting long em yet na i givim em yet olgeta long Maria.

4

SANTU JOSEP NA SANTU MARIA I GO LONG BETLEHEM

Gutnius bilong santu Luk i tok: *Long dispela taim Sisar Ogastus i putim wanpela lo long ol i mas kisim nem bilong olgeta manmeri. (...) Olsem na olgeta manmeri i go long as ples bilong ol, bai gavman i ken kisim nem bilong ol. Josep em i bilong lain famili bilong King Devit. Olsem na em i lusim taun Nasaret long Galili, na em i go long Judia long taun bilong Devit, ol i kolim Betlehem. **Em i go wantaim meri bilong em Maria, bai gavman i ken kisim nem bilong tupela. Na long dispela taim Maria i gat bel** (2:1-5).*

Ol profet bilong bipo i bin tok klia olsem Mesaia na Sevia bilong yumi i mas kamap long ples Betlehem, long wanem

Betlehem em i as ples bilong King Devit, na God yet i bin promisim King Devit olsem Mesaia bai i kamap long ples bilong em stret. Profet Maika i tok: *Bikpela i tok olsem: «Betlehem Efrata, yu liklik taun tru namel long olgeta taun bilong Juda, tasol wanpela man bilong yu bai i kamap hetman na em bai i bosim ol Israel long nem bilong mi»* (5:2).

Inap long dispela taim santu Maria na santu Josep i bin i stap long ples Nasaret, tasol taim gavman i laik kisim nem bilong tupela, orait tupela i lusim ples Nasaret na i go long Betlehem. Na Nasaret i longwe long Betlehem klostu 150 kilomita, na ol rot i no gutpela tumas, olsem na ol i mas wokabaut klostu 5-pela de olgeta.

Yumi no ken lustingting olsem long dispela taim Maria klostu i laik karim pikinini Jisas, olsem na em i stap pinis long 9-pela mun bilong em. Olsem na bel bilong Maria i bikpela pinis, na em i painim hat long wokabaut na long mekim ol arapela samting. Olsem na long dispela taim santu Josep i mas wok hat bilong lukautim meri bilong em, long wanem ol bai i stap 5-pela de olgeta long rot, na ol i mas wokabaut long ples nating i no gat man, na dispela samting i no isi long mekim.

Na taim santu Josep na santu Maria i kam kamap long ples Betlehem, orait tupela i amamas tru. Tupela i amamas long wanem ol i save pinis olsem ol tok profet bilong bipo bai i kamap tru nau. Ol i save pinis olsem God yet i bin makim

dispela liklik ples bilong Betlehem bilong salim Ridima i kam long graun.

Long taim bilong Jisas, Betlehem em i wanpela liklik ples tasol. Yumi no ken tingting olsem Betlehem em i wanpela bikpela taun. Nogat tru. Long taim bilong santu Josep na santu Maria ples Betlehem i gat klostu 1,000 manmeri tasol. I no bikpela ples tumas. Na dispela em i as ples bilong santu Josep stret. Olsem na santu Josep i tingting olsem ol wantok na ol wanblut bilong em bai i welkamim em na givim long em ples bilong i stap na i slip. Tasol nogat. Yumi save pinis olsem ol lain bilong Betlehem i givim baksait long Holi Famili, na ol i les long helpim ol. Maski santu Maria i gat bel na klostu em i laik karim bebi Jisas, ol wanblut na ol pren bilong santu Josep i les long helpim em.

Buk Baibel i tok: *Orait Tok em i stap long graun. Long dispela Tok tasol God i bin wokim graun, tasol ol manmeri bilong graun ol i no luksave long em. Em i go long as ples bilong em yet, tasol ol lain bilong em ol i no kisim em* (Jon 1:10-11). Em i tru olgeta. Long ples Betlehem ol manmeri i no luksave long santu Maria na santu Josep. Ol lain bilong dispela ples i no luksave olsem Ridima na Sevia bilong yumi i stap insait long bel bilong dispela yangpela naispela meri i wokabaut wantaim man bilong em. Nogat. Ol lain bilong Betlehem i tingting olsem Holi Famili em ol manmeri nating na i wokabaut long ples olsem ol pasindia. Dispela pasin nogut bilong ol lain bilong Betlehem i sutim tru lewa bilong

santu Josep, long wanem em i pilim olsem em i no inap long halivim meri bilong em, Maria.

O gutpela santu Josep! Ol wanblut bilong yu i les long helpim yu wantaim meri bilong yu! Yu wokabaut namel long as ples bilong yu na yu askim ol wanblut bilong yu long helpim yu, tasol ol i bin givim kain kain eskius na ol i givim baksait long yu!

Olsem na taim santu Josep i luksave olsem ol lain bilong Betlehem i les long helpim em, orait em i kisim meri bilong em, na tupela i lusim ples na i go ausait long ples. Ausait long ples ol i painim wanpela liklik groto. Ol famili bilong Betlehem i gat kastaim bilong yusim ol groto bilong putim ol animal bilong ol, long wanem long dispela taim em i kol tumas, olsem na ol animal i save slip insait long ol groto. Olsem na santu Josep i kisim santu Maria i go insait long wanpela groto. Insait long groto i gat ol animal tasol. Ples i tudak tru, na em i kol nogut tru. Smel nogut bilong ol animal i pulimapim dispela groto. Na ol pipia samting bilong ol animal tu i stap nabaut nabaut. Tasol santu Maria i no komplein. Santu Josep i wok strong bilong klinim dispela groto, na bilong helpim meri bilong em. Em i kisim sampela laplap na slipim long graun, bai meri bilong em i ken slip gut. Em i laitim wanpela liklik paia tu, bai paia i ken givim lait na hatim skin bilong tupela, long wanem ples em i tudak na i kol nogut tru. Na tu em i hangamapim wanpela laplap long maus bilong groto, bai ol manmeri i wokabaut ausait i no ken lukim tupela.

Na taim ol i stap long dispela groto... Maria i askim husat bilong helpim em? Santu Josep. Husat i bin halivim santu Maria long olgeta samting? Santu Josep. Husat i bin klinim ples na stretim ol samting bai Maria i ken i stap gut? Santu Josep. Husat i bin kisim wanpela bokis kaikai bilong ol bulmakau na redim wanpela liklik bet bilong bebi Jisas? Santu Josep. Husat i bin i stap namba wan man long lukim Jisas long ai bilong em? Santu Josep. Husat i bin i stap namba wan long holim Jisas long han bilong em? Santu Josep. Husat i bin i stap namba wan man long givim kis long Jisas? Santu Josep. Long dispela as tasol i no gat wanpela santu i ken winim santu Josep!

Oltaim yumi mas tingting long pen bilong santu Josep taim em i kamap long ples Betlehem. Bel bilong em i hevi tru, long wanem ol wanblut i bin givim kain kain eskus long em. Tasol santu Josep i no larim ol hevi i daunim em. Nogat tru. Em i sanap strong long bilip bilong em, na em i save olsem God yet bai i helpim em. Olsem na em i no soim bel hevi bilong em long santu Maria, long wanem em i no laik long Maria tu i bel hevi. Klostu taim Maria bai i karim bebi Jisas, olsem na santu Josep i laik givim amamas tasol long Maria. Olsem na santu Josep i haitim bel hevi bilong em, na em i wok hat bilong halivim meri bilong em long olgeta samting meri i sot long em.

Santu Josep em i man bilong trastim God oltaim. Long narapela sapta yumi bai i toktok long bilip na hop bilong santu Josep, na

yumi bai i luksave olsem i no bin gat wanpela hevi i bin daunim em. Nogat tru. Em i bin winim olgeta hevi i bin kamap long em, long wanem em i save olsem God em i gutpela Papa tru, olsem na God i no save lustingting long yumi. Maski planti taim ol wanblut na ol pren bilong yumi i save givim baksait long yumi, yumi mas trastim God tasol. Yumi mas bihainim pasin bilong santu Josep, na yumi no ken larim ol traim i daunim yumi na mekim yumi i bel hevi tumas.

Long ples Betlehem santu Josep i luksave olsem yumi no ken putim hop bilong yumi long ol manmeri bilong graun. Nogat. Yumi mas trastim God wanpela tasol, long wanem em tasol inap long helpim yumi, na em tasol inap long pinisim olgeta wari na hevi bilong yumi.

O gutpela santu Josep! Yu winim olgeta wari na hevi, long wanem bilip na hop bilong yu i bikpela tru! Helpim mipela tu long trastim God oltaim! Mipela tu i no laik putim hop bilong mipela long ol manmeri bilong graun. Nogat! Mipela tu i laik bihainim yu na trastim God tasol!

5

SANTU MARIA I KARIM BEBI JISAS

Buk Baibel i tok olsem taim santu Maria na santu Josep i go insait long ples Betlehem, orait taim i kamap bilong Maria i karim bebi Jisas: *Tupela i stap yet long Betlehem, na taim i kamap bilong Maria i karim pikinini. Na em i karim namba wan pikinini man bilong em. Na em i karamapim em long laplap, na i slipim em insait long bokis kaikai bilong ol bulmakau, long wanem, haus pasindia em i pulap pinis* (Luk 2:6-7).

O gutpela santu Josep, yu ken amamas tru, long wanem yu bin witnesim bikpela mirakel bilong God i kamap man na i kam i stap namel long yumi! God I Strong Olgeta i kamap man na i

kam long graun olsem wanpela liklik bebi, na yu yet i bin redim wanpela liklik bet long em, bai em i ken slip gut! Yu yet, dia santu Josep, i bin redim olgeta samting bilong helpim meri bilong yu long karim Jisas! Yu yet i namba wan man i bin holim bebi Jisas! Yu yet i namba wan man long givim kis long bebi Jisas na mekim isi long em!

Gutnius i tok olsem taim Maria i karim Jisas, orait wanpela ensel bilong Bikpela i bringim tok long ol wasman bilong sipsip. Na ensel i tok klia olsem: «*Harim. Mi bringim gutnius i kam long yupela, em nius bilong mekim olgeta manmeri i amamas tru. Long dispela de long taun bilong Devit, wanpela meri i karim pikinini. Na dispela pikinini bai i kisim bek yupela olgeta. Em i Bikpela, na em i man God i makim bilong kisim bek ol manmeri bilong em. Na yupela i ken luksave long em olsem. Yupela bai i lukim wanpela pikinini ol i pasim em long laplap, na em i slip i stap long bokis kaikai bilong bulmakau*» (Luk 2:10-12). Olsem na ol wasman bilong sipsip i go hariap lukim bebi Jisas, na ol i lukim Maria tupela Josep i stap, na pikinini i slip i stap long bokis kaikai bilong bulmakau. Ol i lukim pinis, na ol i autim tok long ol samting ensel i bin tokim ol long dispela pikinini. Na olgeta man i harim dispela tok ol wasman bilong sipsip i mekim, ol i tingting planti long em.

Nau yumi tingting long dispela samting i bin kamap insait long groto bilong Betlehem. Maria i karim Jisas na karamapim em long laplap na i slipim em long bokis kaikai bilong ol bulmakau. Tasol

Jisas em i no wanpela pikinini nating. Nogat olgeta. Jisas em i God tru. Jisas em i namba 2 persona bilong God Triwan. Jisas em i Bikpela bilong yumi. Jisas em i Mesaia na Sevia bilong yumi. Buk Baibel i tok olsem long heven planti tausen ensel i save mekim wok bilong helpim em. Long heven ol ensel i save harim tok bilong em oltaim na bihainim. Long heven Jisas i pulap long amamas wantaim God Papa na God Holi Spirit, na em i no sot long wanpela samting. Tasol taim Jisas i kamap long Betlehem, em i sot long olgeta samting. Em i no gat wanpela haus bilong em yet. Em i no gat wanpela bet bilong em yet. Groto em i kol tumas, na bebi i guria. **Na husat i save mekim wok bilong helpim em? Santu Josep tasol. Long groto bilong Betlehem santu Josep i kisim ples bilong ol ensel**, na em yet i mekim wok bilong helpim bebi Jisas.

God i bin givim sans long santu Josep bilong witnesim dispela bikpela mirakel i winim tru olgeta samting bilong dispela graun. God yet i bin makim santu Josep bilong lukautim yangpela Virgo Maria. Na God yet i bin makim santu Josep bilong mekim wok olsem papa bilong bebi Jisas. Dispela tupela misen God i bin givim long santu Josep i winim tru olgeta samting! I no gat narapela man long graun i bin witnesim dispela misteri bilong God i kamap man na i slip insait long bokis kaikai bilong bulmakau. Em i tru olsem ol wasman bilong sipsip na ol saveman bilong hap sankamap i bin lukim dispela samting tu. Tasol santu Josep i winim ol, long wanem em i namba wan man

long lukim. Santu Josep tasol i bin kisim dispela liklik bebi long han bilong em taim santu Maria i bin karim em. I no gat narapela man o meri long groto bilong helpim Maria. Nogat tru. Santu Josep tasol i stap, olsem na taim santu Maria i karim bebi Jisas pinis, orait em i givim bebi Jisas long santu Josep, na Josep i holim em.

Tasol i no santu Josep tasol i gat sans bilong holim Jisas. Nogat tru. Yumi tu i gat sans long i stap wantaim Jisas na mekim gut long em. Long wanem taim yumi kisim santu komunio, yumi kisim Jisas yet. Na dispela Jisas i bin i slip long bokis kaikai bilong bulmakau na dispela Jisas i stap long santu komunio em i wanpela tasol! Em i wanpela Jisas tasol! Olsem na yumi tu i gat sans long lukim Jisas long ai bilong yumi wankain olsem santu Josep. Yumi tu i gat sans long toktok wantaim em. Yumi tu i gat sans long mekim isi long em long taim bilong santu komunio. Olsem na oltaim yumi mas strong long kisim Jisas long taim bilong santu misa!

Yumi tingting nau long bikpela pen na sori bilong santu Josep long taim em i painim hat long halivim meri bilong em na bebi Jisas. O gutpela santu Josep! Bel bilong yu i hevi tumas, long wanem yu no inap long givim planti gutpela samting long meri bilong yu na long bebi Jisas. Yu painim wanpela bokis kaikai bilong bulmakau tasol, na yu yusim dispela bokis bilong slipim bebi God long em. Tasol meri bilong yu i gutpela tumas, olsem na em i no

komplein. Meri bilong yu i amamas tasol long ol liklik samting i stap insait long groto bilong Betlehem. Tasol long lewa bilong yu, yu laik givim planti gutpela samting long em, tasol yu no inap. Ol wanblut bilong yu long Betlehem i bin givim baksait long yu na ol i no welkamim yu long haus bilong ol. Na dispela samting i mekim bel bilong yu i hevi tru.

Olsem na yumi olgeta i mas lainim dispela gutpela pasin bilong santu Josep na santu Maria: tupela i amamas long ol liklik samting bilong ol tasol. Tupela i no komplein long ol samting ol i sot long em. Nogat. Tupela i kisim dispela hevi wantaim bel isi tasol, long wanem ol i trastim God, na ol i save olsem God yet bai i helpim ol.

Nau yumi tingting long yumi yet na skelim ol pasin bilong yumi. Yumi save komplein long ol samting yumi sot long em, o yumi save bel isi tasol? Taim ol wanblut o ol pren bilong yumi i givim baksait long yumi, yumi save krosim ol, o yumi save daunim yumi yet? Yumi mas tingting long ol gutpela pasin bilong santu Josep, na askim Jisas long strongim yumi long akseptim olgeta samting nogut wantaim bel isi na amamas tasol.

O gutpela wasman bilong mipela, santu Josep! Helpim mipela long amamas na bel isi long taim nogut! Helpim mipela long akseptim wantaim bel isi olgeta hevi i save kamap long mipela! Strongim mipela long trastim God oltaim, long wanem God i no save lustingting long mipela!

Taim yumi i stap yet long graun, yumi bai i no inap long save gut long ol samting i bin kamap insait long groto bilong Betlehem. Dispela misteri bilong Betlehem em i bikpela olsem solwara, na tingting bilong yumi em i liklik olsem wesani bilong nambis tasol. Tasol taim yumi go long heven, orait yumi tu bai i gat sans bilong save gut long ol dispela samting. Dispela misteri i winim tru tingting na save bilong yumi!

O gutpela santu Josep! God i bin givim blesing long Maria i winim tru olgeta blesing em i bin givim long ol manmeri bilong graun! Na God tu i bin givim blesing long yu i winim tru blesing em i bin givim long ol manmeri bilong graun! Yu na meri bilong tasol i bin witnesim dispela bikpela mirakel i kamap long groto bilong Betlehem!

6

SANTU JOSEP I GIVIM NEM LONG BEBI JISAS

Lo bilong Israel i tok olsem long de namba 8 bilong ol mama i karim ol pikinini man, orait ol i mas katim skin bilong pikinini. Ol i mekim dispela pasin bilong kisim wankain mak long skin bilong ol, bai pipel bilong Israel i no ken i stap wankain olsem ol pipel bilong ol arapela lain. Ol man bilong Israel i gat dispela mak long skin bilong ol, na dispela mak i soim olsem ol i bilong lain bilong God yet. Buk Baibel yet i tok: *God i tokim Abraham olsem: «Yu na ol lain pikinini bilong yu i kamap bihain, yupela olgeta i mas bihainim kontrak bilong mi. Na yupela i mas bihainim dispela mak bilong kontrak bilong mi. Yupela i mas katim skin bilong kok bilong*

*olgeta man long lain bilong yupela. Yupela i mas katim skin bilong olgeta pikinini man ol i gat 8-pela de pinis. (...) Dispela pasin bai i stap olsem mak bilong kontrak mi mekim wantaim yupela. Yupela i mas katim skin bilong olgeta man bilong yupela. **Na dispela mak i mas stap long skin bilong yupela, bai ol man i ken save kontrak mi mekim wantaim yupela, em bai i stap oltaim***» (Stat 17:9-13).

Yumi no save husat i bin katim skin bilong pikinini Jisas. Sampela santu i tok olsem santu Josep yet i bin katim. Tasol sampela i tok olsem ol pris bilong Israel yet i bin katim. Buk Baibel i no toktok long dispela samting, olsem na yumi no inap long save gut.

Na narapela lo bilong Israel i olsem: long de namba 8, taim ol i katim skin bilong pikinini, orait papa bilong em i mas givim nem long em. **Olsem na long de namba 8 santu Josep yet i givim nem long pikinini, na em i givim nem «Jisas» long em**, long wanem ensel yet i bin kolim dispela nem. Maski santu Josep em i no trupela papa bilong Jisas, long wanem Jisas em i pikinini bilong God Papa. Tasol santu Josep i kisim Jisas olsem pikinini bilong em stret, olsem na em yet i givim nem long bebi Jisas. Gutnius bilong santu Matyu i tok: *Long driman wanpela ensel bilong Bikpela i kamap long em [Josep]. Ensel i tok olsem: «Josep, yu man bilong lain bilong Devit, yu no ken pret long kisim Maria olsem meri bilong yu. Harim. Dispela pikinini i stap long bel bilong em, em Holi Spirit i bin givim long em. Bai em i karim pikinini man, na **yu mas kolim***

nem bilong em Jisas, long wanem, em bai i lusim sin bilong ol manmeri bilong em na kisim bek ol» (1:20-21). Dispela toktok bilong Buk Baibel i soim yumi olsem God Papa yet i bin makim santu Josep bilong givim nem long bebi Jisas. Ensel i tokim Josep klia olsem: «*...yu mas kolim nem bilong em Jisas*».

Na wanem mining bilong dispela nem Jisas? **Dispela nem «Jisas» i min «Sevia»**, na i soim klia olsem Jisas i kam bilong lusim ol sin bilong yumi na kisim bek yumi.

Dispela nem «Jisas» i winim tru ol arapela nem bilong dispela graun, long wanem long em tasol yumi painim salvesen bilong sol bilong yumi. Santu Pol i tok: *God i litimapim Jisas na mekim em i stap antap tru. Na God i givim em wanpela nem i gutpela tru na i winim olgeta arapela nem. Em i givim dispela nem long Jisas, bai olgeta ensel na olgeta man na ol arapela samting i stap long heven na long graun na aninit long graun ol i ken brukim skru long ai bilong Jisas na i stap aninit long em. Na olgeta bilong ol i ken tokaut olsem: «Jisas Krai em i Bikpela». Na long dispela pasin ol bai i givim biknem long God Papa (Filipai 2:9-11).*

Dispela nem «Jisas» i gat olgeta strong, na em i gat strong bilong winim Satan na ol spirit nogut bilong em. Jisas yet i tokim ol disaipel olsem: «*Long nem bilong mi ol bai i rausim ol spirit nogut*» (Mak 16:17).

Dispela nem «Jisas» i save wokim planti mirakel. Buk Baibel i stori long yumi long wanpela bikpela mirakel santu Pita i bin

mekim long nem bilong Jisas. Em i kolim nem bilong Jisas na wantu tasol wanpela lek nogut man i sanap na i stap gut gen. Buk Baibel i tok: *Pita i tok olsem: «Mi no gat mani. Tasol samting mi gat, em mi laik givim yu. Long nem bilong Jisas Krai bilong Nasaret mi tokim yu, yu kirap na wokabaut»* (Wok Aposel 3:6). Na Pita i holim han sut bilong dispela man na i helpim em long sanap. Orait wantu lek wantaim skru bilong em i kamap strong. Na em i kalap na i sanap na i wokabaut.

Dispela nem «Jisas» i save kisim bek yumi na helpim yumi long go long heven. Santu Pita i tokim ol Juda olsem: *«I no gat narapela man i inap kisim bek yumi. Nogat. Long nem bilong Jisas wanpela tasol yumi olgeta manmeri bilong graun inap i stap gut. Em wanpela tasol God i bin makim bilong kisim bek yumi»* (Wok Aposel 4:12).

Olsem na oltaim yumi mas kolim nem bilong Jisas! Oltaim yumi mas kolim nem bilong em, long wanem dispela nem i gat olgeta strong! Long taim nogut na long gutpela taim yumi mas kolim nem bilong Jisas oltaim!

O gutpela santu Josep, yu ken amamas tru, long wanem God yet i bin makim yu bilong givim nem long bebi Jisas! Helpim mipela long kolim nem bilong Jisas oltaim! Long nem bilong em tasol yumi inap long go long heven!

7

SANTU JOSEP NA SANTU MARIA I KISIM PIKININI JISAS I GO LONG TEMPEL

Buk Baibel i no tok stret long wanem taim Josep na Maria i kisim Jisas i go long Tempel bilong givim em long Bikpela. Planti santu na saveman bilong Sios i tok olsem dispela samting i kamap taim ol tripela saveman bilong hap sankamap i bin lusim ples Betlehem na i go bek long kantri bilong ol. Olsem na taim santu Josep i kisim bebi Jisas i go long Tempel bilong givim em long Bikpela, bebi Jisas i gat klostu 40 de samting tasol.

Santu Luk i tok: *Taim i kamap pinis bilong Josep wantaim Maria i bihainim pasin bilong kamap klin long ai bilong God olsem lo bilong*

Moses i tok, orait tupela i kisim pikinini i go long Jerusalem bilong givim em long Bikpela. Tupela i laik bihainim tok i stap long lo bilong Bikpela olsem: «Ol namba wan pikinini man mama i karim, ol dispela yupela i mas givim long Bikpela» (2:22-23).

Jerusalem i longwe long Betlehem klostu 8-pela kilomita tasol. Na dispela em i namba wan wokabaut bilong Holi Famili. Bebi Jisas i liklik tumas, olsem na mama i karim em, na sampela taim mama i givim long santu Josep, bai em tu i karim bebi Jisas long han bilong em.

Taim ol i kam kamap long Jerusalem pinis, orait ol i go long Tempel. Dispela Tempel i bikpela tumas na i naispela tru, long wanem ol Juda i bin bilasim em gut wantaim planti gol na silva, long wanem dispela Tempel em i haus bilong God.

Long Tempel ol i painim wanpela gutpela man, nem bilong em Simeon. Dispela man em i wanpela lapun i bin i stap aninit long God oltaim, na oltaim em i save beten long God na askim God long salim Mesaia i kam. Buk Baibel i tok olsem Simeon em i man bilong lotu long God na pasin bilong em i stret tasol. Olsem na Holi Spirit i mekim Simeon i go long Tempel na i luksave long Jisas. Gutnius i tok: *Long dispela taim i gat wanpela man i stap long Jerusalem, nem bilong em Simeon. Em i man bilong mekim stretpela pasin na em i man bilong lotu long God. Em i wetim dispela man God i bin makim bilong mekim gut bel bilong ol Israel. Na Holi Spirit i stap long Simeon. Holi Spirit i tokim em pinis olsem, em bai i no inap*

i dai kwik. Nogat. Pastaim em i mas lukim dispela man Bikpela i bin promis long salim i kam bilong kisim bek ol manmeri bilong em. Orait Holu Spirit i kirapim em na em i go insait long tempel. Na papamama i bringim pikinini Jisas i kam bilong mekim pasin long em olsem lo i tok. Na Simeon i kisim em na i holim em. Na Simeon i litimapim nem bilong God olsem: «Bikpela, mi wokboi bilong yu, na nau yu ken larim mi i go, na bel bilong mi i ken i stap isi, olsem bipo yu tok. Ai bilong mi i lukim pinis samting yu mekim bilong kisim bek mipela. Yu bin redim dispela long ai bilong olgeta lain manmeri. Em i wanpela lait, na em bai i givim lait long ol man bilong ol arapela lain, na em bai i givim biknem long ol Israel, em ol lain manmeri bilong yu». Papa wantaim mama bilong Jisas tupela i harim dispela tok Simeon i mekim long em, na tupela i tingting planti. Na Simeon i givim blesing long ol, na em i tokim Maria, mama bilong pikinini, olsem: «Harim. God i makim dispela pikinini bilong mekim planti Israel i pundaun, na bilong mekim planti i kirap gen. Em bai i stap olsem wanpela mak, na planti man bai i tok nogut long em. Olsem na tingting hait bilong planti man bai i kamap ples klia. Na yu bai pilim olsem wanpela bainat i sutim lewa bilong yu tu» (Luk 2:25-35).

Taim Simeon i holim Jisas long han bilong em, em i amamas tumas! Planti yia em i bin beten na askim God long salim Mesaia i kam, na nau God i bin bekim ol prea bilong em. Nau Simeon i holim bebi Mesaia long han bilong em, na bel na lewa bilong em i amamas na kalap! Olsem na em i tokim God: «Bikpela, mi wokboi

bilang yu, na nau yu ken larim mi i go, na bel bilang mi i ken i stap isi... Ai bilang mi i lukim pinis samting yu mekim bilang kisim bek mipela» (Luk 2:29-30).

Taim yumi tingting long Simeon i holim Jisas long han bilang em, yumi save amamas, na em i gutpela na i stret. Na sampela taim yumi i save tok olsem yumi tu i laik holim bebi Jisas long han bilang yumi, wankain olsem Simeon i bin mekim. Yumi jeles liklik long Simeon, long wanem yumi tu i laik holim Jisas. Tasol sapos yumi tingting olsem, orait yumi rong pinis! Olsem wanem? **Long wanem long santu komunio yumi tu i save kisim Jisas, na Jisas i kam insait long sol bilang yumi. Olsem na pasin bilang kisim Jisas long santu komunio i winim tru pasin bilang Simeon bilang holim Jisas long han bilang em.** Na tu yumi inap long winim Simeon long wanem Simeon i holim Jisas wanpela taim tasol, na yumi i ken kisim Jisas long santu komunio olgeta de bilang laip bilang yumi!

Orait santu Josep i kisim bebi Jisas na i go insait long Tempel, long wanem em i mas inapim lo bilang Moses. Moses yet i bin tok olsem ol papamama bilang namba wan pikinini man i mas givim sampela ofa long God, olsem na nau em i taim bilang santu Josep na santu Maria bilang givim ofa i go long God.

Na taim ol i stap yet long Tempel, wanpela profet meri i lukim bebi Jisas na i luksave olsem dispela liklik bebi em i Ridima bilang yumi. Gutnius i tok: *Wanpela profet meri i stap, nem bilang em Ana.*

Em i pikinini bilong Fanuel bilong lain bilong Aser. Em i lapun tru. Bipo em i marit, na i stap 7-pela yia wantaim man bilong em. Na bihain man bilong em i dai, na em i stap nating. Na nau em i gat 84 krismas bilong em. Ana i no save lusim tempel. Em i save tambu long kaikai na i beten i stap, na em i holim wok bilong God long san na long nait. Long dispela taim em tu i kam klostu long pikinini na i tenkyu long God. Na em i autim tok bilong dispela pikinini long olgeta manmeri i wet long God i kisim bek ol manmeri bilong Jerusalem (Luk 2:36-38).

Na taim Holi Famili i mekim pinis olgeta samting olsem lo bilong Bikpela i tok, orait ol i go bek long Galili long Nasaret, em i taun bilong ol. Buk Baibel i tok: *Na pikinini em i kamap bikpela na i kamap strong. Em i gat planti gutpela save, na marimari bilong God i stap long em* (Luk 2:40).

O gutpela wasman bilong mipela, santu Josep! Helpim mipela long bihainim gut ol lo na mandato bilong God, olsem yu yet i bin bihainim! Strongim mipela long bihainim oltaim laik bilong God, bai mipela tu i ken i stat gutpela na i stret long ai bilong em!

Dispela pasin bilong santu Josep bilong kisim pikinini Jisas na santu Maria i go long Tempel, i gat bikpela skul bilong em. Jisas em i God tru, olsem na em i no nidim long inapim ol lo bilong Israel. **Jisas em i God tru, olsem na em i no nidim long go long Tempel na soim em yet long Bikpela, long wanem em yet em i Bikpela!** God i bin givim ol lo bilong ol manmeri nating

bilang Israel i ken bihainim na inapim gut. Tasol Jisas em i Bikpela bilang Heven na graun, olsem na em i no nidim long bihainim ol lo wankain olsem ol manmeri nating bilang Israel i save mekim. Na santu Josep i save pinis long dispela samting, olsem na em i gat olgeta rait long abrusim dispela lo, long wanem dispela lo em i bilang ol pikinini bilang Israel tasol, tasol Jisas em i God tru, na em i no wankain olsem ol pikinini. **Olsem wanem na santu Josep i laik inapim dispela lo? Em i inapim dispela lo bilang soim daunpasin bilang em.** Em i save pinis olsem dispela pikinini em i God tru, tasol em i daunim em yet, na em i bihainim ol lo bilang Israel wankain olsem ol manmeri bilang Israel i save mekim. Olsem na yumi tu i mas wok hat bilang bihainim oltaim ol lo na madato bilang God. Yumi no ken tingting olsem yumi ken abrusim sampela mandato. Nogat tru. God yet i bin givim ol mandato long yumi bai yumi i ken inapim ol gut tru, olsem na oltaim yumi mas daunim laik bilang yumi na bihainim laik bilang em tasol.

Long narapela sapta yumi bai i toktok liklik long daunpasin bilang santu Josep na tu long santu Josep olsem man bilang bihainim laik bilang God oltaim.

8

SANTU JOSEP I KISIM SANTU MARIA NA BEBI JISAS NA I RANAWE I GO LONG KANTRI ISIP

Yumi tok pinis olsem God yet i bin makim santu Josep bilong was na lukautim Jisas na Maria. Santu Josep i bin inapim gut dispela wok long wokabaut bilong em wantaim santu Maria i go long Hebron, long taim Maria i laik visitim kandere bilong em, Elisabet. Na tu santu Josep i bin inapim gut dispela wok taim em i go wantaim meri bilong em long Betlehem, bilong givim nem bilong tupela long gavman.

Nau God i askim santu Josep long inapim narapela misen. Na dispela misen God i trastim long santu Josep, em i bikpela moa yet.

God Papa yet i askim santu Josep long sevim laip bilong Pikinini bilong em. God Papa inap long helpim pikinini bilong em, tasol God Papa i trastim santu Josep, olsem na em i askim Josep long mekim dispela bikpela wok.

Yumi save pinis long stori bilong King Herot i laik kilim pikinini Jisas i dai. Taim King Herot i harim ol saveman bilong hap sankamap i tokim em olsem wanpela nupela king i bin kamap long ples Betlehem, orait King Herot i laik kilim dispela king i dai. King Herot i tingting olsem dispela nupela king bai i kisim ples bilong em olsem king, olsem na em i laik kilim i dai dispela pikinini, nogut pikinini i kamap bikpela man na i rausim Herot, na i kisim sia bilong em olsem king. Olsem na bel bilong Herot i hat moa yet long bebi Jisas. Na em i salim ol soldia bilong em i go long taun Betlehem na long ol ples i stap klostu long taun, na ol i kilim i dai olgeta pikinini man i no winim tupela krismas yet.

Tasol pastaim long dispela samting i kamap, orait God Papa i bin salim wanpela ensel bilong askim Josep long was long pikinini bilong em. Gutnius bilong santu Matyu i tok: *Ensel bilong Bikpela i kamap long Josep long driman. Ensel i tok olsem: «Yu kirap na kisim pikinini wantaim mama bilong em, na yu ranawe i go long Isip. Na yu mas i stap long Isip inap long taim mi givim tok gen long yu, long wanem, Herot i laik painim pikinini na kilim em i dai».* Orait Josep i kirap na i kisim pikinini wantaim mama bilong em long nait yet,

na em i bringim ol i go long Isip. Na Josep i stap long Isip inap long Herot i dai pinis (2:13-15).

Wantu tasol santu Josep i harim tok bilong God, na em i kisim pikinini wantaim mama bilong em na i ranawe na i go long kantri Isip. **Ol saveman bilong Sios i tok olsem Holi Famili i go long wanpela taun bipo ol i kolim Heliopolis (nau yumi save kolim em Kairo), na dispela taun em i longwe long Betlehem klostu long 600 kilomita.** Rot i go long taun Heliopolis i stap long ples wesan nating, olsem na i no gat wanpela samting long em. Ol i bin wokabaut planti de long san na long nait. Bikpela san i save kukim skin bilong ol nogut tru long de, na long nait bikpela kol i save kamap long ples wesan nating. Long dispela rot i no gat wara, olsem na ol i painim hat long waswas na long painim wara bilong dring. Dispela rot i gat wesan tasol, olsem na i no gat gutpela gras bai ol i ken sindaun isi, na i no gat ol diwai i mekim tewel bai san i no ken kukim skin bilong ol.

Sampela saveman bilong bipo i tok olsem santu Josep i karim wanpela laplap, na long nait em i save karamapim meri bilong em na bebi Jisas, bai tupela i no ken kol na i ken slip gut. Na long moningtaim tru ol i save kirap gen na wokabaut gen planti aua aninit long biksan long ples wesan nating.

O gutpela santu Josep! Yu bin was gut long meri bilong yu na long bebi Jisas! Yu bin wok hat bai tupela i no ken sot long wanpela samting! Tasol yu yet yu bin sot long planti samting, long wanem

ol samting yu karim, yu givim long tupela. Maria na Jisas i sindaun antap long donki, tasol yu wokabaut long sait bilong donki, na lek bilong yu i tait nogut tru. O gutpela santu Josep, yu man bilong mekim planti sakrifais oltaim!

Holi Famili i bin wokabaut planti de tru inap long ol i kam kamap long taun Heliopolis. Long dispela taun i gat planti ol Juda, olsem na santu Josep na santu Maria i amamas tru long lukim ol. Ol dispela Juda i lotu long trupela God bilong Israel, olsem na Josep tupela Maria i amamas long i stap namel long ol.

Yumi no save hamaspela yia Holi Famili i bin i stap long kantri Isip. Sampela saveman i tok olsem ol i bin i stap wanpela yia tasol. Sampela i save tok olsem ol i bin 4-pela yia. Na sampela i tok olsem ol i bin i stap 7-pela yia samting. Tasol yumi no inap save gut long dispela samting, long wanem Buk Baibel i no toktok long dispela.

O gutpela santu Josep! Helpim mipela long bihainim tok bilong God oltaim! Yu no bin givim eskus long God, na wantu tasol yu bin kisim Maria na Jisas na i ranawe long Isip! Strongim mipela, bai mipela tu i no ken givim eskus long God! Mipela tu i laik mekim sakrifais bilong bihainim gut ol tok bilong God!

9

HOLI FAMILI I LUSIM KANTRI ISIP NA I GO BEK LONG NASARET

Taim Holi Famili i stap yet long kantri Isip, orait ol i save gut olsem wanpela de bai i kamap na ol bai i go bek long kantri bilong ol, Israel. King Herot i sik nogut tru na klostu em bai i dai. Ol buk bilong bipo i stori long indai bilong King Herot i kamap olsem wanem, na ol dispela buk i tok olsem em i bin karim planti pen tumas. Ol i stori olsem ol manmeri bilong taun bilong em i les long helpim em, na tu ol i les long i stap klostu long em. Long wanem taim Herot i stap orait na i strong, em i save mekim planti pasin nogut na bagarapim tru planti manmeri. Olsem na

nau taim em i sik, orait ol manmeri i bekim rong long em, olsem na ol i lusim em i stap wanpis tasol na ol i les long visitim em na helpim em.

Na Buk Baibel i tok olsem: *Taim Herot i dai pinis, orait long Isip ensel bilong Bikpela i kamap long Josep long driman. Na ensel i tokim Josep olsem: «Yu kirap na kisim pikinini wantaim mama bilong em, na yu go bek long Israel. Ol man i laik kilim pikinini, ol i dai pinis». Orait Josep i kirap, na i kisim pikinini wantaim mama bilong em, na ol i go bek long kantri Israel* (Matyu 2:19-21).

Taim ensel i tokim Josep olsem King Herot i laik kilim pikinini Jisas na i mas ranawe na i go long Isip, santu Josep i tingting planti na em i wari tumas. Tasol nau wanpela ensel i tokim em olsem dispela king nogut i dai pinis, olsem na santu Josep i amamas tru, long wanem em i save olsem i no gat wanpela man i laik mekim nogut long pikinini bilong em. Olsem na santu Josep i kisim pikinini Jisas wantaim mama bilong em na ol i go bek long kantri bilong ol, Israel. Santu Matyu i tok moa olsem: *Josep i go sindaun long wanpela taun ol i kolim Nasaret, na long dispela pasin em inapim dispela tok bilong ol profet: «Bai ol i kolim em man bilong Nasaret»* (2:23).

Olsem na santu Josep i kisim meri bilong em wantaim pikinini Jisas, na ol i wokabaut na i kam bek long Nasaret. Dispela wokabaut bilong ol i no isi. Nogat. Em i wankain olsem dispela wokabaut bipo ol i bin mekim, taim ol i lusim Israel na i go long Isip. Olsem

na ol i mas wokabaut gen klostu 600 kilomita, na ol i wokabaut long ples wesana nating. Ol buk bilong bipo i stori olsem dispela rot i pulap long planti wel animal i save bagarapim tru ol pasindia. Na tu dispela rot em i ples hait bilong ol stilman, long wanem ol stilman i save hait long ples wesana nating. Olsem na i no isi dispela misen bilong santu Josep! Em i mas wokabaut 600 kilomita na lukautim meri bilong em wantaim pikinini Jisas long ol wel animal na ol stilman! Tasol nau bel bilong santu Josep i no wari moa, long wanem King Herot i dai pinis. Santu Josep i save pinis olsem pikinini Jisas bai i stap gut long ples Nasaret, olsem na em i amamas long mekim dispela longpela wokabaut.

O gutpela santu Josep! Yu bin amamas tumas taim yu kam kamap long kantri Israel! Na yu bin amamas moa yet taim yu kam kamap long taun Nasaret! Ol pren bilong yu na bilong santu Maria i amamas tru long lukim yupela i kam bek pinis! Pikinini Jisas i stap gen namel long ol wantok na wanblut bilong em, olsem na hariap em i kamap pren bilong planti mangi bilong dispela ples. Na yu amamas tumas long lukim meri bilong yu na pikinini Jisas i stap gut na i sindaun gut long ples Nasaret.

Dispela pasin bilong santu Josep bilong lukautim meri bilong em wantaim pikinini Jisas namel long ol samting nogut long ples wesana nating i gat bikpela skul bilong em. Ol papamama i mas was oltaim long ol pikinini bilong ol, na ol i mas wok hat bai ol pikinini i ken i stap gut. **Tasol yumi no toktok long sait bilong**

bodi tasol. Nogat. Yumi toktok long sait bilong sol, long wanem sol bilong yumi i winim tru bodi bilong yumi. Bodi bilong yumi bai i bagarap long matmat, tasol sol bilong yumi bai i stap laip oltaim long eterniti. Olsem na sol bilong yumi i winim tru bodi bilong yumi. **Olsem na dispela pasin bilong santu Josep i mas kirapim tingting long ol papamama long was gut oltaim long sol bilong ol pikinini bilong ol.** Ol i no ken lukautim bodi bilong pikinini tasol. Nogat. Ol papamama i mas lukautim sol bilong ol pikinini pastaim, long wanem sol em i bikpela samting tumas na i winim bodi. Ol papamama i mas was bai ol pikinini bilong ol i ken bihainim gutpela pasin oltaim. Ol papamama i mas was bai ol pikinini i no ken bihainim ol pren nogut, long wanem ol pret nogut i olsem ol dispela wel animal bilong ples wesana nating i save bagarapim ol pasindia. Ol papamama i mas was bai ol pikinini i ken i stap longwe long ol samting i laik pulim ol long mekim sin. Ol papamama i mas was bai ol pikinini i go long lotu oltaim na konpes planti taim, olsem na sol bilong ol pikinini bai i klin oltaim long ai bilong God. Sapos ol papamama i mekim ol pikinini bilong ol i stap gut long ai bilong God, orait ol i bin inapim gut wok papamama bilong ol. Tasol sapos ol papamama i no lukautim gut sol bilong ol pikinini, na ol pikinini i sakim lo bilong God na mekim planti sin, orait ol papamama i no bin inapim gut dispela misen God yet i bin givim long ol.

IO

PIKININI JISAS I LUS LONG TEMPEL

Long Nupela Testamen i no gat planti stori bilong ol samting i bin kamap long taim Jisas em i yangpela boi na i stap long ples Nasaret. I gat wanpela stori tasol. Na em i stori bilong Jisas i lus long Tempel taim em i gat 12-pela krismas. Gutnius bilong santu Luk i tok: *Long olgeta yia papamama bilong Jisas i save go long Jerusalem bilong lukim Bikpela De bilong Pasova. Jisas i gat 12-pela krismas pinis, orait ol i bihainim pasin bilong dispela bikpela de na ol i go long Jerusalem. Taim olgeta bilong ol dispela bikpela de bilong lotu i pinis, orait ol i go bek long ples. Tasol yangpela mangi Jisas em i stap yet long Jerusalem. Na papamama*

bilang em i no save olsem em i stap yet. Tupela i ting em i wokabaut wantaim ol arapela manmeri. Olsem na tupela i wokabaut wanpela de olgeta. Na bihain tupela i wok long painim em namel long ol wanlain na ol pren. Tupela i painim painim, tasol tupela i no lukim. Olsem na tupela i go bek gen long Jerusalem bilong painim em. Tupela i wok long painim em inap long tripela de, na bihain tupela i lukim em i stap insait long banis bilong tempel. Em i sindaun i stap namel long ol tisa. Em i wok long harim tok bilong ol, na long askim ol tu. Ol man i harim tok bilong em, ol i kirap nogut long save bilong em na long tok em i bekim long ol. Tupela i lukim em na i kirap nogut tru. Na mama bilong em i tokim em olsem: «Pikinini, bilong wanem yu mekim dispela pasin long mitupela? Bel bilong mi tupela papa bilong yu i hevi tumas na mitupela i wok long painim yu». Tasol em i bekim tok olsem long tupela: «Bilong wanem yutupela i wok long painim mi? Ating yutupela i no save, mi mas i stap long haus bilong Papa bilong mi?». Tasol tupela i no save long mining bilong dispela tok em i mekim long tupela (Luk 2:41-50).

Dispela samting i kamap long taim Jisas i gat 12-pela krismas, na i no gat narapela stori o toktok bilong mangi Jisas long Gutnius. Nogat tru. Na Jisas i mekim dispela tok long papamama bilong em taim em i gat 12-pela krismas, na em i stat long mekim wok aposel taim em i gat 30-pela krismas. **I min olsem namel long taim long 12-pela krismas i go inap long 30-pela krismas bilong em, i gat**

18-pela yia Jisas i bin i stap hait. Wanem samting i bin kamap namel long dispela taim? Wanem samting i bin kamap long dispela 18-pela yia Holi Famili i bin i stap long taun Nasaret? Buk Baibel i no stori long yumi, olsem na yumi painim hat long save long ol samting i bin kamap namel long dispela 18-pela yia. Wanem samting i bin kamap long dispela longpela taim Holi Famili i bin i stap long Nasaret em i samting bilong God yet. Yumi no inap save nau, long wanem Buk Baibel i no toktok long dispela. Tasol long heven yumi bai inap save long olgeta samting, na bel bilong yumi bai i amamas tru, long wanem long heven bai i no gat wanpela samting bilong Jisas i ken i stap hait long yumi!

Tasol long Gutnius bilong santu Luk i gat wanpela tok i mas mekim yumi i kirap nogut tru. Gutnius i tok: ***Orait [Jisas] em i go bek wantaim tupela, na ol i kamap long Nasaret, na oltaim em i save bihainim tok bilong tupela*** (2:51). Jisas i harim tok bilong papamama bilong em oltaim! Maski Jisas em i God I Strong Olgeta, em i daunim em yet na em i harim tok bilong santu Josep oltaim! Maski Jisas em i Bikpela bilong heven na graun, em i daunim em yet na i stap aninit long santu Josep! Maski Jisas em i King bilong ol ensel bilong heven, em i daunim em yet na i bihainim olgeta tok i kam long maus bilong santu Josep!

Olsem na pasin bilong harim tok bilong papamana na bilong ol tumbuna bilong yumi em i bikpela samting long ai bilong God. Jisas yet i go pas na soim eksampel long yumi. Jisas em i God tru,

tasol em i daunim em yet na i stap aninit long santu Josep oltaim. Jisas em i man bilong harim tok. I no gat wanpela taim Jisas i bin sakim tok bilong santu Josep o santu Maria. Nogat olgeta. Long wanem pasin bilong sakim tok em i sin long ai bilong God, na Jisas i no bin mekim wanpela sin long laip bilong em, long wanem em yet i God, olsem na em i no inap long mekim sin.

O gutpela santu Josep! Yu winim tru ol santu bilong heven, long wanem **ol santu bilong heven i save bihainim tok bilong Jisas, tasol Jisas i save bihainim tok bilong yu!** Ol santu bilong heven i save kolim Jisas «Bikpela», tasol yu save kolim Jisas «pikinini»! Ol santu bilong heven i olsem wokboi na wokmeri nating bilong Jisas, tasol Jisas i save kolim yu «papa», na em i save harim tok bilong yu oltaim!

II

INDAI BILONG SANTU JOSEP

Buk Baibel i no toktok long indai bilong santu Josep i kamap olsem wanem. Yumi no inap save gut long wanem yia stret santu Josep i bin lusim dispela graun. Yumi save tasol olsem taim Jisas i gat 30-pela krismas em i stat long mekim wok aposel, na long dispela taim santu Josep i bin dai pinis.

Planti taim ol Buk bilong Gutnius i toktok long santu Maria i bin witnesim ol mirakel bilong Jisas na i bin bihainim em long Pen na Indai bilong em. Tasol i no gat wanpela taim ol Buk bilong Gutnius i toktok long santu Josep tu i stap wantaim ol. Olsem na dispela samting i mekim ol saveman bilong Sios i tok olsem santu Josep i bin dai liklik taim pastaim long Jisas i kamap ples klia long ai bilong ol

manmeri. Yumi save olsem namba wan mirakel bilong Jisas i kamap long kaikai bilong marit long taun Kana. Na Gutnius i tok klia olsem ol i bin invaitim Jisas wantaim mama bilong em tasol, na santu Josep i no bin i stap long dispela kaikai. Olsem na sapos santu Josep i bin i stap laip, orait ol bai i invaitim em tu. I min olsem taim Jisas i mekim namba wan mirakel bilong em, santu Josep i bin dai pinis.

Tradisen bilong Katolik Sios i tok olsem santu Josep i bin dai liklik taim pastaim long Jisas i statim wok aposel bilong em. Na tu Tradisen bilong Sios i tok olsem em i bin dai long han bilong Jisas na santu Maria. Taim santu Josep i dai em i bin i gat klostu 60-pela krismas samting, long wanem em i bin maritim santu Maria taim em i bin 30-pela krismas samting, na bihain em i bin i stap wantaim Jisas inap long taim Jisas i gat 30-pela krismas tu. Olsem na dispela samting i soim yumi olsem taim santu Josep i dai em i klostu 60-pela krismas samting.

Yumi no save wanem as bilong indai bilong em. Yumi no inap save sapos em i sik nogut tru, o wanem samting i bin kamap long em. Tasol Tradisen bilong Sios i tok olsem em i bin dai long han bilong Jisas na santu Maria long haus bilong Nasaret. Indai i no bin bungim em nating. Nogat tru. Em i bin redim em yet long indai, na em i bin dai long haus bilong em stret, na meri na pikinini bilong em i stap wantaim em na strongim em.

Santu Leonard i tok: «Yumi tingting long santu Josep i slip long han bilong Jisas na Maria. Em i slipim bodi bilong em long bet, na

Jisas na Maria i sindaun wantaim em long sait na long sait. Planti ol ensel na akensel na ol serafim tu i kam, long wanem ol i laik kisim sol bilong em hariap na kisim i go long ples bilong amamas na malolo».

Na narapela santu i tok: «Taim santu Josep i laik i dai, em i lukluk long Maria, na Maria tu i lukluk long em. Santu Josep i laikim meri bilong em wantaim olgeta strong bilong em, na Maria tu i laikim man bilong em wantaim olgeta strong bilong em. Na nau santu Josep i lukluk long Jisas, na Jisas tu i lukluk long santu Josep. Lukluk bilong Jisas i soim bikpela laik bilong em i go long papa bilong em. Santu Josep i holim han bilong Jisas, na putim long bros bilong em. Em i holim strong han bilong Jisas, na em i stat long givim planti kis long em. Na Josep i lukluk long Jisas na i tokim em olsem: “Pikinini bilong mi, mi laikim yu tumas. Yu lewa bilong mi. Mi redi long givim sol bilong mi long han bilong yu”. Bihain em i pasim tupela ai bilong em, na em i pulim las win na i dai long han bilong Jisas na santu Maria».

Santu Fransis bilong Sales i tok: «Taim santu Josep i redi long pasim tupela ai bilong em na i dai, orait em i lukluk long Jisas na i tokim em: “Pikinini bilong mi, taim yu kamap long graun, Papa bilong yu i stap long heven i trastim yu long mi. Em i askim mi long was long yu. Na mi inapim pinis dispela wok. Nau mi laik lusim dispela graun, olsem na mi trastim sol bilong mi long yu”».

Na narapela santu i tok moa olsem: «Taim santu Maria i luksave olsem man bilong em klostu bai i dai, em i lukim Jisas na i tok: “Jisas, yu pikinini bilong mi na God bilong mi. Wokman bilong yu Josep klostu i laik i dai. Mi askim yu, pikinini bilong mi, long helpim em. Yu mas tingim olgeta gutpela samting em i bin mekim bilong helpim yu taim yu liklik bebi na taim yu yangpela mangi. Tingim laikim pasin bilong em i go long yu. No ken lustingting long olgeta wari na hevi em i bin kisim bilong helpim yu na mi”. Na Jisas i bekim tok bilong Maria olsem: “Mama, mi amamas tru long harim dispela prea bilong yu. Mi no inap lustingting long olgeta samting Josep i bin mekim bilong helpim mitupela. Trastim mi, mama. Mi bai i kisim Josep i go long heven, na bai mi mekim em i sindaun antap tru. Olgeta ensel na santu bai i kirap nogut tru long lukim dispela gutpela ples mi bin redim bilong em pinis long heven. Mi promis yu olsem bai i no gat narapela ensel o santu bai i winim em long heven”. Na taim tupela i toktok pinis, orait santu Josep i lukluk long meri bilong em na i tok tenkyu long em, long wanem Maria em i bin i stap gutpela meri bilong em. Bihain em i lukluk long Jisas na i tenkim em tu, long wanem Josep i luksave olsem olgeta gutpela samting i kam long han bilong Jisas tasol. Na Josep i lukluk gen long Maria na i tokim em: “Maria, yu ken amamas tru. God i bin givim yu blesing i winim olgeta blesing em i bin givim long ol arapela man na meri. Long nau i go inap long dispela graun i

pinis, olgeta manmeri bai i singsing amamas long nem bilong yu. Mi no tingting planti long indai bilong mi, long wanem mi save olsem mi bai i lukim yu gen long heven”. Na bihain santu Josep i lukluk long Jisas na i holim han bilong em, na i tokim em olsem: “Yu pikinini bilong mi na Bikpela bilong mi. Yu pikinini bilong God Papa. Blesim mi, na sapos mi bin mekim sampela rong long laip bilong mi, orait yu ken marimari long mi na pogivim mi. Mi laikim yu wantaim olgeta strong bilong mi. Mi adorim yu na litimapim nem bilong yu, long wanem yu God bilong mi. Na mi tok tenkyu long yu, long wanem yu bin makim mi bilong kamap man bilong Maria, em i mama bilong yu”. Na ai bilong Jisas i pulap long aiwara, na em i tokim Josep olsem: “Papa bilong mi, yu ken malolo nau”. Na taim Jisas i autim pinis dispela las toktok bilong em, orait santu Josep i pasim ai bilong em na i givim sol i go long God».

Na bodi bilong santu Josep i stap we?

Buk Baibel i no stori long yumi long indai bilong santu Josep, olsem na yumi no inap save gut long dispela samting i kamap olsem wanem. Tradisen bilong Sios i kam long ol Aposel yet i stori long yumi long ol dispela samting. Olsem na maski Buk Baibel i no toktok planti long indai bilong santu Josep, yumi gat planti santu na planti saveman bilong Sios i bin kolektim ol stori i kam

long bipo bipo tru, long taim bilong ol Aposel yet. Olsem na yumi bilipim ol dispela samting, long wanem ol santu na saveman bilong bipo i bin harim ol dispela stori long maus bilong ol manmeri i bin toktok wantaim ol Aposel yet.

Pastaim yumi toktok pinis long indai bilong santu Josep i kamap olsem wanem. Tasol nau yumi askim yumi yet olsem: **matmat na bodi bilong santu Josep i stap we?** Yumi no save long wanem ples ol i bin planim bodi bilong santu Josep, tasol **Tradisen bilong Katolik Sios i tokaut strong olsem bodi bilong santu Josep i stap long heven, wankain olsem bodi bilong Jisas na santu Maria.** Yes! Tradisen bilong Sios i tok strong olsem God i bin kirapim santu Josep na kisim em i go long heven!

Na dispela samting i kamap olsem wanem? Gutnius i tokim yumi olsem taim Jisas i dai long diwai kros, orait planti manmeri i stap long matmat i kirap gen na i go insait long Jerusalem. Santu Matyu i tok: *Jisas i singaut strong moa gen, na em i lusim spirit bilong em i go na em i dai. (...) Na ol ples matmat i op, na planti manmeri bilong God, bipo ol i dai pinis, nau ol i kirap. Ol i lusim matmat, na bihain long Jisas i kirap bek pinis, ol i go insait long taun bilong God. Na planti man i lukim ol* (Matyu 27:50-53).

Olsem na planti santu na saveman bilong Sios i tok olsem santu Josep em i wangepela bilong ol dispela manmeri bipo ol i dai pinis na i kirap bek long de bilong indai bilong Jisas. Santu Tomas

bilong Akwainas em i nambawan Tisa na saveman bilong Sios, na em i bilipim olsem santu Josep i kirap wantaim ol dispela lain, na Jisas i kisim em i go long heven. Na santu Ogastin tu i tok: «**Jisas em i gutpela pikinini na oltaim em i bin mekim gut long papa bilong em**, olsem na i no gutpela long Jisas i larim bodi bilong papa bilong em i bagarap long matmat. Nogat tru. **Jisas i mekim bodi bilong Josep i kirap bek long matmat na i kisim em i go long heven**».

Na santu Bernardin bilong Siena tu i tok: «**Mi bilip olsem Jisas i givim long santu Josep wankain pe em i bin givim long mama bilong em, Maria**. Jisas i kisim Maria i go long heven, olsem na bodi bilong Maria i no i stap long matmat. Orait mi bilip olsem Jisas i bin mekim wankain samting long papa bilong em. Jisas i kirapim santu Josep long matmat na i kisim em tu i go long heven. Olsem na nau Holi Famili bilong Josep, Jisas na Maria i stap long heven wantaim bodi na sol bilong ol».

Olsem na yumi ken amamas tru! Jisas, Josep na Maria i stap wantaim long heven! Jisas i kirap long strong bilong em yet, long wanem em i God tru. Tasol Maria na Josep i kirap bek long strong bilong Jisas, long wanem Jisas yet i laik bai papa na mama bilong em i stap long heven wantaim em. Holi Famili i stap long heven wantaim bodi na sol!

O gutpela santu Josep! Helpim mipela oltaim, bai mipela tu i ken go long ples bilong amamas long heven! Mipela tu i laik go na i

stap wantaim yu, Jisas na Maria long heven! Jisas yet i promis pinis olsem em bai i kisim ol gutpela manmeri i go long heven na amamas oltaim oltaim wantaim em!

Nau em i taim bilong tingting liklik long yumi yet. Yumi save wok hat bilong go long heven, o bilip bilong yumi i save slek? Heven em i ples tru bilong yumi, olsem na yumi olgeta i mas go long em! Jisas yet i tok olsem long las de em bai i kam na kirapim bek ol manmeri i stap long matmat! Na long dispela de em bai i mekim kot na givim pe long yumi inap long pasin yumi bin mekim. Orait, olsem wanem? Ol pasin bilong yumi i stret long ai bilong God inap long yumi kisim gutpela pe long han bilong em, o nogat? Ol pasin bilong yumi i gutpela tru inap long Jisas i kisim yumi tu i go long heven, o ol pasin bilong yumi i no gutpela tumas yet? Olsem na sapos nau tasol yumi skelim olsem ol pasin bilong yumi i no gutpela tumas, orait nau em i taim bilong tanim bel na stretim ol samting nogut! Sapos yumi skelim olsem bilip bilong yumi i save slek planti taim, orait nau em i taim bilong kam bek long Jisas na bihainim gut ol lo na mandato bilong em!

I2

SANTU JOSEP EM I BIKPELA SANTU TRU

Namba bilong santu Josep i winim namba bilong ol santu bilong heven, long wanem God yet i bin trastim ol bikpela wok long em bilong mekim. Santu Josep i bin wok planti tumas bilong helpim God long kisim bek ol manmeri bilong em, long wanem em i bin was na lukautim Jisas, em i Sevia na Ridima bilong yumi.

Long Olpela Testamen Abraham i bin winim ol tumbuna bilong Israel, long wanem em i man bilong bilip, na long em tasol God i bin kamapim pipel bilong em yet. Moses tu i bin i stap antap tumas namel long ol profet bilong Olpela Testamen, long wanem

God i bin givim Lo bilong em yet long Moises. King Devit tu i bin i stap bikpela santu namel long ol Juda, long wanem em i gutpela king bilong Israel, na long ol Sam em i bin raitim em i soim eksampel bilong daunpasin na bilong lotu long God.

Long Nupela Testamen ol 12-pela Aposel i kisim biknem tru, long wanem Jisas yet i bin makim ol olsem pos bilong Katolik Sios, na Jisas yet i salim ol i go long olgeta hap bilong graun bilong autim gutnius bilong em. Namel long ol Aposel santu Pita i go pas na i kisim nambawan ples, long wanem Jisas yet i makim em olsem ston, na antap long Pita Jisas i wokim Sios bilong em. Jon bilong Baptais tu i gat biknem tru, long wanem Jisas i bin santuim em taim em i stap yet long bel bilong santu Elisabet, na tu bikos em i namba wan man bilong kapsaitim blut bilong em bilong givim witnes long Jisas. Na santu Maria i go pas long ol santu na ol ensel, na em i winim olgeta manmeri na olgeta santu bilong heven, long wanem God yet i bin makim em bilong kamap mama bilong Jisas. Santu Maria em i Mama bilong God, na dispela nem i winim tru ol arapela nem!

Santu Maria em i nambawan santu na i go pas long ol santu bilong heven, tasol santu Josep i stap klostu tru long em na em tu i winim olgeta arapela santu. Olsem wanem? Long wanem **God Papa yet i bin makim Josep bilong kamap man bilong Maria na papa bilong Jisas, olsem oltaim em i bin i stap klostu tru long Jisas, em i Ridima bilong yumi.** I no gat wanpela santu i bin i stap

klostu long Jisas olsem santu Josep. Nogat tru. Em i winim ol arapela santu i kam bihain, long wanem long de stret bilong santu Maria i kisim bel long Holu Spirit inap long indai bilong em, santu Josep i bin i stap wantaim Jisas.

Santu Josep na santu Maria

Pastaim yumi toktok liklik long pasin bilong santu Josep long i stap wantaim santu Maria. Yumi bin tok pinis olsem santu Josep em i trupela man bilong santu Maria, long wanem tupela i bin marit long ai bilong God. God Papa i bin makim santu Maria bilong kamap Mama bilong God, na God Papa i bin makim santu Josep bilong lukautim dispela gutpela Mama bilong God. Buk Baibel i tok olsem taim wanpela man i kisim wanpela meri, orait tupela i kamap wanpela bodi tasol. Olsem na maski santu Josep i no bin kamapim ol pikinini wantaim santu Maria, tupela i bin i stap wanpela bodi tasol.

Santu Leonard i tok: «Ol Buk bilong Gutnius i no toktok planti long santu Josep, tasol ol i tok olsem em i bin i stap man bilong Maria, na Maria i karim Jisas. Dispela samting tasol i mekim santu Josep i kamap bikpela tru na givim nem long em i winim tru nem bilong ol arapela santu. Santu Maria em i nambawan samting i bin kamap long han bilong God, na God yet i bin makim santu Josep bilong was long em». Na santu Jon Damasenus i tok: «**Dispela**

nem bilong “Man bilong Maria” i mekim santu Josep i winim tru ol arapela i kam bihain long em».

I no gat wanpela ensel o santu i ken winim santu Maria. Nogat. Maria em i Kwin bilong heven, na Kwin bilong ol ensel na Kwin bilong ol santu. Na God yet i bin makim santu Josep bilong kamap man bilong Maria. God yet i bin trastim santu Josep bilong was na lukautim dispela yangpela Virgo, long wanem em i mas kamap Mama bilong God. Olsem na i no gat narapela santu i bin i stap klostu tru long God olsem santu Josep. Nogat tru.

Santu Josep na Jisas

Yumi no ken lustingting olsem long taim ol Buk bilong Gutnius i toktok long ol lain tumbuna bilong Jisas, ol i save kolim nem bilong ol lain tumbuna bilong santu Josep. **Ol Buk bilong Gutnius i no toktok long ol lain tumbuna bilong santu Maria. Nogat. Ol i toktok long ol lain tumbuna bilong santu Josep tasol.** Santu Matyu i tok: *Na Jekop em i papa bilong Josep. Na Josep em i man bilong Maria. Na Maria i karim Jisas, ol i save kolim em Krai, em man God i makim bilong kisim bek ol manmeri bilong em* (1:16). Na santu Luk i tok: *Taim Jisas i kirapim wok bilong em, em i gat samting olsem 30 krismas. Na ol manmeri i ting em i pikinini bilong Josep. Josep em i pikinini bilong Heli...* (3:23), na bihain em i kolim nem bilong ol tumbuna i go inap long Adam yet.

Dispela pasin bilong kolim nem bilong ol tumbuna bilong santu Josep i givim bikpela namba long em, long wanem long kastam bilong ol Juda, ol pikinini i kam long lain bilong papa tasol. **Olsem na long ai bilong ol manmeri, Jisas em i trupela pikinini bilong santu Josep.** Santu Luk yet i tok: *...**ol manmeri i ting [Jisas] em i pikinini bilong Josep*** (3:23). Na tu taim Jisas i yangpela boi na em i lus long Tempel, Buk Baibel i tok: *Long olgeta yia **papamama bilong Jisas** i save go long Jerusalem... Tasol yangpela mangi Jisas em i stap yet long Jerusalem. **Na papamama bilong em** i no save olsem em i stap yet... Na mama bilong em i tokim em olsem: «Pikinini, bilong wanem yu mekim dispela pasin long mitupela? **Bel bilong mi tupela papa bilong yu** i hevi tumas na mitupela i wok long painim yu»* (Luk 2:41-49). Olsem na santu Josep i gat bikpela nem na namba tru, long wanem Buk Baibel na santu Maria i save kolim em «papa» bilong Jisas. **Na dispela nem «papa bilong Jisas» em i bikpela tumas, na i no gat narapela santu long heven i gat dispela nem.** Nogat tru. Santu Josep tasol i gat dispela bikpela nem i winim olgeta nem bilong dispela graun na bilong heven tu. **Santu Josep tasol em i «man bilong Maria» na «papa bilong Jisas».** Santu Bernard i tok: «Namba bilong santu Josep i kamap ples klia long tupela wok God yet i bin givim long em: em i wok bilong i stap man bilong Maria, na wok bilong i stap papa bilong Jisas».

God yet i bin makim santu Josep bilong kamap papa bilong Jisas. Taim santu Maria i karim Jisas long ples Betlehem, santu

Josep em i bin i stap namba wan man long lukim bebi Jisas na adorim em. Na taim Jisas i stap yet long bel bilong santu Maria, santu Josep i bin wok hat bilong halivim meri bilong em, bai em i no ken sot long wanpela samting, na pikinini i ken i stap gut long bel bilong em. Santu Josep i bin was long bebi Jisas wankain olsem ol gutpela papa i save was long ol liklik bebi bilong ol. Taim Jisas i liklik pikinini santu Josep i bin givim kaikai long em long maus, na tu em i bin mekim isi long pikinini taim em i krai. Santu Josep i bin pilai wantaim pikinini Jisas na mekim em i lap na amamas! O gutpela santu Josep, yu ken amamas tru, long wanem yu bin harim Jisas i lap planti taim! Planti taim pikinini Jisas i bin amamas tru long pilai wantaim yu! Na taim King Herot i laik kilim pikinini Jisas i dai, orait God yet i askim santu Josep long kisim pikinini na i ranawe long kantri Isip. Planti taim tumas santu Josep i bin karim pikinini Jisas long han bilong em. Planti taim bebi Jisas i bin slip long han bilong santu Josep, na santu Josep i bin presim em long bros bilong em. Long taim santu Maria i karim Jisas i go inap long indai bilong santu Josep, oltaim santu Josep i bin i stap wantaim Jisas na Maria. I no gat narapela santu i bin i stap klostu long Jisas na santu Maria olsem santu Josep. Nogat tru. Santu Josep i winim olgeta santu!

Na tu i gat narapela samting i save mekim yumi i kirap nogut tru: Jisas i bin harim na bihainim tok bilong santu Josep na bihainim oltaim! Yes! **I no santu Josep i bin bihainim tok bilong Jisas.**

Nogat! Jisas yet i bin harim ol tok bilong santu Josep na bihainim. Gutnius yet i tok: *Oltaim [Jisas] em i save bihainim tok bilong tupela [papamama bilong em]* (Luk 3:51). Maski Jisas em i God tru na Bikpela bilong yumi, em i harim na bihainim tok bilong santu Josep oltaim! Santu Josep em i het bilong Holi Famili, olsem na Jisas tupela mama bilong em i bin i stap aninit long lukaut bilong santu Josep, na santu Josep i bin was long tupela olsem gutpela man na gutpela papa.

Long Katolik Sios yumi save givim bikpela ona long ol namba wan man o meri bin mekim sampela samting. Kain olsem, yumi save givim bikpela ona long santu Stiven, long wanem em i bin namba wan martir bilong Jisas. Yumi save givim ona long santu Pita, long wanem em i namba wan Papa Santu. Yumi save givim ona long santu Andru, long wanem em i namba wan man i kamap aposel bilong Jisas. Orait santu Josep i winim ol dispela santu, long wanem em i namba wan man i bin lukim Jisas long ai bilong em, na tu em i bin namba wan man i bin adorim Jisas. Santu Josep tasol em i namba wan man i bin toktok wantaim Jisas. Em tasol em i namba wan man i bin holim Jisas long han bilong em. Na long dispela as tasol santu Josep i winim tru ol arapela santu bilong heven!

* * *

Long ol sapta i kam bihain long dispela buk yumi bai i toktok long ol gutpela pasin bilong santu Josep. Yumi bai i toktok long olgeta gutpela pasin em i bin mekim, na yumi bai i luksave olsem em i tru olgeta long santu Josep i stap antap tru long heven na i winim ol arapela santu. Long dispela as tasol Katolik Sios i save givim bikipela ona long em, na long bipo bipo tru i kam inap nau ol Katolik manmeri i bin soim bikipela laik na rispek long santu Josep. Em bai i gutpela long yumi olgeta i ken wok hat bilong bihainim ol pasin bilong em.

Dispela buk i save toktok liklik long ol gutpela pasin bilong santu Josep, tasol i no gutpela long yumi ritim tasol. Nogat. Yumi mas ritim na bihainim! Long wanem save bilong yumi i no inap long helpim yumi i go long heven. Nogat. Ol pasin bilong yumi tasol bai i kisim yumi i go long heven! Olsem na i no gutpela long yumi ritim na save long ol gutpela pasin bilong santu Josep, tasol bihainim yumi les long bihainim. Yumi mas wok hat oltaim bilong bihainim santu Josep oltaim, long wanem ol pasin bilong em i stret olgeta, olsem na sapos yumi bihainim em gut, orait yumi tu bai i kamap bikipela santu long heven.

13

SANTU JOSEP I WINIM OL SANTU BILONG HEVEN

Sapos yumi sot long grasia bilong God, orait yumi bai i no inap long mekim wanpela samting. **Olsem na taim God i makim wanpela man o meri bilong mekim wanpela wok, orait God i save givim grasia long dispela man o meri inap long wok em i mas mekim.** Sapos God i askim wanpela man o meri long mekim wanpela bikpela wok, orait em i save givim planti grasia long dispela man o meri, bai wok bilong em i ken kamap gut. Na yumi bin tok pinis olsem wok o misen God i bin givim long santu Josep i bikpela tru na i winim tru ol wok o misen em i bin givim long ol arapela santu. Long wanem God i bin makim santu Josep

bilang lukautim Pikinini bilang God yet, em Jisas. Na Jisas em i God tru, long wanem em i namba 2 persona bilang God Triwan. O bikpela samting tumas! **God Papa yet i askim santu Josep long was na lukautim God Pikinini!** Na God Papa i askim santu Josep tu long lukautim santu Maria, long wanem Maria em i mama bilang Jisas, olsem na em i Mama bilang God tu.

Olsem na grasia God i bin givim long santu Josep i winim tru ol grasia em i bin givim long ol tumbuna bilang Israel. Grasia bilang santu Josep i winim tru grasia bilang Abraham, Moses o ol arapela bikpela santu bilang Olpela Testamen.

God i tokim Profet Jeremaia olsem: *«Taim mi no bin mekim yu i kamap yet long bel bilang mama, mi save long yu. Na taim mama i no karim yu yet, mi makim yu bilang mekim wok profet namel long ol kantri nabaut»* (1:5). Yes, taim mama i no karim yumi yet, God i save pinis long olgeta samting bilang yumi, na em i makim yumi pinis bilang mekim wok bilang em. Olsem na taim mama i no bin karim santu Josep pinis, orait God i bin makim em pinis bilang mekim dispela wok bilang kamap papa bilang Jisas na man bilang santu Maria.

Santu Maria em i namba wan santu long heven, long wanem God Papa yet i bin makim em bilang kamap Mama bilang God. Na santu Josep i stap klostu tru long Maria na em tu i winim ol arapela santu, long wanem God yet i bin makim em bilang kamap papa bilang Jisas. Santu Maria na santu Josep i stap antap tru long

heven, na namba bilong tupela i winim tru namba bilong ol arapela santu.

God i laikim santu Maria moa long ol arapela ensel na santu bilong heven, long wanem Maria em i Mama bilong Jisas, na Jisas em i God tru. Olsem na Maria em i Mama bilong God, na dispela nem i winim tru ol arapela nem bilong heven na graun. Olsem na God i pulapim santu Maria long olgeta grasia na blesing, na Maria em i namba wan santu long lewa bilong God. Orait, God i bin makim husat bilong lukautim santu Maria? Santu Josep. God i bin makim wanem man bilong maritim santu Maria? Santu Josep. God i bin makim husat bilong bihainim klinpela pasin wantaim santu Maria? Santu Josep. Husat i bin givim kaikai olgeta de long santu Maria? Santu Josep. Husat i bin i stap planti yia long haus wantaim santu Maria? Santu Josep. Husat i bin harim olgeta toktok na stori i kam long maus bilong santu Maria? Santu Josep. Long bros bilong husat santu Maria i bin slip planti taim? Santu Josep. Husat i bin lukim santu Maria long groto bilong Betlehem? Santu Josep. Husat i bin helpim santu Maria long ranawe na i go long kantri Isip? Santu Josep. Husat i bin dai long han bilong santu Maria? Santu Josep. Olsem na ol dispela samting i soim yumi olsem i no gat narapela man o meri long graun i bin stap klostu long santu Maria olsem santu Josep.

Na tu yumi mas toktok long ol pasin santu Josep i bin mekim long pikinini Jisas, Ridima na Sevia bilong yumi. Santu Josep em

i namba wan man i save long wok ridima bilong Jisas. Buk Baibel i tok: *Ensel i tokim Josep olsem: «Josep, yu man bilong lain bilong Devit, yu no ken pret long kisim Maria olsem meri bilong yu. Harim. Dispela pikinini i stap long bel bilong em, em Holi Spirit i bin givim long em. Bai em i karim pikinini man, na **yu mas kolim nem bilong em Jisas, long wanem, em bai i lusim sin bilong ol manmeri bilong em na kisim bek ol***» (Matyu 1:20-21). Long taim Jisas i no kamap yet long graun, santu Josep i save pinis long wok ridima bilong em, long wanem wanpela ensel yet i bin tokim em.

Husat i bin wok hat bilong painim wanpela rum bai santu Maria i ken karim bebi Jisas? Santu Josep. Husat em i namba wan man i bin adorim Jisas long groto bilong Betlehem? Santu Josep. Husat em i namba wan man i bin holim Jisas long han bilong em? Santu Josep. Husat i bin lukautim Jisas long taim ol i mas ranawe na i go long kantri Isip? Santu Josep. Husat i bin wok hat olsem kamda bilong bringim kaikai i kam long haus na givim long Jisas? Santu Josep. Husat i kisim pikinini Jisas i go long Jerusalem olgeta yia bilong inapim kastam bilong ol Juda? Santu Josep. Husat i bin harim ol stori i kam long maus bilong Jisas na toktok wantaim em olgeta de? Santu Josep. Husat i bin slip long haus wantaim Jisas? Santu Josep. Husat i dai long han bilong Jisas? Santu Josep. Olgeta manmeri i kolim «papa bilong Jisas» long husat? Santu Josep. Olsem na ol dispela samting i soim yumi

olsem i no bin gat narapela man i bin stap klostu tru long Jisas olsem santu Josep.

Santu Alfons i tok: «**Yumi mas save olsem grasia God i bin givim long santu Josep i winim tru grasia em i bin givim long ol arapela santu.** Olsem na santu Josep i winim tru ol arapela santu, long wanem God yet i bin makim em bilong kamap papa bilong Jisas na trupela man bilong santu Maria».

Na santu Jon Eudes i tok: «Namel long olgeta meri bilong dispela graun, God Triwan i bin makim santu Maria bilong kamap Mama bilong God Pikinini. Olsem na God Triwan i bin pulapim santu Maria long olgeta grasia na blesing. Na namel long olgeta man bilong dispela graun, God Triwan i bin makim santu Josep bilong mekim wok olsem papa bilong God Pikinini. Na dispela misen God i bin givim long santu Josep em i bikpela tru, olsem na tingting bilong yumi bai i sot na bai i painim hat long save gut long dispela misteri. O gutpela santu Josep, yu ken amamas tru! Maria Virgo i save kolim yu "man" bilong em! Na God Pikinini i save kolim yu "papa" bilong em! Maria yet i givim bebi Jisas long yu long groto bilong Betlehem, bai yu ken holim em long han bilong yu, na mekim isi long em. Yu yet i bin lainim God Pikinini long wokabaut! Yu yet i bin lainim God Pikinini long toktok! Oltaim yu bin amamas long haus bilong Nasaret wantaim santu Maria na pikinini Jisas! Yu bin givim bel bilong yu olgeta long tupela! Yu bin mekim planti sakrifais bilong helpim

tupela! Yu bin wok hat olsem kamda bai tupela i no ken sot long wanpela samting! Na taim san i go daun na yu laik malolo, orait Jisas na Maria i save kam na i stap wantaim yu. Tupela i mekim isi long yu. Tupela i mekim wok bilong helpim yu, long wanem yu tait long wok yu bin mekim bilong helpim tupela. O gutpela santu Josep! Tingting na save bilong yumi i liklik tru, olsem na yumi no inap long save gut long bikpela amamas bilong yu wantaim Jisas na santu Maria!».

O gutpela santu Josep! Yu winim tru ol arapela santu bilong heven! Yu mas pre bilong helpim mipela oltaim, bai mipela tu i ken laikim Jisas na santu Maria wantaim olgeta strong bilong mipela!

I4

SANTU JOSEP, MAN BILONG BILIP

Buk Baibel i tok: *Pasin bilong bilip em i olsem. Yumi save gut tru olsem, olgeta gutpela samting God i promis pinis long givim yumi na yumi wet long kisim, em bai yumi kisim tru. Maski ai bilong yumi i no lukim ol dispela samting, yumi save gut tru olsem, dispela olgeta samting i stap* (Hibru 11:1). Bilip em i nambawan samting bilong sevim sol bilong yumi, long wanem sapos yumi no bilip long God, orait yumi bai i lus olgeta. Bilip em i olsem bikpela ston i save holim haus, bai haus i no ken pundaun na i ken i sanap strong. Jisas yet i tok: **«Man i bilip na i kisim baptais, God bai i kisim bek em. Tasol man i no bilip,**

em bai i lus long kot» (Mak 16:16). Na Jisas i tok moa olsem: «*Na laip bilong i stap gut oltaim, em i olsem. Ol man i kisim dispela laip, ol i save long yu, yu wanpela tasol yu God tru. Na ol i save long Jisas Krai, em yu bin salim i kam*» (Jon 17:3). I min olsem: pasin bilong save long Jisas i save kirapim bilip insait long sol bilong yumi, na bilip i save helpim yumi long sevim sol bilong yumi. Na santu Pol i mekim wankain toktok: *Tasol man i no bilip long God, em i no inap bihainim laik bilong God. Long wanem, man i laik i go klostu long God, em i mas bilip olsem God i stap, na em i mas bilip olsem God i save mekim gut tru long ol man i wok long painim em* (Hibru 11:6). Santu Pol i tok klia olsem ol man na meri i no gat bilip, ol bai i no inap stap gut long ai bilong God. Na em i tok moa olsem: *Tasol yumi save, God i no ting long man i bihainim lo bilong Moses, na long dispela as em i kolim em stretpela man. Nogat. **Man i bilip long Krai Jisas, em tasol God i save kolim stretpela man.** Yumi tu yumi bilip pinis long Krai Jisas, long wanem, yumi save, **long dispela rot tasol God i ken kolim yumi stretpela man,** na i no long rot bilong bihainim lo* (Galesia 2:16). Na Kaunsel bilong Trent i tok olsem bilip em i nambawan samting long laip bilong yumi, long wanem sapos yumi no bilip long God, orait yumi bai i no inap long go long heven.

Bilip em i bikpela samting tru, long wanem yumi bilip long God, na God i no inap long giamanim yumi. Nogat tru. Wanem samting

God i askim yumi long bilip, orait yumi mas bilipim, maski tingting bilong yumi i liklik tumas na yumi no inap long save gut o painim as bilong dispela samting. Olsem na pasin bilong bilip i save givim bikpela ona long God, long wanem yumi daunim tingting na save bilong yumi yet, na yumi bilip long ol samting yumi no inap long save gut long em. Taim yumi bilip long God, orait em i save amamas tru long yumi, long wanem yumi save putim yumi yet long han bilong em na trastim em tasol.

Orait bilip bilong santu Josep em i bikpela tumas, long wanem oltaim em i bin bilipim olgeta toktok i kam long God. Santu Josep em i namba wan man i bilip olsem God bai i kamap man, long wanem wampela ensel i bin tokim em, na wantu tasol em i bilip. Em i no tubel. Nogat tru. Santu Maria i go pas long bilipim dispela misteri, na santu Josep i kam bihain. Santu Maria em i namba wan, na santu Josep em i namba 2. Na dispela pasin bilong bilip olsem God bai i kamap man em i bikpela samting tru, long wanem ai bilong santu Josep i no inap lukim wampela samting, tasol bilip bilong em i tok olsem olgeta samting God i tok em i tru tasol. Wantu tasol em i bilipim God na em i bilipim meri bilong em, Maria, tu. Santu Josep i bilip strong olsem dispela liklik bebi i gro insait long bel bilong santu Maria, em i God tru na Sevia bilong yumi. Dispela misteri bilong God i kamap man em i bikpela samting tru, tasol santu Josep i bilip strong olsem namba 2 persona bilong God Triwan i

bin kamap man insait long bel bilong meri bilong em, Maria. Buk Baibel i tok: *Long driman wanpela ensel bilong Bikpela i kamap long em [Josep]. Ensel i tok olsem: «Josep, yu man bilong lain bilong Devit, yu no ken pret long kisim Maria olsem meri bilong yu. Harim. Dispela pikinini i stap long bel bilong em, em Holi Spirit i bin givim long em. Bai em i karim pikinini man, na yu mas kolim nem bilong em Jisas, long wanem, em bai i lusim sin bilong ol manmeri bilong em na kisim bek ol»* (Matyu 1:20-21). Wantu tasol santu Josep i bilipim dispela samting na em i amamas long dispela tok i kam long maus bilong ensel. Em i no tubel. Em i no tingting planti. Nogat. Em i daunim em yet long ai bilong God na bilipim olgeta samting, maski tingting bilong em i no inap long painim as bilong dispela bikpela misteri.

Pasin bilong bilip sampela taim i no isi, long wanem yumi mas daunim tingting na save bilong yumi, na yumi mas aninit long God. Save bilong God i winim tru save bilong yumi, long wanem save bilong God i no gat pinis o arere bilong em, na save bilong yumi i liklik tumas. Olsem na planti taim save bilong yumi i no inap long painim as bilong olgeta samting God i askim yumi long bilip. Santu Pol yet i tok: *Olaman! Ol gutpela pasin bilong God na tingting na save bilong em i pulap tru, na i daun tumas olsem solwara! Yumi man i no inap tru long painim as bilong olgeta tingting bilong em. Yumi no inap tru long bihainim olgeta rot bilong em* (Rom 11:33).

Tasol maski santu Josep em i man bilong strongpela bilip, planti traim i bin kamap long bilip bilong em. Yes, bilip bilong santu Josep i no isi, long wanem santu Josep em i wanpela man wankain olsem yumi, olsem na planti traim i save kamap long bilip bilong em tu. Nau yumi toktok liklik long ol traim i bin kamap long bilip bilong em.

- **Namba wan bikpela traim i kamap long bilip bilong santu Josep** i kamap long taim em i luksave olsem meri bilong em i gat bel. Buk Baibel i tok olsem: *[Santu Josep] Em i harim olsem Maria i gat bel, na em i laik lusim em. Tasol em i no laik givim sem long Maria long ai bilong ol manmeri. Olsem na em i laik lusim em isi tasol* (Matyu 1:19). Yumi mas kisim gut as bilong dispela hap tok bilong Buk Baibel. **Santu Josep i laik lusim Maria long wanem em i luksave long bikpela misteri bilong God i bin kamap man insait long bel bilong Maria**, olsem na em i tingting olsem em i no gutpela man tumas bilong lukautim santu Maria na bebi Jisas, em i Bikpela na Ridima bilong yumi. Santu Josep i daunim em yet olgeta, na em i tingting olsem em bai i no inap long mekim gut dispela wok. Olsem na long dispela as tasol em i laik lusim Maria isi tasol. Santu Josep i luksave olsem God yet i bin makim meri bilong em bilong karim Mesaia insait long bel bilong em, olsem na santu Josep i laik lusim Maria, bai Maria i ken givim em yet olgeta long God tasol.

Sampela manmeri i tok olsem santu Josep i laik lusim Maria, long wanem Josep i tingting kranki long Maria, na em i tingting olsem

Maria i bin kisim bel long narapela man. **Tasol dispela toktok bilong ol em i rabis tru na em i olsem tok nogut i go long santu Maria**, long wanem dispela toktok i mekim santu Maria i kamap olsem wanpela meri nogut o wanpela meri nating. Olsem na yumi ol Katolik i mas abrusim dispela kain tingting. Na sapos yumi harim wanpela man o meri i autim dispela rabis toktok, orait yumi no ken pret long bekim maus bilong em na sanap strong long sait bilong santu Maria na santu Josep.

- **Narapela bikpela traime i kamap long bilip bilong santu Josep** i kamap long ples Betlehem, long taim santu Maria i laik karim bebi Jisas. Santu Josep i save pinis olsem dispela liklik bebi em i God tru na Bikpela bilong heven na graun, olsem na em i tingting olsem God yet bai i redim na stretim olgeta samting, bai Maria i ken karim Jisas long wanpela naispela haus, na ol i no ken sot long wanpela samting. Tasol nogat. Yumi save pinis olsem santu Josep i no bin painim wanpela rum bai meri bilong em i ken karim bebi Jisas. Ol haus pasindia long ples Betlehem i pulap pinis, na ol wantok bilong santu Josep i givim kain kain eskus, na ol i givim baksait long em. Na santu Josep i kisim santu Maria na i go insait long wanpela groto i kol nogut tru. Na ol i no gat wanpela samting. Ol i no gat wanpela bet, o sia o tebol. Nogat. Ol animal tasol i stap, na ples i doti nogut tru na bikpela smel nogut tu i pulimapim dispela groto. Olsem na dispela samting i mekim santu Josep i wari liklik, tasol em i no lusim hop bilong em. Nogat olgeta. Em i bilip

yet long God, na bilip bilong em i kamap strong moa moa yet. Maski ai bilong em i lukim olsem olgeta samting i no nais tumas, em i bilip olsem dispela samting em i laik bilong God yet, olsem na em i akseptim ol dispela traim na i amamas wantaim meri bilong em, Maria.

- **Narapela traim i kamap long bilip bilong santu Josep i** kamap long taim santu Maria i karim Jisas pinis. Santu Josep i holim dispela liklik bebi long han bilong em, na ai bilong em i no inap long lukim olsem dispela bebi em i God tru. Nogat. Ai bilong santu Josep i lukim wanpela liklik bebi tasol. Na dispela bebi i krai, na em i dring susu, na em i liklik tumas, wankain olsem olgeta bebi. Na santu Josep i save pinis olsem dispela bebi em i God tru, na em i Bikpela bilong yumi. Tasol ai bilong em i no inap lukim dispela bikpela misteri. Dispela liklik bebi i slip long bokis kaikai bilong ol bulmakau, tasol bilip bilong santu Josep i tok: «Dispela bebi em i God tru, Bikpela bilong heven na graun!». Oltaim santu Josep i save holim bebi Jisas long han bilong em, tasol bilip bilong em i tokim em olsem dispela bebi i no wanpela bebi nating. Nogat tru. Bikpela bilip bilong santu Josep i tokim em olsem dispela bebi em i Sevia bilong olgeta manmeri, maski ai bilong em i no inap lukim ol dispela samting.

- **Bikpela traim i kamap long bilip bilong santu Josep i** kamap long taim em i harim olsem King Herot i laik kilim bebi Jisas i dai. Santu Josep i harim dispela samting na em i kirap

nogut tru. God inap long bagarapim tru dispela king nogut, tasol Jisas i daunim em yet na i no laik mekim nogut long king. Nogat. Jisas i daunim bikpela strong bilong em olsem God, na em i trastim santu Josep tasol. Olsem na santu Josep i kisim bebi Jisas wantaim meri bilong em, Maria, na i ranawe na i go hait long kantri Isip. Dispela samting tu i traim bilip bilong santu Josep, long wanem em i mas trastim God oltaim na i bilip wanem samting ensel i bin tokim em, maski em i no inap long kisim as bilong dispela samting nogut i kamap long em.

- **Narapela traim i kamap long bilip bilong santu Josep i kamap long taim King Herot i dai na Holi Famili i mas bek long Israel.** Gutnius i tok: *Taim Herot i dai pinis, orait long Isip ensel bilong Bikpela i kamap long Josep long driman. Na ensel i tokim Josep olsem, «Yu kirap na kisim pikinini wantaim mama bilong em, na yu go bek long Israel. Ol man i laik kilim pikinini, ol i dai pinis».* **Orait Josep i kirap, na i kisim pikinini wantaim mama bilong em, na ol i go bek long kantri Israel** (Matyu 2:19-21). Taim Holi Famili i kam bek long Israel, santu Josep i bin i stap planti yia long haus wantaim Jisas na santu Maria. Na maski santu Josep i save pinis olsem pikinini Jisas em i God tru na Bikpela bilong yumi, ai bilong em i lukim wanpela pikinini tasol. Na dispela pikinini i save mekim ol pasin ol pikinini i save mekim. Long ai bilong ol manmeri Jisas em i wanpela pikinini bilong ples tasol, long wanem God pasin bilong em i hait

olgeta. Olsem na taim santu Josep i lukim pikinini Jisas, em i no lukim God pasin bilong em. Nogat tru. Ai bilong santu Josep i lukim wanpela pikinini tasol, wankain olsem ol arapela pikinini bilong ples Nasaret. Na dispela samting tu i traim bilip bilong santu Josep, long wanem oltaim em i mas tok: «Maski ai bilong mi i no lukim God pasin bilong pikinini Jisas. Mi save pinis olsem dispela pikinini em i God tru na Sevia bilong olgeta manmeri. Ai bilong mi i paul, long wanem mi lukim wanpela pikinini tasol. Tasol bilip bilong mi i tok olsem dispela pikinini i stap wantaim mi long haus em i Bikpela bilong mi na Sevia bilong mi».

Planti yia santu Josep i bin i stap wantaim Jisas na santu Maria long liklik haus bilong Nasaret. Na ol i stap wankain olsem ol arapela famili bilong dispela ples. Na dispela samting tu i traim bilip bilong santu Josep, long wanem **em i stap wantaim God long haus bilong em, tasol em i no inap lukim dispela samting long ai bilong em!** Santu Josep i lukim Jisas na em i lukim wanpela mangi tasol. Em yet i bin lainim Jisas long toktok. Em yet i bin lainim Jisas long wokabaut. Em yet i bin lainim Jisas long mekim ol wok insait long haus. Em yet i bin lainim Jisas long helpim papamama. Na taim Jisas i kamap yangpela, santu Josep i bin lainim em long wok olsem kamda. Taim santu Josep i lukim Jisas, em i lukim wanpela boi bilong ples tasol. Tasol bilip bilong em i tok: «Dispela boi em i Pikinini

bilang God Antap Tru. Dispela boi em i God I Strong Olgeta. Dispela boi em i God yet i kamap man». **Ai bilang santu Josep i paul oltaim, tasol bilip bilang em i strong tumas long bilipim ol samting ai bilang em i no inap lukim.**

O gutpela wasman bilang mipela, santu Josep! Strongim bilip bilang mipela, bai mipela tu i ken bilip olgeta tok i kam long maus bilang God! Helpim mipela long daunim mipela yet oltaim na trastim God wantaim olgeta strong bilang mipela!

15

SANTU JOSEP, MAN BILONG HOP

Hop em i wanpela presen God i givim long yumi long taim bilong baptais. Dispela presen i mekim yumi i wet long God bai i helpim yumi long go long heven. Hop tasol i save mekim yumi i wet long kisim ol gutpela samting God i bin promisim yumi. Yumi hop long God wanpela tasol, long wanem em yet i promisim olsem em bai i helpim yumi long go long heven. God i no save giaman, olsem na yumi bilipim olgeta tok bilong em na yumi hop long em bai i kisim yumi i go long heven.

Ol manmeri i pulap long hop i save wok hat tru bilong i go long heven, long wanem ol i save pinis olsem dispela graun em

i samting nating na em bai i pinis, olsem na laik na tingting bilong ol i pas long heven tasol. Ol manmeri i gat hop i no save komplein long taim nogut o long taim bilong karim hevi, long wanem ol i save pinis olsem bikipela pe i wetim ol long heven. Sapos yumi wari tumas long ol samting nogut i save kamap long yumi, i min olsem hop bilong yumi i no bikipela tumas. Na sapos yumi givim yumi yet long dispela graun na i mangal long kisim amamas bilong graun tasol, orait dispela samting i soim olsem yumi sot long hop, long wanem lewa bilong yumi i pas yet long dispela graun tasol.

Hop bilong yumi i gat wanpela as tasol: em God yet. Yumi hop long em tasol. Yumi no trastim yumi yet. Nogat tru. Yumi trastim God tasol. Ol wok bilong yumi i no inap long kisim yumi i go long heven, long wanem planti taim yumi save mekim sin tu na kain kain pasin nogut, olsem na ol gutpela pasin bilong yumi i save bagarap long ol pasin nogut bilong yumi. Olsem na sapos God yet i no helpim yumi, orait yumi bai i no inap long go long heven. Olsem na hop bilong yumi i save sanap strong antap long ol promis bilong God tasol. Jisas yet i tok: «**Sapos yupela i lusim mi, yupela i no inap mekim wanpela samting**» (Jon 15:5).

Santu Pol i tok: *Mipela i laikim tumas bai yupela olgeta i mas wok strong olsem tasol, na holimpas bilip bilong yupela, na wetim dispela taim God i makim bilong mekim gut long yumi. Yupela i no ken les. Yupela i mas bihainim pasin bilong ol man i bilip tru na i no les kwik,*

na ol i kisim olgeta samting bipo God i tok long givim long ol pikinini bilong em (Hibru 6:12-13). Olsem na ol manmeri i pulap long hop i save wok strong bilong kamap santu, na tu ol i no save les long mekim gutpela pasin na planti sakrifais. Hop bilong yumi i save pulim yumi long mekim sakrifas oltaim!

Hop bilong santu Josep em i bikpela tru, long wanem planti traim i bin kamap long laip bilong em, tasol oltaim em i bin hop long God na trastim em.

Taim meri bilong em i kisim bel long Holi Spirit, orait wantu tasol santu Josep i bilipim dispela bikpela misteri, na em i trastim God na meri bilong em. Em i no tubel. Nogat tru. Em i putim em yet long han bilong Bikpela na em i trastim Bikpela oltaim.

Na tu taim em i stap long ples Betlehem na em i no painim wanpela gutpela rum bai meri bilong em i ken karim bebi Jisas, em i trastim God wantaim olgeta hop bilong em, long wanem em i save pinis olsem God i no inap long lustingting long em, olsem na em i save pinis olsem God bai i helpim em wantaim meri bilong em.

Wankain samting i bin kamap long taim em i mas ranawe na i go long kantri Isip wantaim meri bilong em na bebi Jisas. Dispela wokabaut bilong ol i go long Isip i no isi. Tasol santu Josep i trastim God na wantu tasol em i harim tok bilong em na i kisim meri bilong em wantaim pikinini na kisim ol i go long kantri Isip.

Na taim ol i kam bek long ples Nasaret, orait santu Josep i hop long God oltaim. Santu Josep i save pinis olsem God yet i bin makim em bilong mekim wok olsem papa bilong Jisas na man bilong Maria. Maski dispela wok i no isi long inapim, em i no tubel na i no tingting planti. Nogat. Em i save pinis olsem God yet bai i helpim em long inapim gut dispela misen God yet i bin givim long em.

Na long indai bilong em, em i trastim God tu long givim gutpela pe long em long heven. Santu Josep i bin tuhat tumas na mekim planti sakrifais bilong mekim pikinini Jisas i stap gut, olsem na nau em i save olsem God Papa bai i givim gutpela pe long em. Santu Josep i save olsem God bai i kisim em i go long heven, na givim long em ol samting God yet i bin promisim yumi. Buk Baibel i tok olsem long taim bilong indai God bai i tokim ol gutpela manmeri olsem: *«Yu gutpela wokboi, yu bin mekim gutpela wok tru. (...) Yu kam amamas wantaim mi»* (Matyu 25:21).

Na hop bilong yumi olsem wanem? Planti taim yumi no save hop gut long God. Planti taim yumi tingting olsem God bai i givim gutpela pe nating long yumi, olsem na yumi i no save wok hat bilong kamap santu. Na sapos yumi no wok hat bilong kamap santu, orait God bai i no inap givim gutpela pe long yumi. **Olsem na yumi no ken lustingting: God bai i kisim yumi i go long heven sapos yumi wok hat bilong bihainim laik bilong em oltaim.** God i no inap long kisim yumi i go long

heven nating. Nogat tru! Planti manmeri i tok olsem ol i hop long God, tasol ol i no save mekim planti gutpela pasin. Sori long ol! Hop bilong ol em i samting nating! Yumi mas hop long God na trastim em, tasol yumi mas wok hat tu bilong kamap santu! Santu Josep i givim eksampel long yumi, long wanem olgeta de bilong laip bilong em, em i bin wok hat bilong inapim gut ol wok God i bin givim long em.

Santu Ogastin i tok: **«God i no inap helpim yu sapos yu no helpim yu yet pastaim»**. Dispela tok bilong santu Ogastin em i tru olgeta! Yumi mas wok hat oltaim na helpim yumi yet long go long heven! Yumi mas wok hat bilong bihainim gut laik bilong God oltaim! Na sapos yumi mekim olsem, orait yumi gat rait long hop long God na trastim olsem em bai i givim gutpela pe long yumi long heven. Na long taim bilong kot Jisas yet bai i skelim ol pasin bilong yumi, na givim pe inap long ol pasin yumi bin mekim. Sapos yumi pulap long planti gutpela pasin na grasia bilong God, orait em bai i givim gutpela pe long heven. Tasol sapos yumi sot long ol gutpela pasin na yumi sot long grasia bilong God, orait yumi bai i kisim pe nogut long hel.

Long Buk Baibel Jisas i tok klia olsem i no olgeta manmeri bai i go long heven. Nogat. Em yet i tok: *«Yupela i no ken ting, olgeta manmeri i save kolim mi: “Bikpela, Bikpela”, ol bai i go insait long kingdom bilong heven. Nogat. **Man i bihainim laik bilong Papa bilong mi i stap long heven, em tasol bai i go***

insait long kingdom» (Matyu 7:21). Ol manmeri i strong tumas long mekim gutpela pasin, ol tasol bai inap long go insait long heven. Olsem na oltaim yumi mas mekim dispela tupela samting: yumi mas hop long God na wok hat bilong kamap santu. Sapos yumi sot long hop, yumi bai i no inap. Sapos yumi sot long gutpela pasin, yumi tu bai i no inap. **Pasin bilong hop long God na pasin bilong bihainim ol mandato bilong God i mas wokabaut wantaim.**

O gutpela santu Josep! Yu man bilong hop! Oltaim yu bin trastim God! Oltaim yu bin trastim olsem God bai i inapim ol gutpela promis bilong em! Strongim hop bilong mipela, bai mipela tu i ken wok hat bilong kamap santu, na bihain God i ken kisim mipela i go long heven wantaim yu, Jisas na santu Maria!

I6

SANTU JOSEP, MAN BILONG LAIKIM PASIN

Laikim pasin em i pasin bilong laikim God wantaim olgeta strong bilong yumi, na ol arapela manmeri olsem yumi save laikim yumi yet. Long Tok Inglis yumi save tok «*Charity*». Laikim pasin (o *charity*) i winim olgeta arapela gutpela pasin, long wanem sapos yumi sot long laik i go long God, orait ol arapela gutpela pasin i olsem samting nating. Santu Pol yet i tok: *Sapos mi save toktok long ol manmeri long kain kain tok ples bilong man na long tok bilong ol ensel tu (...). Na sapos mi save autim tok profet na mi save pinis long olgeta tingting hait bilong God na mi gat olgeta arapela save tu, na sapos mi gat strongpela bilip tru inap long mekim*

ol maunten i surik i go long narapela hap (...). Na sapos mi givim olgeta samting bilong mi long ol rabisman, na sapos mi larim ol man i holimpas mi na kukim bodi bilong mi long paia na mi dai pinis, tasol sapos mi sot long laikim pasin (o charity), orait dispela olgeta pasin bilong mi bai i no inap helpim mi liklik (1 Korin 13:1-3). **Olsem na laikim pasin em i nambawan gutpela pasin long ai bilong God**, na i no gat narapela pasin i ken winim em. Nogat tru. Dispela pasin tasol i save mekim yumi i pas wantaim God na i kamap wan wantaim em.

Jisas yet i tok: «***Yupela i mas laikim God, Bikpela bilong yumi. Yupela i mas laikim em tru long bel bilong yupela na long spirit bilong yupela na long tingting bilong yupela. Dispela lo em i bikpela, na em i namba wan tru***» (Matyu 22:38).

Dispela laikim pasin i save mekim yumi i laikim God wantaim olgeta strong bilong yumi. Laikim pasin i save helpim yumi long putim God olsem nambawan samting long laip bilong yumi, na wok hat bilong abrusim ol samting nogut i save bagarapim grasia bilong God insait long sol bilong yumi. Laikim pasin tasol i save helpim yumi long lustingting long ol samting bilong dispela graun, na givim yumi yet olgeta long God.

Olsem na laikim pasin i save pulim yumi long mekim 2-pela samting: namba wan samting, em i save helpim yumi long laikim God wantaim olgeta strong bilong yumi. Namba tu samting, em i save helpim yumi long laikim ol arapela manmeri olsem yumi

save laikim yumi yet. Santu Jon yet i tok: ***Yumi wan wan i mas laikim tru ol arapela, long wanem, pasin bilong laikim ol arapela em i pasin bilong God. Na man i laikim tru ol arapela, em i pikinini bilong God, na em i save tru long God. God yet em i as bilong dispela pasin bilong laikim ol arapela. Olsem na man i no save laikim ol arapela, em i no save long God*** (1 Jon 4:7-8). Na Jisas yet i tokim ol disaipel bilong em olsem: «*Na nau mi givim nupela lo long yupela olsem, **yupela wan wan i mas laikim tru ol arapela. Mi bin laikim yupela tru, na olsem tasol yupela wan wan i mas laikim tru ol arapela***» (Jon 13:34).

Planti taim Jisas i toktok long dispela pasin bilong laikim God na ol arapela manmeri. Bipo ol Juda i save toktok planti long pasin bilong laikim God, tasol ol i no save laikim ol manmeri bilong ol arapela lain o kantri. Nogat tru. Ol Juda i save laikim ol gutpela manmeri, tasol ol i save bel nogut long ol birua bilong ol. Ol Juda i save laikim ol wantok na ol wanblut tasol, na ol i save les long laikim ol arapela lain manmeri. Tasol **Jisas i tokim yumi long laikim olgeta manmeri na mekim gut long olgeta manmeri, maski yumi save long ol o yumi no save long ol.** Na Jisas i tokim yumi long laikim tu ol birua bilong yumi na ol manmeri i mekim rong long yumi tu, long wanem yumi mas pre bilong helpim ol long tanim bel. Jisas yet i tok: «*Yupela i harim pinis bipo ol i bin tok olsem: “Yu mas laikim tru ol wantok, na yu mas bel nogut long ol birua bilong yu”. Tasol mi tokim yupela olsem: **yupela i mas***

*laikim ol birua bilong yupela, na yupela i mas beten bai God i marimari long ol man i save mekim pasin nogut long yupela. Olsem bai yupela i stap pikinini bilong Papa bilong yupela em i stap long heven. Em i save mekim san bilong em i kamap antap long ol man nogut na long ol gutpela man wantaim. Na em i save mekim ren i kam daun long ol stretpela man na long ol man bilong mekim pasin i no stret tu. Sapos yupela i laikim tasol ol man i save laikim yupela, bai yupela i kisim wanem pe? Ol man bilong kisim takis, ol tu i save mekim wankain pasin. Na sapos yupela i givim gude long ol brata bilong yupela tasol, bai yupela i winim ol arapela man long wanem samting? Ol haiden tu i save mekim olsem. Yupela i mas i stap stretpela manmeri tru, olsem Papa bilong yupela i stap long heven em i stap stretpela tru» (Matyu 5:43-48). Na santu Jon i raitim wankain samting long namba 1 pas bilong em: Sapos wanpela man i tok: «Mi laikim tru God», tasol em i no laikim wanpela bilong ol arapela manmeri bilong God, **orait dispela man em i man bilong giaman** (4:20).*

Yumi mas save olsem dispela laikim pasin (o *charity*) i stap insait long ol manmeri i gat grasia long sol bilong ol. **Mortal sin tasol i save bagarapim na pinisim dispela laikim pasin.** Long wanem taim yumi mekim mortal sin, yumi putim sin bilong yumi olsem nambawan samting, na yumi givim baksait long God na sakim lo bilong em, olsem na yumi yet i rausim God long sol bilong yumi na yumi lusim grasia bilong God wantaim laikim pasin bilong em.

Orait, nau yumi toktok liklik long laikim pasin bilong santu Josep. Laikim pasin bilong santu Josep i bikpela tumas, long wanem God yet i bin makim em bilong kamap man bilong Maria na papa bilong Jisas, olsem na God yet i bin kapsaitim planti grasia na laikim pasin insait long sol bilong em. Na tu laikim pasin bilong santu Josep em i bikpela tru long wanem em i bin i stap klostu 30-pela yia long haus wantaim Jisas, na Jisas em i as bilong olgeta grasia, em i as bilong laikim pasin na as bilong olgeta samting i gutpela na i holi. Olsem na sapos yumi kam klostu long Jisas, orait grasia na laikim pasin bilong yumi bai i gro na kamap bikpela moa yet. Orait santu Josep i bin i stap planti yia wantaim Jisas na santu Maria, olsem na grasia na laikim pasin bilong em i winim tru grasia na laikim pasin bilong ol arapela santu. Wanjela saveman bilong Sios i tok: «Taim yu go klostu long paia, orait skin bilong yu bai i hat. Na taim yu go klostu long san, orait yu bai i lukim lait bilong em i lait moa moa yet. **Wankain samting i save kamap long God: taim yumi go klostu long em, orait olgeta gutpela samting bilong em i save kamap bikpela moa yet insait long sol bilong yumi,** na em i save pulapim yumi long planti grasia na laikim pasin».

Olsem na i no gat narapela santu i bin i stap klostu long Jisas olsem santu Josep. Nogat. Olsem na yumi mas tok klia olsem laikim pasin bilong santu Josep i bikpela tru na i winim ol arapela santu i kam bihain. Santu Alfons i tok: «**Yumi mas tokaut klia**

olsem: God i bin pulapim santu Josep long planti grasia na laikim pasin i winim tru grasia em i bin givim long ol arapela santu, long wanem wok bilong santu Josep olsem papa bilong Jisas na man bilong Maria i winim tru olgeta wok na misen God i bin givim long ol arapela santu bilong mekim».

Santu Hat bilong Jisas em i as bilong laikim pasin. Olgeta gutpela grasia na blesing i kam long gutpela Hat bilong Jisas. Jisas tasol em i as na papa bilong olgeta grasia. Orait santu Josep i bin presim planti taim bebi Jisas long bros bilong em, na em i bin harim nois bilong hat bilong pikinini Jisas! Planti taim santu Josep i bin holim Jisas long han bilong em, na em i bin presim bros bilong Jisas long bros bilong em yet, na hat bilong Jisas na hat bilong santu Josep i kamap klostu tru, na i luk olsem tupela hat i kamap wanpela hat tasol!

O gutpela Jisas! Laitim paia bilong laikim pasin insait long hat bilong mipela tu! O gutpela Ridima bilong mipela! Mipela tu i laik laikim yu wantaim olgeta strong bilong mipela, olsem santu Josep i bin mekim!

O naispela santu Maria! Helpim mipela long soim laik bilong mipela i go long Jisas long olgeta toktok, tingting na pasin bilong mipela!

O gutpela wasman santu Josep! Yu mas pre bilong helpim mipela, ol manmeri bilong sin i no gat strong! Helpim mipela long givim mipela yet olgeta long Jisas!

I7

SANTU JOSEP, MAN BILONG DAUNPASIN

Laikim pasin em i namba wan samting insait long laip bilong yumi. Tasol **daunpasin em i olsem graun we laikim pasin i save gro na kamap na karim gutpela kaikai**. Sapos i no gat daunpasin long sol bilong yumi, orait laikim pasin bai i no inap long mekim wanpela samting, olsem na gutpela kaikai bai i no inap long kamap. Ol santu i save tok olsem laikim pasin em i kwin bilong ol gutpela pasin, na daunpasin em i olsem wokmeri bilong em. Tupela i mas i stap wantaim. Sapos yumi sot long daunpasin, orait laikim pasin tu bai i no i stap long sol bilong yumi. Santu Bernard i tok: «**Daunpasin em i olsem pos bilong ol arapela**

gutpela pasin. Sapos yumi no gat daunpasin, orait yumi bai i no inap long mekim ol arapela gutpela pasin». Na wankain olsem wanpela haus i no inap long sanap strong sapos em i no gat ol gutpela pos, orait wankain olsem tasol ol gutpela pasin bai i no inap long i stap long sol i no gat daunpasin tu.

Buk Baibel i toktok planti long daunpasin. Jisas yet i tokim ol disaipel bilong em olsem: «***Mi tok tru long yupela, sapos yupela i no senis na kamap olsem ol liklik pikinini, bai yupela i no inap i go insait long kingdom bilong heven***» (Matyu 18:3). Dispela pasin bilong kamap olsem ol liklik pikinini i min olsem yumi mas daunim yumi yet oltaim. Sapos nogat, orait Jisas i tok olsem yumi bai i no inap long go insait long kingdom bilong heven. Na santu Jems i mekim wankain toktok: ***[God] i save marimari na mekim gut long ol man i daunim ol yet*** (Jems 4:6).

Long Gutnius bilong santu Luk i gat wanpela tok piksa i toktok klia long daunpasin. Em i tok piksa bilong dispela tupela man i go beten long Tempel. Wanpela em i farisi, na em i litimapim nem bilong em yet tasol. Narapela em i wanpela man bilong mekim sin, tasol em i daunim em yet oltaim. Na Jisas i tok olsem dispela man i gat daunpasin em i stret long ai bilong God, na dispela man i litimapim em yet, em i wanpela man nogut. Jisas i tok: «***Olgeta man i litimapim nem bilong ol yet, God bai i daunim ol. Na olgeta man i daunim ol yet, God bai i litimapim nem bilong ol***» (Luk 18:14).

Yumi mas daunim yumi yet oltaim, long wanem yumi mas save olsem olgeta gutpela samting bilong yumi i kam long han bilong God tasol. Long strong bilong yumi yet, yumi no inap long mekim wanpela samting. Olsem na taim yumi skelim na luksave long sampela gutpela samting i stap long yumi, orait yumi mas daunim yumi yet na i tok olsem dispela samting i kam long han bilong God tasol. Buk Baibel i tok: ***Olgeta gutpela samting yumi save kisim na olgeta presen i gutpela tru, em olgeta i save kam long heven. Papa i bin mekim kamap olgeta lait bilong skai, em i save salim dispela ol samting i kam daun long yumi*** (Jems 1:17). Na santu Pol tu i tok: *Pren, olsem wanem? Husat i putim yu i stap bikman? Yu gat wanpela gutpela samting yu no bin kisim long God, a? Na sapos i tru yu bin kisim olgeta samting long han bilong God, orait bilong wanem yu litimapim nem bilong yu yet, olsem yu yet yu bin kamapim ol dispela samting?* (1 Korin 4:7). Na em i tok moa olsem: *Sapos wanpela man i ting em i gat nem, tasol em i no gat nem, orait dispela man i giamanim em yet* (Galesia 6:3). Santu Teresia i tok: **«Olgeta gutpela pasin bilong yumi i kam long God tasol. Ol sin na ol pasin nogut i kam long yumi yet».**

Santu Maria i go pas long daunpasin. Em i nambawan santu bilong heven, na em i Kwin bilong ol ensel, na Kwin bilong heven na graun. Tasol em i daunim em yet oltaim, na em i tok olsem em i wanpela wokmeri bilong Bikpela tasol. Maski em i Kwin bilong heven na graun, em i no litimapim nem bilong em yet. Nogat. Em

i daunim em yet, na em i givim olgeta ona i go long God tasol. Em yet i tok: «*Mi wokmeri bilong em, tasol em i lukim mi na em i marimari long mi... Em i save marimari long ol manmeri i aninit long em... Em i daunim ol strongpela king, na em i litimapim ol man i no gat nem*» (Luk 1:48-52). Olsem na sapos yumi laik i stap gut long ai bilong God, orait oltaim yumi mas daunim yumi yet na yumi i mas abrusim pasin bilong litimapim nem bilong yumi yet.

Na nambawan eksampel bilong daunpasin i stap long Jisas yet. Jisas em i God tru. Em i Bikpela bilong heven na graun. Em yet i bin kamapim graun na skai na olgeta samting. Em i Strong Olgeta na em inap long mekim olgeta samting long laik bilong em tasol. **Tasol em i daunim em yet, na em i kamap man wankain olsem yumi.** Em i kamap wanpela liklik bebi na Mama Maria i bin karim em long wanpela groto na putim em long bokis kaikai bilong ol bulmakau. Jisas i daunim em yet olgeta, na long ai bilong ol manmeri em i stap olsem wanpela man i no gat planti samting. Maski Jisas em i God tru, em i daunim em yet na em i laik i stap olsem wanpela wokboi nating. Santu Pol i tok: *[Jisas] Em i stap God tru, tasol em i no ting long holimpas dispela pasin bilong i stap wankain olsem God. Nogat. Em i lusim dispela pasin, na em i kamap olsem wokboi nating. Em i kamap olsem man na ol man i lukim em i stap man tru. Na em i daunim em yet na i bihainim tok bilong God, i go inap long em i dai, yes, inap long em i dai long diwai kros* (Filipai 2:6-8).

Jisas yet i tok olsem yumi mas bihainim daunpasin bilong em oltaim: «*Yupela kisim save long mi, long wanem, mi save mekim pasin isi long ol man na mi save daunim mi yet*» (Matyu 11:29).

Orait nau yumi toktok liklik long daunpasin bilong santu Josep. Pastaim yumi bin tok olsem daunpasin em i graun we laikim pasin i save gro na kamap na karim gutpela kaikai. **Daunpasin na laikim pasin i save i stap wantaim na wokabaut wantaim.** Sapos yumi pulap long daunpasin, orait yumi bai i pulap long laikim pasin tu. Sapos yumi sot long daunpasin, orait yumi bai i sot long laikim pasin tu. Na yumi tok pinis olsem santu Josep i bin pulap long laikim pasin, olsem na nau yumi mas tok tu olsem em i bin pulap long daunpasin tu. Daunpasin bilong santu Josep i bikpela tumas, na santu Maria tasol inap long winim em. Santu Josep i winim ol arapela santu long laikim pasin na daunpasin tu.

Santu Josep em i wanpela man i save daunim em yet oltaim. Em i amamas long i stap hait, na em i les olgeta long ol manmeri i litimapim nem bilong em. Em i kam long lain bilong King Devit, long wanem King Devit em i bin tumbuna bilong Josep. Tasol Josep i no bin litimapim nem bilong em, na em i stap olsem wanpela kamda tasol long ples Nasaret. Maski em i kam long lain bilong nambawan king bilong Israel, em i laik i stap wankain olsem ol man nating bilong ples. Na em i amamas tru long i stap olsem wanpela man nating, long wanem em i stap olgeta de wantaim Jisas

na santu Maria, olsem na em i no mangalim wanpela samting. **Santu Josep i no tingting long ol samting bilong dispela graun, long wanem lewa bilong em i pas long meri bilong em na long pikinini bilong em tasol.**

30-pela yia em i bin i stap long liklik haus bilong Nasaret wantaim Jisas na santu Maria. Dispela liklik haus i kamap olsem wanpela skul we santu Josep i ken lukim daunpasin bilong meri bilong em na bilong pikinini bilong em, na em i wok long bihainim tupela. Jisas em i God tru, olsem na em i Bikpela bilong heven na graun. Maria em i nambawan santu long ai bilong God, na i winim olgeta ensel na santu. Santu Josep i kam bihain long tupela, olsem nambawan sumatim bilong tupela.

Santu Jon Krisostom i tok: «Buk Baibel i save tok olsem santu Josep em i *stretpela man*. Dispela tok “*stretpela man*” i min olsem em i bin pulap long olgeta gutpela pasin». Na santu Jerom: «Santu Josep i pulap long daunpasin na em i pulap long olgeta gutpela pasin tu. Pasin bilong em i winim tru pasin bilong ol arapela santu». Na santu Bernard: «Taim Holi Spirit i wok long painim wanpela man bilong maritim santu Maria, orait em i makim santu Josep, long wanem santu Josep i winim tru ol arapela man bilong dispela graun. **Na tu Holi Spirit i bin redim sol bilong santu Josep, na i bin pulapim em long olgeta grasia na gutpela pasin.** Olsem na mi ting olsem santu Josep i winim olgeta santu bilong heven».

O gutpela Jisas, yu save mekim pasin isi na yu save daunim yu yet oltaim! Helpim mipela long kamap olsem yu! O naispela Virgo Maria, yu winim olgeta santu bilong God! O gutpela wasman bilong mipela, santu Josep, pre bilong helpim mipela long bihainim daunpasin bilong yu!

Nau yumi toktok liklik long daunpasin bilong yumi, na yumi skelim sol bilong yumi yet. Santu Josemaria, em i wanpela santu bilong kantri Spein, i givim 12-pela askim bilong helpim yumi long luksave sapos yumi gat daunpasin o nogat. Olsem na nau yumi mas ritim ol dispela askim na bekim insait long lewa bilong yumi. Sapos yumi luksave olsem planti taim yumi no save daunim yumi yet, orait nau em i taim bilong askim God long helpim yumi!

Santu Josemaria i tok: «Bilong luksave sapos yu sot long daunpasin, orait yu mas bekim ol dispela askim insait long bel bilong yu yet:

1) Mi save tingting olsem save bilong mi i winim save bilong ol arapela manmeri? Mi save tingting olsem ol pasin bilong mi i winim pasin bilong ol arapela manmeri?

2) Mi laik long ol manmeri i bihainim laik bilong mi oltaim?

3) Mi save paitim tok wantaim ol arapela manmeri, long wanem mi laik long ol i bihainim tok bilong mi oltaim?

4) Mi save tok baksait long ol manmeri i mekim ol pasin i no stret long ai bilong mi?

5) Mi save givim baksait long ol manmeri i no wanbel long mi?

6) Mi save litimapim nem bilong mi long ol gutpela pasin mi save mekim?

7) Mi save givim kain kain eskus taim wanpela man o meri i tok olsem mi mekim rong?

8) Mi save amamas long taim ol manmeri i tokt olsem mi gutpela man o meri?

9) Mi save bel hevi o kros taim narapela man o meri i go pas long mekim sampela wok?

10) Mi save les long daunim mi yet na i stap aninit long narapela man o meri?

11) Mi save toktok gut long mi yet na stori long ol gutpela samting mi save mekim?

12) Mi save bel hevi long taim mi sot long wanpela samting?».

Ol dispela askim bilong santu Josemaria bai i helpim yumi long luksave sapos yumi gat daunpasin o nogat. Sapos nau tasol yumi painimaut olsem planti taim yumi sot long daunpasin, orait nau em i taim bilong stretim ol dispela pasin nogut bilong yumi!

18

SANTU JOSEP, MAN BILONG HARIM TOK BILONG GOD

Pasin bilong harim tok em i bikpela samting long ai bilong God, long wanem dispela pasin i helpim yumi long bihainim laik bilong God oltaim. Sapos yumi harim tok bilong God oltaim, orait yumi bai i kamap santu na go long heven. Sapos yumi les long harim ol tok bilong em, orait yumi bai i lus olgeta long hel. I no gat narapela rot. Nogat tru. Olsem na oltaim yumi mas harim na bihainim ol lo na tok i kam long God.

Sapos yumi laik kamap santu na go long heven, orait yumi mas harim tok bilong God oltaim. Sapos yumi bihainim laik bilong

yumi yet tasol, orait dispela pasin bai i kisim yumi i go long hel, long wanem planti taim tingting bilong yumi i save pulim yumi long mekim sin. Tasol sapos yumi daunim yumi yet oltaim na i redi oltaim long bihainim laik bilong God, orait em yet bai i kisim yumi i go long heven.

I gat 4-pela tok bilong God yumi mas harim na bihainim oltaim:

1) Namba wan, yumi mas harim na bihainim olgeta mandato bilong em. God i bin givim yumi 10-pela mandato, na yumi mas bihainim ol gut. I no gutpela long yumi bihainim sampela mandato, tasol sampela mandato yumi no bihainim. Nogat. Yumi mas bihainim ol 10-pela mandato oltaim.

2) Namba 2, yumi mas bihainim ol gutpela toktok na advais i stap long Buk Baibel. God i givim yumi 10-pela mandato tasol, tasol Buk Baibel i pulap long planti gutpela toktok na advais, na ol dispela samting yumi tu i mas harim na bihainim.

3) Namba 3, yumi mas bihainim ol gutpela tingting i save kirap insait long bel bilong yumi. Planti taim God yet i save kirapim planti gutpela tingting insait long bel bilong yumi, na yumi gat laik long mekim ol gutpela pasin o long abrusim ol pasin nogut. Orait ol dispela tingting God yet i bin kamapim insait long yumi, olsem na yumi mas bihainim ol tu.

4) Namba 4, yumi mas akseptim oltaim laik bilong God long laip bilong yumi. Yumi no ken komplein long God long taim

nogut o long taim bilong hevi. Yumi no ken mangal long ol samting God i no givim long yumi. Na sapos God i laik long yumi i karim pen (kain olsem kisim sik nogut, o i stap tarangu, o bungim hevi, etc), orait yumi mas akseptim ol dispela samting. Yumi no ken lustingting olsem save bilong God i winim tru save bilong yumi. Olsem na sapos em i larim sampela samting nogut i kamap long yumi, orait em i save pinis long as bilong dispela samting.

Jisas yet i tokim yumi i mas beten olsem: *«Mipela i mas bihainim laik bilong yu long graun olsem ol i save bihainim long heven»* (Matyu 6:10). Olsem na pasin bilong bihainim laik bilong God em i bikpela samting tru long ai bilong em, long wanem laik bilong God em i as bilong olgeta pasin i holi.

Jisas yet i givim eksampel long yumi. Em yet i bin harim tok bilong God Papa oltaim. Em yet i tok: *«Mi no lusim heven na kam daun bilong bihainim laik bilong mi yet. Nogat. **Mi kam daun bilong bihainim laik bilong Papa**, em i bin salim mi na mi kam»* (Jon 6:38). Na taim Jisas i beten long gaden Getsemani em i tokim God Papa olsem: *«Papa bilong mi, sapos inap, orait mi laik bai yu rausim dispela kap long mi. **Tasol yu no ken bihainim laik bilong mi. Nogat. Yu mas bihainim laik bilong yu tasol»*** (Matyu 26:39).

Santu Pol tu i tok: *Laik bilong God em i olsem. Yupela i mas givim laip bilong yupela olgeta long em na kamap holi* (1 Tesalonika 4:3). Long tingting bilong santu Pol sapos yumi bihainim laik bilong

God, orait yumi bai i kamap holi. Sapos yumi bihainim laik bilong yumi yet, orait yumi bai i lus. Em tasol.

Buk Baibel i soim yumi olsem santu Josep em i man bilong harim tok. Oltaim santu Josep i bin harim tok bilong God. God i bin askim planti samting long santu Josep, tasol oltaim Josep i bin aksemtim laik bilong God na bihainim gut. Na em i mekim olsem long wanem em i save gut olsem laik bilong God i winim tru laik bilong yumi, olsem na yumi no ken pret o givim eskus long God.

I gat planti eksampel i soim yumi olsem oltaim santu Josep i bin harim olgeta toktok bilong God na i bin bihainim laik bilong em oltaim.

Taim ensel bilong Bikpela i tokim em long em i no ken lusim Maria na em i mas kisim bebi Jisas, wantu tasol Josep i harim tok bilong ensel. Gutnius bilong santu Matyu i tok: *Josep i harim olsem Maria i gat bel, na em i laik lusim em. Tasol em i no laik givim sem long Maria long ai bilong ol manmeri. Olsem na em i laik lusim em isi tasol. Josep i tingting yet long dispela, na long driman wanpela ensel bilong Bikpela i kamap long em. Ensel i tok olsem: «Josep, yu man bilong lain bilong Devit, yu no ken pret long kisim Maria olsem meri bilong yu. Harim. Dispela pikinini i stap long bel bilong em, em Holi Spirit i bin givim long em. Bai em i karim pikinini man, na yu mas kolim nem bilong em Jisas, long wanem, em bai i lusim sin bilong ol manmeri bilong em na kisim bek ol». (...) **Taim Josep i kirap long slip, orait em i mekim***

olsem ensel bilong Bikpela i bin tokim em. Em i kisim meri bilong em (Matyu 1:19-24).

Narapela eksampel bilong pasin bilong harim tok bilong santu Josep i stap long sapta 2 bilong Gutnius bilong santu Matyu. Gutnius i tok olsem taim ol 3-pela saveman bilong hap sankamap i go bek long kantri bilong ol, orait God i askim Josep long kisim pikinini wantaim mama bilong em na i ranawe i go long kantri Isip. Santu Matyu i tok: *Ol saveman i go pinis, na ensel bilong Bikpela i kamap long Josep long driman. Ensel i tok olsem: «Yu kirap na kisim pikinini wantaim mama bilong em, na yu ranawe i go long Isip. Na yu mas i stap long Isip inap long taim mi givim tok gen long yu, long wanem, Herot i laik painim pikinini na kilim em i dai».* ***Orait Josep i kirap na i kisim pikinini wantaim mama bilong em long nait yet, na em i bringim ol i go long Isip*** (2:13-14).

Na narapela eksampel i kamap sampela yia bihain, taim ol i stap yet long kantri Isip na ensel i tokim Josep olsem ol i mas kam long kantri Israel. Buk Baibel i tok: *Taim Herot i dai pinis, orait long Isip ensel bilong Bikpela i kamap long Josep long driman. Na ensel i tokim Josep olsem: «Yu kirap na kisim pikinini wantaim mama bilong em, na yu go bek long Israel. Ol man i laik kilim pikinini, ol i dai pinis».* ***Orait Josep i kirap, na i kisim pikinini wantaim mama bilong em, na ol i go bek long kantri Israel*** (Matyu 2:19-21).

Na yumi olsem wanem? Yumi save harim tok bilong God oltaim olsem santu Josep, o yumi save bihainim laik bilong yumi yet?

Yumi save bihainim gut ol 10-pela mandato bilong God, o yumi save bihain wan wan mandato tasol? Yumi save bihainim ol arapela advais na gutpela toktok i stap long Buk Baibel, o nogat? Yumi save bihainim ol gutpela tingting God i save kirap long bel bilong yumi? Yumi save akseptim ol gutpela samting na ol samting i nogut i kam long han bilong God? Olsem na em i gutpela long yumi skelim yumi yet, na stretim ol samting i no stret long laip bilong yumi. Sapos yumi luksave olsem yumi no save bihainim gut laik bilong God, orait nau em i taim bilong lusim lespasin bilong yumi na wok hat bilong bihainim laik bilong em tasol.

O gutpela santu Josep! Yu man bilong harim tok, na long dispela as tasol God i makim yu bilong kamap man bilong Maria na papa bilong Jisas! Helpim mipela oltaim long daunim laik bilong mipela yet, na bihainim laik bilong God oltaim!

19

SANTU JOSEP, MAN BILONG BIHAINIM LAIK BILONG GOD

Pasin bilong bihainim laik bilong God i mas kamap nambawan samting insait long laip bilong yumi. Long wanem sapos yumi bihainim laik bilong God, orait yumi bai i go long heven. Sapos yumi bihainim laik bilong yumi yet, orait yumi bai i lus long hel. I no gat narapela rot. Nogat tru. Laik bilong yumi yet i save kisim yumi i go long hel, na laik bilong God i save kisim yumi i go long heven.

Planti taim Buk Baibel i tokim yumi olsem yumi mas bihainim laik bilong God oltaim, long wanem dispela em i nambawan

samting long laip bilong yumi. Taim ol Aposel i askim Jisas long skulim ol long pasin bilong beten, Jisas i skulim ol long beten «Papa bilong mipela», na long dispela prea em i tok: **«Mipela i mas bihainim laik bilong yu [God Papa] long graun olsem ol i save bihainim long heven»** (Matyu 6:10). Jisas i tok klia olsem oltaim yumi mas bihainim laik bilong God! Na yumi mas wok hat bilong bihainim laik bilong God long graun olsem ol ensel na ol santu i save bihainim long heven.

Pasin bilong bihainim laik bilong God em i dua bilong i go insait long heven. I no gat narapela rot. Nogat tru. Laik bilong God tasol i save kisim yumi i go long heven, na laik bilong yumi yet i save kisim yumi i go long hel. Jisas i skulim yumi olsem: *«Yupela i no ken ting, olgeta manmeri i save kolim mi: “Bikpela, Bikpela”, ol bai i go insait long kingdom bilong heven. Nogat. **Man i bihainim laik bilong Papa bilong mi i stap long heven, em tasol bai i go insait long kingdom**»* (Matyu 7:21). Jisas i tok klia olsem ol man na meri i bihainim laik bilong God tasol bai i go long heven, na ol arapela bai i lus long paia bilong hel.

Na Gutnius i stori yumi long wanpela taim ol manmeri i tokim Jisas olsem mama na ol wanblut bilong em i laik lukim em, na Jisas i bekim tok bilong ol olsem: *«Husat em i mama bilong mi? Na husat em i brata bilong mi?» Na [Jisas] em i makim ol disaipel bilong em long han na i tok: «Lukim mama bilong mi wantaim ol brata bilong mi. **Long wanem, man o meri i save bihainim laik bilong Papa***

bilang mi i stap long heven, em i brata na susa na mama bilang mi» (Matyu 12:48-50). Olsem na sapos yumi laik kamap famili bilang Jisas na i stap olsem brata o susa bilang em long heven, orait yumi mas bihainim laik bilang God oltaim. Ol dispela manmeri tasol bai i kisim gutpela pe long heven.

I gat narapela stori tu i stap long Gutnius. Dispela stori i mas mekim yumi i kirap nogut tru. Gutnius i tok olsem long Gut Fonde nait Jisas i go beten long gaden Getsemani, na bel bilang em i hevi tumas. Jisas em i man tru, olsem na em i pret long ol samting bai i kamap long em long Pen na Indai bilang em. Olsem na em i beten long Papa bilang em olsem: *«Papa, sapos yu laik, yu ken rausim dispela kap long mi. Tasol yu no ken bihainim laik bilang mi. Nogat. Yu mas bihainim laik bilang yu tasol»* (Luk 22:42). Dispela prea bilang Jisas i mas kamap eksampel tru bilang olgeta prea bilang yumi! Yumi mas wok hat long bihainim laik bilang God oltaim. Maski yumi pret o yumi tingting planti long bihainim laik bilang God. Jisas em i God tru, tasol em i daunim em yet olgeta na em i bihainim laik bilang Papa bilang em oltaim. Olsem na sapos yumi laik i stap trupela disaipel bilang Jisas, orait yumi tu i mas mekim olsem.

Jisas yet i soim yumi olsem oltaim yumi mas daunim laik na tingting bilang yumi yet. Yumi no ken bihainim tingting bilang yumi yet tasol. Nogat. Laik bilang God i winim laik bilang yumi, na tingting bilang God i winim tru tingting bilang yumi. Olsem

na oltaim yumi mas trastim God na askim em long strongim yumi bilong bihainim gut laik bilong em. Jisas yet i tok: *«God i bin salim mi na mi kam, **na kaikai bilong mi, em long bihainim laik bilong em** na long pinisim wok em i bin givim mi»* (Jon 4:34). Laik bilong God i mas kamap olsem kaikai bilong yumi tu oltaim!

Planti taim ol manmeri i askim Jisas long mekim planti samting, tasol Jisas i save bekim ol olsem em i no kam long graun bilong bihainim laik bilong em yet. Nogat. Em i kam long graun bilong bihainim laik bilong God Papa tasol. Long Gutnius bilong santu Jon em yet i tok: *«Mi no lusim heven na kam daun bilong bihainim laik bilong mi yet. Nogat. **Mi kam daun bilong bihainim laik bilong Papa, em i bin salim mi na mi kam**»* (Jon 6:38).

Sapos yumi skelim laip bilong santu Josep, orait yumi bai i luksave olsem oltaim em i bin bihainim laik bilong God. I no gat wanpela taim santu Josep i bin sakim tok bilong God. Nogat tru. Na tu i no gat wanpela taim santu Josep i bin bihainim tingting bilong em yet. Nogat. God i bin askim planti samting long em, na oltaim em i bin inapim laik bilong God.

God yet i bin makim santu Josep bilong kamap man bilong Maria na papa bilong Jisas. Na santu Josep i akseptim dispela wok wantaim bikipela amamas na bel isi, long wanem em i save pinis olsem God yet bai i helpim em long inapim gut dispela wok. Na bihain God i bin askim Josep long mekim planti sakrifais bilong lukautim Maria na Jisas, na oltaim em i bin redi long harim tok

bilang God na bihainim. Wapela santu i tok olsem oltaim santu Josep i save mekim dispela prea: «God bilang mi, mi laikim yu na mi laik bihainim laik bilang yu oltaim. Yu ken mekim long mi long laik bilang yu tasol». Olsem na santu Josep i no save bihainim laik bilang em yet. Nogat. Em i bin bihainim laik bilang God oltaim. Maski God i askim em long mekim planti sakrifais, o long lusim ples bilang em, o long ranawe na i go long wapela longwe kantri, santu Josep i save bihainim laik bilang God tasol.

Long bigin bilang dispela buk yumi tok olsem Buk Baibel i save kolim santu Josep «*stretpela man*», na long Tok Hibu dispela tok i min olsem «man bilang bihainim laik bilang God oltaim». Sapos santu Josep em i wapela man bilang les, orait God yet bai i no inap makim em olsem papa bilang Jisas na man bilang Maria. Nogat tru. Sapos santu Josep em i wapela man i save bihainim laik bilang em yet oltaim, orait God bai i no inap long trastim Pikinini bilang em yet long em.

Nau yumi skelim yumi yet. Yumi tu i save bihainim laik bilang God oltaim, o yumi save bihainim em wan wan taim tasol? Yumi tu i redi long mekim sakrifais bilang bihainim laik bilang God, o yumi les long mekim sakrifais? Planti taim i save kamap olsem yumi save bihainim laik bilang God long taim yumi painim isi long bihainim. Tasol planti taim i no isi long bihainim laik bilang God, olsem na yumi save givim eskus na lusim ol gutpela pasin yumi sapos long mekim, na yumi bihainim laik bilang yumi yet

tasol. Yumi save redi oltaim long lusim ol samting nogut i save pulim yumi long mekim sin, o nogat? Na long sait bilong lotu, yumi save lotu olsem God yet i askim yumi, o yumi save lotu wan wan taim tasol?

O gutpela santu Josep! Helpim mipela long bihainim laik bilong God oltaim! Strongim mipela, bai mipela i no ken pret long mekim sakrifais! Helpim mipela long i stap aninit long God oltaim, na long harim olgeta tok i kam long maus bilong em!

Sapos yumi bihainim laik bilong God oltaim, orait yumi ken trastim em long kisim yumi i go long heven. Tasol sapos yumi bihainim laik bilong yumi yet, orait yumi mas pret long lus long hel. Jisas yet i tok olsem: «*Yupela i no ken ting, olgeta manmeri i save kolim mi: “Bikpela, Bikpela”, ol bai i go insait long kingdom bilong heven. Nogat. **Man i bihainim laik bilong Papa bilong mi i stap long heven, em tasol bai i go insait long kingdom***» (Matyu 7:21).

20

SANTU JOSEP, MAN BILONG LAIKIM OL ARAPELA MANMERI

Santu Ogastin na santu Tomas bilong Akwainas i tok olsem laik bilong yumi i go long God na laik bilong yumi i go long ol manmeri, em i wanpela samting tasol. I no tupela laikim pasin. Nogat tru. Em i wanpela laikim pasin tasol i save pulim yumi long laikim God na long laikim ol arapela manmeri. Dispela tupela santu i tok olsem: **«Laikim pasin em i olsem san: san em i wanpela tasol, tasol lait bilong em i save karamapim olgeta manmeri. Wankain samting i save kamap long laikim pasin bilong yumi:**

lewa na laikim pasin bilong yumi em i wanpela tasol, tasol em i mas karamapim God na ol arapela manmeri tu». Sapos yumi tok olsem yumi laikim God, tasol yumi les long laikim ol arapela manmeri, orait yumi man na meri bilong giaman.

Laikim pasin i go long God na laikim pasin i go long ol arapela manmeri i save wokabaut wantaim. Na taim laik bilong yumi i go long God i gro na i kamap bikipela, orait laik bilong yumi i go long ol manmeri tu bai i gro na i kamap bikipela moa yet.

Na laik bilong santu Josep i go long God em i bikipela tumas, olsem na laik bilong em i go long ol arapela manmeri tu i bikipela tumas. Santu Maria tasol inap long winim em. Tasol santu Josep i kam bihainim long Maria, na em i winim ol arapela santu.

Na yumi ken luksave long bikipela laik bilong santu Josep i go long ol arapela manmeri long ol samting em i bin mekim bilong helpim Jisas. Long wanem taim Josep i helpim Jisas, orait em i helpim yumi yet, long wanem Jisas em Ridima na Sevia bilong yumi. **Na sakrifais em i wanpela bikipela mak bilong laikim pasin.** Sapos yumi no redi long mekim sakrifais bilong helpim wanpela man o meri, orait yumi no laikim tru dispela man o meri. Tasol sapos yumi mekim sakrifas na yumi karim hevi bilong helpim ol arapela manmeri, orait laikim pasin bilong yumi em i trupela na i stret.

Santu Josep i laikim tumas ol manmeri, olsem na em i laik long olgeta manmeri i kam long Jisas na i save long em. Josep i save pinis

olsem Jisas i kam long graun bilong kisim bek ol manmeri, olsem na em i amamas long ol manmeri i kam long Jisas na adorim em. Olsem na em i soim Jisas long ol wasman bilong sipsip, na i stori long ol long ol samting em i bin harim long maus bilong ensel. Josep i tokim ol olsem dispela liklik bebi em i Ridima bilong ol manmeri, na em i bin kam bilong kisim bek yumi. Santu Josep i soim Jisas long ol saveman bilong hap sanmakap, na em i amamas long tokim ol olsem ol i no ken pret long wanpela samting, long wanem bebi Jisas i kam bilong helpim yumi. Santu Josep i amamas long toktok wantaim ol lain bilong Isip long ol samting i bin kamap long Betlehem, na em i tokim ol olsem dispela pikinini i kam long graun bilong opim dua bilong heven long yumi. Na taim ol i kam bek long Nasaret, orait santu Josep i amamas long ol manmeri i laik lukim Jisas na harim ol toktok i kam long maus bilong em, long wanem Josep i save pinis olsem Jisas em Ridima bilong ol manmeri.

Narapela bikpela mak bilong laikim pasin bilong santu Josep i go long ol manmeri i olsem: santu Josep i no bekim rong long ol manmeri i mekim rong long em. Pasin bilong lusim ol rong em i bikpela samting long ai bilong God, na i soim olsem laik bilong yumi i go long ol arapela manmeri em i tru olgeta! Taim santu Josep i lusim kantri Isip na i go bek long ples Nasaret, orait em i no krosim ol wantok bilong em long Betlehem long ol pasin nogut ol i bin mekim long em, taim ol i givim baksait long santu

Maria na i les long helpim em. Em i pre tu bilong helpim ol birua bilong Jisas, long wanem em i save pinis long ol tok profet bilong bipo i tok olsem ol bai i kilim Mesaia i dai. Santu Josep i no bel nogut long wangepela man o meri long laip bilong em. Nogat tru. Em i laikim na pogivim ol arapela manmeri, na em i wok hat bilong helpim ol long ol samting ol i sot long em.

Na narapela bikpela mak bilong laikim pasin bilong santu Josep i go long ol manmeri em i olsem: oltaim em i save helpim ol tarangu na ol manmeri i sot long ol samting. Taim ol saveman bilong hap sankamap i kam lukim Jisas, orait ol i bin givim gol, gutpela sanda na insens long santu Josep olsem presen. Na planti santu na saveman bilong Sios i tok olsem santu Josep i bin tilim ol dispela presen namel long ol tarangu na long ol manmeri i sot long planti samting. Santu Josep i laik helpim ol manmeri i sot long ol samting, olsem na em i no tingting long hipim hipim planti samting. Nogat tru. Wanem samting em i gat, orait em i save tilim wantaim ol tarangu. Santu Josep i save trastim God oltaim, olsem na em i no tingting long ol samting bilong dispela graun, long wanem em i save pinis olsem God yet i save lukautim yumi. Wangepela saveman bilong Sios i tok: «Santu Josep em i olsem papa bilong ol tarangu na bilong ol manmeri i sot long ol samting. Em i save helpim olgeta manmeri i kam long em, maski em yet i no gat planti samting. Em i save mekim amamas ol manmeri i bel hevi. Em i givim strong long ol manmeri i wik long sol bilong ol.

Em i save helpim ol manmeri bilong sin long kam bek long God. Na em i save kamapim bel isi na gutpela sindaun namel long ol manmeri bilong ples i save pait na kros».

Orait, nau yumi toktok liklik long laikim pasin bilong yumi yet. Laikim pasin bilong yumi i wankain olsem laikim pasin bilong santu Josep, o nogat? Yumi save laikim ol arapela manmeri wankain olsem santu Josep i bin laikim ol, o nogat? Yumi save laikim yumi yet moa long yumi laikim ol arapela manmeri, o yumi save laikim ol wankain olsem yumi save laikim yumi yet? Yumi save mekim sakrifais bilong helpim ol arapela manmeri, o nogat? Yumi save lusim rong bilong ol birua bilong yumi, o nogat? Oltaim yumi mas skelim ol pasin bilong yumi, na senisim ol pasin nogut i save egensim laik bilong God.

Oltaim yumi mas bihainim laikim pasin bilong santu Josep. Planti taim yumi painim hat long serim ol samting bilong yumi wantaim ol tarangu na ol manmeri i askim yumi long halivim ol. Tasol yumi mas trastim God wankain olsem santu Josep i bin trastim, na yumi no ken givim eskus long ol manmeri i askim yumi long helpim ol.

Pasin bilong pogivim rong bilong ol manmeri em i bikpela samting tru long ai bilong Jisas! Em yet i tok: *«Harim. Sapos yupela i lusim rong bilong ol arapela manmeri, orait Papa bilong yupela long heven em bai i lusim rong bilong yupela tu. Tasol sapos yupela i no lusim rong bilong ol arapela manmeri, orait Papa bilong yupela em tu*

bai i no lusim ol rong bilong yupela» (Matyu 6:14-15). Olsem na yumi mas skelim yumi yet nau. Yumi save lusim rong bilong ol arapela manmeri o nogat? Yumi save lusim ol rong hariap o yumi save pulim kros longpela taim? Yumi save tok baksait long ol manmeri i mekim rong long yumi, o nogat? Yumi save bekim rong long ol, o nogat? O gutpela wasman bilong mipela, santu Josep! Helpim mipela long bihainim marimari bilong yu oltaim!

Narapela bikpela samting i olsem: wok aposel. Yumi save mekim wok aposel bai olgeta manmeri i ken save long Jisas, o nogat? Santu Josep i bin soim Jisas long olgeta manmeri, long wanem em i laik long ol i ken save long Jisas. Yumi save toktok wantaim ol arapela manmeri long ol samting Jisas i bin mekim bilong helpim yumi, o nogat? Yumi save soim bilip bilong yumi long ol arapela manmeri, o sampela taim yumi save sem na haitim bilip bilong yumi?

O dia santu Josep! Helpim mipela long bihainim laikim pasin bilong yu oltaim! Mipela i laik bihainim yu! Mipela i laik laikim God na ol arapela manmeri wantaim olgeta strong bilong mipela!

21

SANTU JOSEP, MAN BILONG KLINPELA PASIN

Buk Baibel i tok olsem: *Josep, em i stretpela man* (Matyu 1:19). Yumi save pinis olsem santu Matyu i bin raitim Gutnius bilong em long Tok Hibru, em i tok ples bilong ol Juda. Na long tok ples bilong ol Juda dispela tok «*stretpela man*» i min olsem «man i pulap long ol gutpela pasin». Olsem na Buk Baibel yet i tok olsem santu Josep i pulap long ol gutpela pasin. Santu Jon Krisostom i tok: «**Dispela tok “*stretpela man*” i min olsem santu Josep i bin pulap tru long olgeta gutpela pasin na em i stret olgeta long ai bilong God**». Na klinpela pasin em i wanpela pasin i bin i stap oltaim long sol bilong santu Josep.

Long Nupela Testamen i gat planti eksampel i soim yumi olsem God i laikim tumas ol pasin i klin, na em i laikim tumas ol manmeri i bihainim klinpela pasin. Jisas yet i tok olsem sapos yumi laik go long heven, orait yumi mas bihainim klinpela pasin. Em yet i tok: «***Ol manmeri bel bilong ol i klin, em ol i ken amamas. Bai ol i lukim God***» (Matyu 5:8).

Ol manmeri i bihainim klinpela pasin i kamap olsem ol ensel, long wanem ol ensel i klin olgeta. Jisas yet i tok: «*Long taim ol man i dai pinis ol i kirap bek, ol dispela lain manmeri bai i no inap marit. Nogat. Bai ol i stap olsem ol ensel bilong heven*» (Matyu 22:30). Ol ensel i klin olgeta, long wanem ol i spirit tasol, olsem na ol i no gat bodi bilong mekim pasin i doti. Tasol ol klinpela manmeri i save winim ol pasin i doti na ol traim bilong Satan, olsem na long laik bilong ol yet ol i save kamap klin na i stap olsem ol ensel.

Na taim God i kamap man na Jisas i kam long graun, orait em yet i bin soim yumi olsem klinpela pasin em i bikpela samting tru long ai bilong em. Jisas yet i bin bihainim klinpela pasin oltaim, long wanem em yet i God tru olsem na em i no inap long mekim sin. Santu Maria i bin i stap virgo, na God Papa yet i makim em bilong kamap mama bilong Jisas. Santu Josep tu i bin i stap virgo, na God Papa yet i makim em bilong kamap papa bilong Jisas. Santu Jon bilong Baptais i bin i stap virgo na i bin bihainim klinpela pasin oltaim, na Jisas i laikim em tumas, na Jisas i tok olsem Jon bilong Baptais i winim ol profet na ol santu bilong

Olpela Testamen. Santu Jon Aposel tu i bin i stap virgo, na Gutnius i kolim em «*dispela disaipel Jisas i save laikim tumas*» (Jon 13:23). Na taim Jisas i dai long diwai kros, orait em i givim mama bilong em Maria long santu Jon, long wanem Jisas i laikim Jon tumas long klinpela pasin bilong em (Jon 19:25-27).

Ol man na meri i bin bihainim klinpela pasin i stap antap tru long heven, long wanem taim ol i bin i stap yet long graun, ol i bin winim ol traim nogut bilong Satan na ol laik nogut bilong bodi. Buk bilong Revelesen i tok olsem long heven i gat wanpela song ol virgo tasol i save long em, na ol arapela santu i no save. Long Buk bilong Revelesen santu Jon i tok: «*Na mi harim gutpela nois i kam long heven, em i olsem nois bilong bikipela wara i pairap, na olsem bikipela nois bilong klaut i pairap. Mi harim dispela nois em i olsem musik. Em i olsem ol man i paitim gita na musik i kamap. Ol dispela manmeri i sanap long pes bilong sia king bilong God (...) ol i singim wanpela nupela song. (...) Ol tasol inap long kisim save long dispela song. **Na i no gat narapela man moa inap kisim save long em. Dispela ol man ol i no bin slip wantaim ol meri na kamap doti. Nogat. Ol i stap klin tru***» (14:1-4). Dispela tok i kam long Buk bilong Revelesen i soim yumi olsem God i save givim spesel pe long heven long ol manmeri i save bihainim klinpela pasin taim ol i stap long graun.

Santu Maria i go pas long ol virgo na long ol manmeri i bihainim klinpela pasin. Em i winim ol, long wanem sol bilong santu Maria

i klin olgeta na i pulap long grasia. Na God i laikim tumas sol bilong Maria, na God i laik lukautim gut dispela klinpela pasin bilong Maria. Olsem na God i makim husat bilong was long santu Maria? Santu Josep. God yet i bin makim santu Josep bilong lukautim sol na bodi bilong Maria, bai tupela i ken i stap virgo na bihainim klinpela pasin inap long indai bilong tupela. Na bai santu Josep i ken inapim gut dispela wok, orait God i bin pulapim em long planti grasia na blesing i winim tru ol grasia na blesing em i bin givim long ol arapela santu.

Jisas yet i tok olsem ol manmeri bilong klinpela pasin tasol bai inap long lukim God. Orait santu Josep i lukim God olgeta de bilong laip bilong em, long wanem em i stap long haus wantaim Jisas, na Jisas em i God tru. Na dispela samting i soim yumi olsem Jisas tu i amamas long klinpela pasin bilong santu Josep, long wanem sapos santu Josep i no bihainim klinpela pasin, orait God bai i no makim em bilong kamap papa bilong Jisas.

Santu Josep em i klin olgeta, na long dispela as God Papa i bin makim em bilong lukautim pikinini Jisas. Na santu Josep i bin holim bebi Jisas long han bilong em planti taim tumas. Santu Josep i bin slip wantaim bebi Jisas. Santu Josep i bin pilai wantaim bebi Jisas. Santu Josep i bin wasim bebi Jisas. Santu Josep i bin i stap olgeta de bilong laip bilong em wantaim Jisas, olsem na sol bilong em i klin olgeta, na klinpela pasin bilong em i winim tru klinpela pasin bilong ol arapela santu.

Santu Fransis bilong Sales i tok: «Klinpela pasin bilong santu Josep i winim tru klinpela pasin bilong ol santu na ol ensel, long wanem God yet i bin pulapim santu Josep long klinpela pasin, bai em i ken i stap virgo oltaim, na bai em i ken kamap gutpela na klinpela man bilong Maria, na gutpela na klinpela papa bilong Jisas». Na narapela santu i tok: **«Klinpela pasin bilong santu Josep i winim tru klinpela pasin bilong ol serafim bilong heven**, long wanem God Triwan yet i bin makim em bilong kamap man bilong santu Maria i klin olgeta, na tu bilong kamap papa bilong Jisas».

Nau yumi skelim klinpela pasin bilong yumi yet. Yumi save bihainim klinpela pasin oltaim, o wan wan taim tasol? Yumi save abrusim ol pren nogut na ol samting nogut i pulim yumi long mekim pasin doti, o nogat? Sapos nogat, orait i no longtaim yumi tu bai i pundaun long sin i doti na grasia bilong God insait long sol bilong yumi bai i bagarap olgeta. Klinpela pasin i no isi long bihainim, olsem na oltaim yumi mas sanap strong na sakim ol traim bilong Satan na ol laik nogut bilong bodi bilong yumi tu. **Na sapos yumi laik i stap klin long ai bilong God, orait yumi mas redi long mekim sakrifais na penans, long wanem i no gat narapela rot bilong bihainim klinpela pasin.** Nogat tru. Yumi mas redi long sanap strong na pait wantaim Satan na daunim ol laik nogut bilong bodi bilong yumi. Jisas yet i tok: ***«Sapos han bilong yu o lek bilong yu i pulim yu long mekim sin, orait yu***

mas katim na tromoi i go. Mobeta yu gat wanpela han tasol, o wanpela lek tasol, na yu kisim laip bilong i stap oltaim. Nogut yu gat tupela han o tupela lek na ol i tromoi yu i go long paia i no save dai. ***Na sapos ai bilong yu i pulim yu long mekim sin, orait yu mas kamautim na tromoi i go.*** Mobeta yu gat wanpela ai tasol na yu kisim laip bilong i stap oltaim. Nogut yu gat tupela ai na ol i tromoi yu i go long paia bilong hel» (Matyu 18:8-9).

O gutpela Jisas! Helpim mipela tu long bihainim klinpela pasin na long winim ol traim bilong Satan na ol laik nogut bilong bodi! Helpim mipela long taim mipela i laik pundaun long sin i doti!

O gutpela mama bilong mipela, santu Maria! Helpim mipela long i stap klin long ai bilong God, wankain olsem yu na man bilong yu i bin i stap klin olgeta!

O gutpela santu Josep, yu was santu bilong mipela! Yu bin i stap virgo oltaim na yu bin lukautim santu Maria olsem gutpela man bilong em. Lukautim mipela tu, na helpim mipela long bihainim klinpela pasin oltaim!

22

SANTU JOSEP I STAP VIRGO OLTAIM

Taim santu Maria em i yangpela yet, em i bin mekim promis long God long em bai i stap virgo oltaim. Na Tradisen bilong Katolik Sios i tok olsem **santu Josep i bin bihainim meri bilong em, Maria, na em tu i bin mekim promis long God long i stap virgo oltaim.**

Olsem na God i makim wanpela man i virgo, bai em i ken lukautim Virgo Maria na pikinini Jisas. Santu Jerom i tok: «Planti manmeri i save tok olsem santu Maria i no bin i stap virgo oltaim, na em i bin karim arapela pikinini tu. Tasol mi tok klia olsem: **dispela toktok em i rong olgeta, long wanem santu Maria na**

santu Josep i bin i stap virgo oltaim. Sampela manmeri i tok olsem santu Josep em i wanpela man bipo i bin marit, na bihain em i bin kisim Maria olsem meri bilong em, olsem na sampela manmeri i tok olsem santu Josep i gat narapela pikinini tu. **Dispela toktok tu em i rong olgeta, long wanem Buk Baibel i no toktok long dispela samting.** Maski santu Josep em i trupela man bilong Maria na tupela i stap wantaim long haus, oltaim santu Josep i bin rispektim meri bilong em, na tupela wantaim i bin i stap virgo na i bihainim klinpela pasin inap long indai bilong tupela». Yumi ol Katolik i mas sanap strong long dispela tok i kam long Tradisen bilong Sios, long wanem santu Maria na santu Josep i bin bihainim klinpela pasin oltaim, na ol i no bin kamapim ol pikinini. Nogat tru. Jisas tasol em i pikinini bilong santu Maria na santu Josep, na Holi Spirit tasol i mekim Maria i kisim bel.

Santu Ogastin na santu Tomas bilong Akwainas i mekim wankain toktok olsem santu Jerom, na tupela i bikpela Tisa na saveman bilong Sios. Tupela i sanap strong long dispela toktok, na tupela i tok klia olsem **santu Josep em i wanpela stretpela man i bin mekim promis long God long em bai i stap virgo oltaim.** Santu Pita Demian tu i tok: «Maria i bin i stap virgo oltaim. Jisas i bin i stap virgo tu. Na Jisas i givim Maria long santu Jon Aposel olsem mama bilong em, long wanem santu Jon tu i bin i stap virgo. Olsem wanem na planti manmeri i save tok olsem santu Josep i no virgo? Santu Josep tu i bin i stap virgo,

long wanem God yet i bin makim em bilong lukautim Virgo Maria. Olsem na mama bilong Jisas em i virgo. Jisas yet em i virgo. Papa bilong Jisas em i virgo. Na dispela disaipel Jisas i laikim em tumas tu em i virgo tu».

Dispela pasin bilong i stap virgo oltaim em i no wanpela samting olgeta manmeri i ken mekim. Nogat. God i save makim wan wan man na meri tasol bilong bihainim dispela pasin. Planti manmeri i save marit na lusim pasin virgo ol, na dispela tu em i gutpela tru long ai bilong God. Pasin bilong marit na kamapim ol pikinini em i bikipela samting tru na i gutpela long ai bilong God. God yet i bin putim dispela laik bilong marit na kamapim ol pikinini insait long ol man na meri, olsem na em i gutpela na i stret long planti manmeri i marit na kamapim ol gutpela famili. God i save amamas long ol gutpela papa na mama i save kamapim planti pikinini! Tasol pasin bilong i stap virgo em i bikipela moa yet, long wanem yumi givim lewa bilong yumi wantaim bodi bilong yumi long God tasol. Santu Pol yet i tok olsem pasin bilong i stap virgo i winim pasin bilong marit. Tasol em yet i tok olsem wan wan man na meri tasol inap long bihainim dispela pasin, long wanem i no isi. Sapos God i no strongim yumi, orait yumi bai i no inap long i stap virgo oltaim. Tasol sapos God i kirapim tingting insait long bel bilong yumi na em i askim yumi long i stap virgo, orait em yet bai i strongim yumi long bihainim gut dispela pasin inap long indai bilong yumi.

O gutpela santu Josep! Yu bin bihainim meri bilong yu na yu tu i bin mekim promis long God long i stap virgo oltaim! Planti taim i no isi long bihainim klinpela pasin, tasol long strong bilong God yumi bai inap! Long strong bilong yumi yet, yumi bai i pundaun long sin. Tasol long strong bilong God, yumi inap long bihainim klinpela pasin inap long indai bilong yumi!

O gutpela wasman bilong mipela! Helpim mipela long bihainim klinpela pasin oltaim! Helpim ol pris na sista na brata long bihainim gut ol promis ol i bin mekim long God! Na helpim tu ol papa na mama long bihainim pasin marit olsem God yet i laikim ol long bihainim!

23

SANTU JOSEP, MAN BILONG PREA

Plantai taim Buk Baibel i save tok olsem yumi mas beten oltaim long God. Na em i tru, long wanem dispela pasin em i bikpela samting tru long ai bilong God. Na tu long wanem dispela pasin i save helpim yumi long go long heven. Tasol planti taim i save kamap olsem planti manmeri i no klia long prea em i wanem samting. Na tu planti manmeri i no save gut long rot bilong mekim gutpela prea. Olsem na long dispela sapta yumi bai i toktok liklik long dispela samting.

Pasin bilong beten em i wanem samting? Pasin bilong beten em i pasin bilong tingting long God na toktok wantaim em long lewa

bilang yumi. Yumi toktok wantaim em insait long bel bilang yumi, wankain olsem yumi save toktok wantaim ol pren bilang yumi.

Na taim yumi toktok wantaim God, orait yumi mas mekim 4-pela samting: **1) Namba wan samting**, yumi mas adorim em, long wanem em i God tru na Bikpela bilang heven na graun. **2) Namba 2**, yumi mas tok tenkyu long em long olgeta gutpela samting em i save givim long yumi. **3) Namba 3**, yumi mas tok sori long em long ol sin na rong bilang yumi. **4) Namba 4**, yumi mas askim em long givim ol samting yumi sot long em. Sapos yumi mekim dispela 4-pela samting, orait yumi ken tok olsem prea bilang yumi i kamap gut.

Santu Alfons i tok: «**Man o meri i save beten, bai i go long heven. Man o meri i no save beten, bai i lus olgeta**». Olsem na yumi mas beten olgeta de, na yumi mas winim lespasin bilang yumi, nogut Satan i pulim yumi long lusim prea na bihain yumi tu i lus long hel.

Pasin bilang beten em i isi tumas long mekim. Maski yumi no gat bikpela save, olsem ol saveman. Maski yumi no pinisim skul o yumi no save gut long rait na rit. Pasin bilang beten em i isi, long wanem yumi mas toktok insait long bel bilang yumi tasol. Na yumi mas autim olgeta samting i kam long bel bilang yumi. Yumi mas putim long han bilang God olgeta amamas na wari i stap long bel bilang yumi. Yumi mas stori wantaim em na serim ol samting i save kamap insait long bel bilang yumi.

Santu Josep em i eksampel bilong beten, long wanem oltaim sol bilong em i pas wantaim God. Santu Josep i pulap long olgeta grasia na blesing i kam long God, olsem na oltaim em i tingting long God na i toktok wantaim em. Em i gat God long haus bilong em olgeta de! Jisas em i God tru, na oltaim santu Josep i toktok wantaim em! Taim santu Josep i holim bebi Jisas long han bilong em, em i toktok wantaim Jisas. Na dispela pasin bilong toktok wantaim Jisas em i pasin bilong beten! Maski Jisas em i liklik bebi, Jisas em i God tru olsem na em inap long harim olgeta toktok i kam long maus bilong papa bilong em. Oltaim sol bilong Josep i pas long God, olsem na oltaim em i wok long mekim prea.

Buk Baibel i tok olsem God i save harim ol prea bilong ol manmeri bilong daunpasin. Orait daunpasin bilong santu Josep i winim daunpasin bilong ol arapela santu! Olsem na oltaim God i save harim ol prea bilong em! **Buk Baibel i tok olsem God i save harim ol prea bilong ol manmeri bel bilong ol i klin.** Orait klinpela pasin bilong santu Josep i winim klinpela pasin bilong ol arapela santu! Olsem na oltaim God i save harim olgeta singaut bilong em. **Buk Baibel i tok olsem God i save harim ol prea bilong ol manmeri i laikim em.** Orait laikim pasin bilong Josep i go long God i winim tru laikim pasin bilong ol arapela santu! Olsem na prea bilong santu Josep i winim tru prea bilong ol arapela ensel na santu bilong heven.

Sol bilong santu Josep i klin olgeta na i no gat wanpela sin long em. Olsem na taim santu Josep i beten long God, God i amamas

tumas long harim ol prea bilong em. Sin tasol i save pulim yumi i go longwe long God, tasol sapos sol bilong yumi i no gat sin, orait yumi pas tru wantaim em. Olsem na sol bilong Josep i pas oltaim wantaim God Triwan.

Na yumi olsem wanem? Planti taim yumi no save beten gut. Planti taim yumi no save givim taim bilong yumi long God, long wanem yumi save bisi long ol samting bilong graun, olsem na yumi givim eskus long em. Santu Teresia i tok: «Mi laik go antap long wanpela maunten na i singaut strong long ol manmeri bilong graun olsem: “Beten! Beten! Yupela i mas beten oltaim! **Long wanem man o meri i save beten, God bai i kisim em i go long heven! Na man o meri i givim eskus, em bai i lus long kot!**».

Olsem na sapos yumi laik beten gut, orait yumi mas mekim 3-pela samting pastaim:

Namba wan samting, yumi mas klinim sol bilong yumi, long wanem God i save amamas long harim ol prea bilong ol manmeri sol bilong ol i klin. Olsem na sapos yumi luksave olsem sol bilong yumi i no klin tumas, orait yumi mas konpes na tok sori long Jisas long ol sin bilong yumi, bai em i ken tekewe ol sin bilong yumi, na sol bilong yumi i ken kamap klin gen.

Namba 2 samting, yumi mas painim bel isi na painim tu wanpela ples i no gat planti nois, long wanem sapos yumi no bel isi na i gat planti nois nabaut, orait em bai i hat long yumi konsentreit gut.

Namba 3 samting, yumi mas prea bilong givim ona long em tasol. I no gutpela long yumi beten bilong askim askim tasol. Nogat. Yumi mas tingting pastaim long givim ona long em, na ol arapela samting bai i kam bihain. Jisas yet i tok: *«Tasol namba wan samting yupela i mas mekim i olsem. Yupela i mas larim God i stap king bilong yupela, na kisim stretpela pasin bilong em, na bai em i givim dispela olgeta arapela samting tu long yupela»* (Matyu 6:33).

Pasin bilong beten em i bikpela samting tumas, long wanem Jisas yet i bin givim eksampel long yumi. Na em yet i bin askim yumi long beten oltaim. Jisas i tok: *«Sapos yupela i mekim prea na i beten long kisim wanpela samting, na sapos yupela i bilip tru olsem, yupela bai i kisim dispela samting, orait mi tokim yupela, dispela samting bai i kamap olsem yupela i tok»* (Mak 11:24).

Planti ol santu i save tok olsem sapos yumi laik long prea bilong yumi i karim kaikai, orait yumi mas inapim 3-pela samting:

1) Yumi mas beten wantaim bikpela bilip na konpidens. Bilip na konpidens em i bikpela samting long taim bilong beten, long wanem yumi no save trastim yumi yet. Nogat. Yumi trastim Jisas tasol na ol promis bilong em. Em yet i tok: *«Yupela i mas prea na askim God long givim ol samting long yupela, na em bai i givim long yupela. Yupela i mas wok long painim samting na bai yupela i lukim. Yupela i mas paitim dua, na God bai i opim long yupela. Olgeta man i prea long God, ol i save kisim ol samting. Man i wok long painim samting, em i save lukim. Na man i paitim dua,*

God bai i opim dua long em» (Matyu 7:7-8). Olsem na oltaim yumi mas trastim dispela bikpela promis Jisas yet i bin mekim!

2) Yumi mas beten wantaim daunpasin. Daunpasin i save mekim ol prea bilong yumi i kamap long God. Long Gutnius bilong santu Luk i gat tok piksa bilong tupela man i prea long God (Luk 18:9-14), na Jisas yet i tok olsem God Papa i bin harim prea bilong man i bin daunim em yet, na em i les long harim prea bilong man i litimapim nem bilong em yet.

3) Yumi mas beten olgeta de. Dispela em i bikpela samting tu. Jisas yet i tok olsem yumi mas beten olgeta de, na yumi no ken lusim hop. Sapos yumi go het long beten, orait i no longtaim God Papa bai i harim olgeta prea bilong yumi. Jisas yet i tok: *«Ol manmeri God i bin makim bilong em yet, na ol i wok long krai long em long olgeta de na long olgeta nait, ating God bai i no helpim ol, a? Ating em bai i wet wet na i no helpim ol kwik, a? Nogat tru. **Mi tokim yupela, em bai i helpim ol kwiktaim»*** (Luk 18:6-8).

Olsem na yumi mas bihainim pasin bilong santu Josep, na beten olgeta de bilong laip bilong yumi. Yumi mas askim em tu long skulim yumi long prea gut.

O gutpela santu Josep, yu gutpela wasman bilong mi! Mi laik sevim sol bilong mi na go long heven! Olsem na tude mi askim yu long helpim mi long beten gut na long winim lespasin bilong mi oltaim! Mipela tu i laik kamap man na meri bilong prea wankain olsem yu!

24

SANTU JOSEP, MAN BILONG TRUPELA DEVOSEN

Devosen em i wanem samting? **Devosen em i pasin bilong bihainim hariap laik bilong God oltaim**, long wanem yumi save olsem dispela pasin i save givim ona na glori long God. Sapos yumi bihainim laik bilong God olgeta taim, orait yumi ken tok olsem devosen bilong yumi i bikpela tru. Na sapos yumi no bihainim laik bilong God oltaim, orait maski yumi mekim planti beten na ritim planti buk bilong Jisas, devosen bilong yumi i liklik tru.

Trupela devosen i save kam long Holi Spirit yet, long wanem Holi Spirit tasol inap long helpim yumi long bihainim laik

bilang God oltaim. Na Holi Spirit i save kamapim devosen insait long yumi taim em i lukim olsem yumi laikim God wantaim olgeta strong bilang yumi na yumi laik bihainim em gut. Tasol planti taim Holi Spirit i laik kirapim trupela devosen insait long sol bilang yumi, **tasol yumi yet i no larim em long mekim dispela samting, long wanem hat bilang yumi i pas yet long planti samting bilang dispela graun.** Na tu planti taim yumi laik bihainim laik bilang yumi tasol, na yumi painim hat long bihanim laik bilang God.

Orait, santu Josep i bihainim laik bilang God oltaim, olsem na devosen bilang em i bikpela tru. Sol bilang santu Josep i pulap tru long Holi Spirit, olsem na oltaim em i painim amamas long daunim laik bilang em yet na bihainim laik bilang God hariap tasol. Pastaim yumi bin tok olsem santu Josep i bin i stap aninit long God oltaim, na oltaim em i bihainim olgeta tok i kam long maus bilang God. Olsem na dispela samting i soim yumi olsem devosen bilang em i bikpela tru na i winim devosen bilang ol arapela santu.

Oltaim santu Josep i bin bihainim hariap laik bilang God. I no gat wanpela taim santu Josep i bin bihainim laik bilang em yet tasol. Nogat tru. I no gat wanpela taim santu Josep i bin givim eskius long God. Nogat. Oltaim santu Josep i bin harim olgeta tok i kam long maus bilang God, na oltaim em i bin amamas long bihainim laik bilang God.

Long Buk Baibel yumi inap painim planti eksampel i soim yumi olsem devosen bilong santu Josep i bikpela tru. Taim ensel i tokim em long kisim Maria olsem meri bilong em na lukautim bebi Jisas, wantu tasol em i bihainim dispela tok. Taim santu Maria i go lukim kandere bilong em Elisabet, wantu tasol Josep i poromanim em na helpim em long dispela longpela wokabaut. Taim ensel i tokim em olsem em i mas ranawe wantaim Maria na bebi Jisas na i go long kantri Isip, wantu tasol em i bihainim laik bilong God. Taim ensel i tokim em olsem ol i mas kam bek long kantri Isip, wantu tasol em i bin harim tok bilong ensel. Na taim Holi Famili i sindaun pinis long Nasaret, oltaim santu Josep i bin wok hat bilong inapim laik bilong God na bilong lukautim gut pikinini Jisas wantaim mama bilong em.

Sakrifais em i bikpela samting insait long trupela devosen. Sapos yumi no redi long mekim sakrifais bilong bihainim laik bilong God, orait devosen bilong yumi i no trupela. Yumi giaman tasol. **Pasin bilong mekim sakrifais em i wanpela mak i soim olsem devosen bilong yumi i trupela long ai bilong God.** Long wanem planti taim i no isi long bihainim laik bilong God. Planti taim yumi painim hat long bihainim gut ol mandato na lo bilong God. Tasol sapos yumi mekim sakrifais, orait yumi bai inap long bihainim ol gut. Tasol sapos yumi no mekim sakrifais, orait i no longtaim yumi bai i lusim laik bilong God na yumi bai i bihainim laik bilong yumi yet tasol.

Na santu Josep em i man bilong mekim planti sakrifais. **Olgeta samting God i bin askim em long mekim i no isi.** Nogat tru. Santu Josep i bin amamas long bihainim laik bilong God, tasol yumi mas save olsem em i bin mekim planti sakrifais bilong inapim gut laik bilong God. I no isi long akseptim dispela wok bilong papa bilong Pikinini bilong God. I no isi long wokabaut long ples wesaning na poromanim meri bilong em i go long taun Hebron. I no isi long wokabaut wantaim santu Maria i gat bel na i go long ples Betlehem. I no isi long kisim meri bilong em wantaim liklik bebi Jisas na i wokabaut planti de aninit long bixan long ples wesaning na i ranawe na i go long Isip. I no isi long sindaun long ples Isip na i stap longwe long trupela ples bilong em long Nasaret. I no isi long mekim ol dispela samting. Nogat tru. Santu Josep i painim hat planti taim, tasol em i no komplein. Nogat. Em i no givim eskus long God. Nogat. Em i bin amamas long mekim ol dispela samting, maski em i mas mekim planti sakrifais.

Orait na devosen bilong yumi i olsem wanem? Yumi save bihainim laik bilong God oltaim, o nogat? Yumi save mekim sakrifais bilong givim glori long God, o nogat? Olgeta toktok, tingting na pasin bilong yumi i save bihainim laik bilong God, o nogat?

Jisas yet i tok: «*Olgeta gutpela diwai i save karim gutpela kaikai. Na diwai nogut i save karim kaikai nogut*» (Matyu 7:17). Dispela tok bilong Jisas tasol em i as bilong skelim devosen bilong

yumi. Sapos mi gutpela diwai, orait ol pasin bilong mi bai i stret. Sapos mi diwai nogut, orait planti pasin bilong mi bai i no stret. Olsem na nau yumi mas skelim ol pasin bilong yumi, na yumi bai i luksave yumi wanem kain diwai. Sapos ol pasin bilong yumi i stret, orait devosen bilong yumi i trupela long ai bilong God. Tasol sapos planti pasin bilong yumi i no stret, i min olsem yumi giamanim yumi yet na devosen bilong yumi em i samting nating.

Planti taim i save kamap olsem yumi save statim ol gutpela wok, tasol i no longtaim yumi painim hat long go het, olsem na yumi save les na lusim ol gutpela wok yumi bin statim. Na planti taim yumi save mekim ol gutpela wok, tasol yumi no save putim olgeta strong bilong yumi na bel bilong yumi tu long dispela wok. Yumi save hat liklik tasol, olsem na yumi no save mekim gut ol samting. Olsem na yumi mas wok hat bilong bihainim laik bilong God hariap oltaim! Maski long givim eskus long God! Yumi mas winim lespasin bilong yumi na bihainim laik bilong God tasol. Laik bilong yumi planti taim i save egensim laik bilong God, olsem na oltaim yumi mas redi long mekim sakrifais bilong daunim yumi yet na bihainim God tasol.

Long Buk Baibel i gat planti stori bilong ol gutpela man i bin bihainim hariap laik bilong Jisas, na tu bilong ol man bilong les i bin givim eskus long Jisas. Gutnius i stori long yumi long laip stori bilong ol Aposel, na i soim yumi olsem wantu tasol ol i bin bihainim Jisas. Santu Pita tupela Andru i bisi long kisim pis, tasol

ol i lusim bot bilong ol na bihainim Jisas. Santu Jon tupela Jems tu i bisi long bisnis bilong ol, tasol wantu tasol ol i lusim bisnis na papamama bilong ol na i bihainim Jisas. Santu Matyu tu, em i sindaun i stap long ples bilong wok, na taim Jisas i singautim em, wantu tasol em i lusim olgeta samting na i bihainim Jisas. Na ol dispela man i kamap bikpela santu insait long Sios, long wanem ol i no bin givim eskus long Jisas. Tasol long Gutnius i gat stori bilong sampela ol man i bin givim eskus long Jisas, na ol i les long bihainim em. Wanpela i tok olsem em i bisi, long wanem em i mas planim papa bilong em pastaim. Narapela i tok olsem em i gat planti mani samting, olsem na em i les long kamap tarangu olsem Jisas. Olsem na ol dispela man i no santu, na yumi no save wanem samting i bin kamap bihain long laip bilong ol.

Olsem na sapos yumi laik kamap santu, orait devosen bilong yumi i mas trupela, na yumi mas bihainim laik bilong God hariap! Sapos yumi givim eskus long em, orait devosen bilong yumi em i samting nating, olsem na yumi bai i stap manmeri nating long ai bilong em, wankain olsem ol dispela man bilong les Gutnius i toktok long ol.

O gutpela santu Josep! Strongim mipela, bai mipela tu i ken redi oltaim long mekim sakrifais bilong bihanim laik bilong God! Helpim mipela long winim lespasin bilong mipela! Mipela tu i laik bihainim hariap olgeta toktok i kam long maus bilong God!

25

SANTU JOSEP, MAN BILONG STRONG

Strong bilong bodi em i samting nating long ai bilong God. God i no save skelim ol masel o mit bilong ol manmeri. Nogat tru. **Long dispela sapta yumi toktok long strong bilong sol tasol.** Long wanem i no strong bilong bodi bai i kisim yumi i go long heven. Nogat tru. Strong bilong sol tasol inap long helpim yumi long go long heven. Long wanem **strong bilong sol i save helpim yumi long winim ol traim nogut i save kamap long yumi.** Na tu **strong bilong sol i save helpim yumi long go het long mekim gutpela pasin, maski planti taim yumi painim hat na yumi mas mekim sakrifais na daunim laik bilong yumi yet.**

Strong bilong sol em i bikpela samting long ai bilong God. Planti taim Buk Baibel i toktok long dispela samting, long wanem sapos sol bilong yumi i no strong, orait em bai i hat long yumi mekim gutpela pasin na i go long heven. Santu Pol i tokim ol Korin olsem: ***Yupela i mas was gut na sanap strong long bilip. Yupela i mas i stap strong, na yupela i no ken pret long wanpela samting*** (1 Korin 16:13). Santu Pol i tokim yumi olsem yumi mas trastim God oltaim, long wanem sapos God i larim ol traim i kamap long yumi, i min olsem em yet bai i strongim yumi long winim ol dispela samting nogut.

Santu Pol yet i tok gen: ***Krais i save strongim mi, na long strong bilong em mi inap mekim olgeta samting*** (Filipai 4:13). Dispela tok bilong santu Pol em i tru olgeta, long wanem strong bilong sol i kam long Jisas yet. Long strong bilong yumi yet, yumi no inap long mekim wanpela samting. Tasol long strong i kam long Jisas yet, orait yumi inap long mekim olgeta samting. Na em i tok moa olsem: ***Sapos God i helpim yumi, orait husat bai i birua long yumi?*** (Rom 8:31). I min olsem i no gat wanpela samting nogut i ken winim yumi! Sapos yumi askim God long strongim yumi, orait yumi bai inap long winim ol traim i save kamap long laip bilong yumi!

Plantu santu i save kolim Josep «man bilong strong», long wanem oltaim em i bin sanap strong na em i no larim ol traim nogut i winim em. Laip bilong santu Josep i no isi. Plantu taim em i

bungim taim nogut long laip bilong em, na planti samting nogut i bin wok hat bilong daunim em. Tasol sol bilong em i strong tumas, olsem na em i winim ol samting nogut na em i no larim ol traim i winim em.

Yumi tingting liklik long ol traim i bin kamap long laip bilong santu Josep. Yumi tingim gen long ol traim i bin kamap long ples Nasaret, taim em i harim olsem meri bilong em i gat bel long Holi Spirit, na God Papa i askim em long lukautim bebi Jisas. Yumi tingim gen long ol traim i bin kamap long ples Betlehem, taim em i no painim wanpela rum bai meri bilong em i ken karim bebi Jisas. Yumi tingim gen long ol traim i bin kamap long em long taim King Herot i laik kilim pikinini Jisas i dai. Yumi tingim gen long ol traim i bin kamap long em long taim em i mas ranawe long Isip wantaim meri bilong em na bebi Jisas. Yumi tingim gen long ol traim i bin kamap long ples Isip, long wanem em i stap longwe tru long ples bilong em yet. Yumi tingim gen long ol traim i bin kamap long em long taim Holi Famili i mas wokabaut long ples wesan nating na kam bek long Nasaret. Yumi tingim gen long ol traim i bin kamap long em long taim mangi Jisas i lus long Tempel. Yumi tingim gen long ol traim i bin kamap long em long taim Holi Famili i stap long Nasaret, na santu Josep i mas wok hat bilong lukautim Jisas na Maria. Planti traim tumas i bin kamap long santu Josep! Tasol i no gat wanpela taim santu Josep i bin lusim dispela wok o misen God Papa yet i

bin givim long em long inapim. Nogat tru. Strong bilong sol bilong em i pulim em long go het oltaim, na long inapim gut ol wok o misen God i bin givim long em.

Orait nau yumi toktok liklik long strong bilong sol bilong yumi yet. Sapos yumi laik save sapos yumi man na meri bilong strong o nogat, orait nau yumi ritim dispela 7-pela askim, na yumi bekim insait long sol bilong yumi yet:

1) Mi save bihainim laik bilong mi oltaim, o mi save daunim laik bilong mi na bihainim laik bilong ol arapela manmeri?

2) Mi save les long mekim sakrifais, o mi save redi oltaim long mekim sakrifais?

3) Mi save ranawe long ol samting i hat long mekim, o mi save sanap strong na mekim ol samting i hat tu?

4) Mi save wok bilong painim ol samting i givim amamas long mi, o mi save wok bilong painim ol samting i gutpela tasol, maski i save givim amamas o nogat?

5) Mi save laik long olgeta samting i kamap hariap olsem mi tok, o mi save wet wantaim bel isi?

6) Mi save pret long mekim ol bikpela samting, o mi no save pret na mi save mekim ol bikpela samting tu?

7) Mi save helpim ol manmeri i painim hat long mekim ol samting, o mi save les long helpim ol?

8) Mi save sanap strong long taim bilong traim, o mi save lusim hop?

9) Mi save winim ol traim bilong Satan, o mi save pundaun long sin planti taim?

10) Long taim bilong sik, mi save komplein o mi save akseptim na ofarim sik bilong yumi long God?

11) Long taim mi sot long ol samting, mi save trastim God o mi save tingting planti na bel hevi?

Planti taim i save kamap olsem strong bilong sol bilong yumi i no bikpela tumas. Olsem na planti taim yumi save komplein, o yumi save mangal long ol samting yumi i sot long em. Planti taim yumi save pundaun long ol traim bilong Satan na yumi save mekim sin. Yumi harim santu Pol i tok: ***Olsem na sapos... ol man i mekim nogut long mi, na ol kain kain hevi na trabel i kisim mi, na ol man i wok long bagarapim mi, orait bel bilong mi i save stap gutpela tasol. Long wanem, taim mi no gat strong, long dispela taim tasol mi gat strong tru*** (2 Korin 12:10). Olsem na yumi no ken lusim hop o tingting planti long taim bilong hevi o trabel, long wanem Jisas yet em i helpim bilong yumi, na Holi Spirit i redi oltaim long strongim yumi!

Olsem na sapos yumi laik kisim strong long sol bilong yumi, orait oltaim yumi mas askim God long givim strong long yumi, na tu oltaim yumi mas tingting long Pen na Indai bilong Jisas. **Pen na Indai bilong Jisas i save strongim yumi, na em i as bilong olgeta grasia na blesing na strong i save kam long yumi.** Buk Baibel i tok: *Olsem na yumi mas lusim olgeta kain samting i mekim yumi i no*

*inap ran strong, na olgeta sin i save pas long yumi. Na yumi mas strongim bel na ran strong long dispela resis God i bin makim bilong yumi ran long em. Yumi mas lukluk i go long Jisas, em i as bilong bilip bilong yumi... **Yupela tingim gut. Ol man bilong sin bipo ol i birua nogut long Jisas. Tasol em i sanap strong moa. Yupela tingim dispela, olsem na yupela i no ken les long sanap strong, na bel bilong yupela i no ken guria*** (Hibru 12:1-3). Pen na Indai bilong Jisas bai i strongim yumi oltaim long winim ol samting nogut i save kamap long yumi!

O gutpela santu Josep, yu wasman bilong mipela! Mipela i askim yu long pre bilong helpim mipela oltaim! Mipela tu i laik sanap strong long ol hevi na trabel i save kamap long mipela! Helpim mipela long daunim laik bilong mipela yet! Helpim mipela long painim strong bilong bihainim laik bilong God oltaim!

26

SANTU JOSEP, MAN BILONG PEISENS

Peisens em i wanpela gutpela pasin i save kamap olsem kaikai bilong strong bilong sol. **Peisens i save helpim yumi long karim olgeta pen na hevi wantaim bel isi na amamas.** Sapos yumi laik go long heven, orait yumi olgeta i mas wok hat bilong gro long peisens, long wanem peisens i save helpim yumi long abrusim pasin bilong lusim hop.

I no isi long bihainim pasin bilong peisens, long wanem kain kain traim i save kamap long yumi oltaim. Planti taim peisens bilong yumi i painim hat long sanap strong wantaim bel isi na amamas long taim nogut na long taim bilong hevi. Planti taim

ol hevi na ol trabel i save pulim yumi long komplein na kros. Na planti taim bel isi bilong yumi i save pinis hariap long taim nogut tu.

Yumi no ken lustingting olsem olgeta man na meri bilong dispela graun i save karim pen na bungim hevi long laip bilong ol. I no gat wanpela man o meri long graun i ken tok olsem em i no bin karim pen long laip bilong em. Nogat tru. Ol man i save karim pen, na ol meri tu. Ol king i save karim pen, na ol wokboi nating tu. Ol maniman i save karim pen, na ol tarangu tu. Ol lapun i save karim pen, na ol pikinini tu. Ol santu i save karim pen, na ol manmeri bilong sin tu. **Jisas yet em i God tru na Bikpela bilong yumi, na em i bin karim planti pen long laip bilong em.** Olsem na i no gat wanpela man o meri i ken ranawe na i hait long pasin bilong karim pen. Nogat tru. Yumi olgeta i mas karim pen long laip bilong yumi.

Long dispela as tasol Buk Baibel i toktok planti long pasin bilong peisens na long pasin bilong karim pen wantaim bel isi. Jisas yet i tok: **«Yupela i mas i stap strong, na bai yupela i kisim laip na i stap gut»** (Luk 21:19). Em yet i skulim yumi olsem God i save pinis long olgeta hevi na wari bilong yumi, olsem na long taim nogut yumi mas sanap strong na trastim God oltaim, long wanem em yet bai i helpim yumi.

Aposel santu Jems i skulim yumi olsem: ***Orait oltaim yupela i mas sanap strong na karim hevi, bai dispela pasin i ken kamap***

strong tru long yupela. Olsem na bai yupela i stap gut, na yupela bai i no sot long wanpela pasin bilong God. Nogat. Pasin bilong yupela bai i gutpela na i stret olgeta (Jems 1:4). Na em i tok moa olsem: Olsem na, ol brata, yupela i mas strongim bel bilong yupela na karim ol hevi, na wetim Bikpela i kam bek. Yupela i save, man i gat gaden em i save wetim gutpela kaikai i kamap long gaden bilong em. Em i save strongim bel bilong em na stap isi na wetim ren wantaim san i mekim wok bilong tupela pastaim, na bihain em i save kisim kaikai. **Orait yupela tu i mas strongim bel na stap isi na karim ol hevi i kamap long yupela.** Taim bilong Bikpela i kam bek em i klostu tru. Olsem na bel bilong yupela i mas i stap strong (Jems 5:7-8). Aposel Jems i skulim yumi long sanap strong na i stap isi long taim bilong karim ol hevi, long wanem God yet bai i givim pe long yumi long las de.

Na wankain toktok i stap long Pas i go long Hibru: *Yupela i mas bilip strong, na bai yupela i kisim bikpela pe tru. **Yupela i mas sanap strong, olsem bai yupela i ken bihainim laik bilong God*** (10:35-36) I min olsem yumi mas bilip long God em i helpim bilong yumi, olsem na dispela tingting bai i helpim yumi long sanap strong na winim ol hevi i save kamap long laip bilong yumi.

Buk Baibel tu i skulim yumi olsem sampela taim God yet i save traim bilip bilong yumi. Em i mekim olsem long wanem em i laik save sapos yumi save laikim em long taim nogut tu, o yumi save laikim em long gutpela taim tasol. Planti manmeri i save laikim

God long gutpela taim, tasol taim ol hevi i kamap long ol, wantu ol i save komplein nabaut na lusim hop bilong ol. Planti manmeri long taim nogut i save lusim lotu tu na i go longwe long Jisas, na dispela em i kranki olgeta. Olsem na sampela taim God yet i save traim yumi, long wanem em i laik save sapos yumi karim pen wantaim bel isi na amamas, o nogat.

Nau yumi toktok long peisens bilong santu Josep. Pastaim yumi bin tok olsem planti santu i save kolim Josep «man bilong strong», long wanem oltaim em i bin sanap strong wantaim bel isi long ol traim i bin kamap long em. Wampela santu i tok: «Santu Josep i bin karim pen wankain olsem ol martir». Yumi toktok pinis long ol pen na hevi santu Josep i bin karim long ples Nasaret, Betlehem, Isip, Jerusalem, etc. **Tasol i no gat wampela taim santu Josep i komplein long ol dispela pen na hevi.** Nogat tru. Oltaim em i daunim em yet aninit long God, na em i akseptim olgeta traim na hevi i kamap long em. Oltaim em i bel isi long taim nogut, long wanem bilip bilong em i strong tumas, olsem na em i trastim God. Oltaim santu Josep i amamas long God, na em i no save komplein o kros nabaut long ol samting nogut i bin kamap long em.

Long Buk Baibel i gat stori bilong Jop, em i wampela gutpela man bilong bipo. God i bin traim bilip bilong em na kain kain samting nogut i bin kamap long em. Tasol em i no komplein na em i tok olsem: «*Taim mama i karim mi, mi no kisim wampela samting i kam*

*wantaim. Na taim mi dai bai mi go olsem tasol. **Bikpela yet i bin givim mi olgeta samting, na nau em i rausim pinis ol dispela samting. Olsem na mi litimapim nem bilong em***» (Jop 1:21). Peisens bilong santu Josep i winim tru peisens bilong Jop, long wanem ol traim i bin kamap long Josep i winim tru ol traim i bin kamap long Jop! Na dispela toktok bilong Jop i skulim yumi olsem yumi mas akseptim olgeta samting i kam long han bilong God. Sapos God i laik givim gutpela taim long yumi, orait yumi mas tenkim em na amamas. Tasol sapos God i laik givim hevi o pen long yumi, orait yumi tu i mas amamas na bel isi.

Nau yumi harim dispela tok i kam long Buk bilong Sirak: ***Pikinini, sapos yu tingting strong long bihainim Bikpela, orait yu mas redi long taim bilong traim. Stretim gut tingting bilong yu na sanap strong, na taim trabel i kamap yu no ken seksek kwik. Yu mas pas tru wantaim Bikpela na yu no ken lusim em, na bihain tru bai yu no inap sot long wanpela samting. Wanem samting i kamap long yu, yu mas karim tasol. Sapos ol kain kain senis i kamap na i daunim yu, orait yu stap isi tasol. Paia i save kukim gol, bilong rausim ol samting nogut na mekim gol i kamap klin tru. Olsem tasol ol samting bilong daunim nem bilong ol i save traim ol stretpela manmeri. Yu mas i stap klostu long Bikpela na bai em i helpim yu, na yu mas wokabaut stret na bilip tru long em*** (2:1-5). Dispela tok bilong Buk Baibel i gat planti skul bilong em! Pastaim em i tok olsem sapos yumi laik bihainim God gut, orait yumi mas

redim yumi yet long karim pen, long wanem i no isi long bihainim God gut. Kain kain traim i save kamap long ol gutpela manmeri i laik bihainim God, olsem na yumi mas redi long karim pen wantaim bel isi na amamas. Yumi mas pas wantaim Bikpela tasol na trastim em, nogut yumi trastim long strong bilong yumi yet na yumi pundaun. Bikpela tasol bai i helpim yumi long sanap strong, bai bilip bilong yumi i no ken seksek. Buk bilong Sirak tu i tokim yumi olsem oltaim yumi mas stap klostu long Bikpela, long wanem olgeta strong i save kam long han bilong em tasol. Olsem na long taim nogut yumi mas kam klostu moa yet long Jisas! Yumi no ken lusim em long taim nogut, long wanem em wanpela tasol inap long helpim yumi!

Nau em i taim bilong skelim peisens bilong yumi yet. Yumi tok pinis olsem yumi olgeta i mas karim pen na hevi. Tasol yumi olgeta i no wankain: sampela namel long yumi i save komplein, na sampela i save akseptim ol samting nogut wantaim amamas na bel isi. Olsem na peisens bilong yumi i olsem wanem? Yumi save bel isi long taim nogut, o yumi save komplein? Yumi save bel isi long taim nogut, o yumi save kros? Yumi mas tingting long peisens bilong santu Josep na wok hat bilong bihainim em, long wanem peisens bai i kisim yumi i go long heven.

Wanpela saveman bilong Sios, nem bilong em Tomas Kempis, i tok: «Man o meri i gat peisens na daunpasin bai i inap long winim ol samting nogut bilong dispela graun». Na em i tru, long wanem

sapos yumi sot long peisens, orait wantu tasol yumi bai i komplein o kros o bel hevi long ol samting nogut i save kamap long yumi. Na ol dispela pasin bilong komplein na kros em i sin, long wanem planti taim Buk Baibel yet i tok olsem yumi mas daunim yumi yet na yumi no ken kros na komplein nabaut. Na tu ol dispela pasin i save bagarapim bel isi insait long sol bilong yumi, na i save bagarapim gutpela sindaun insait long famili na long ples tu.

Na santu Fransis bilong Sales i tok: «Yumi no ken komplein long ol samting nogut i save kamap long yumi, long wanem pasin bilong komplein em i sin long ai bilong God. Yumi mas daunim yumi yet oltaim na wok hat bilong kamap man na meri bilong peisens, long wanem dispela pasin i save helpim yumi long kamap wankain olsem Jisas, em i man bilong peisens».

Olsem na sapos yumi laik kamap man na meri bilong peisens yumi mas tingting oltaim long Pen na Indai bilong Jisas, long wanem dispela tingting bai i helpim yumi long tingim ol samting Jisas i bin mekim bilong helpim yumi, olsem na yumi bai i painim strong bilong karim pen wantaim em.

Santu Ogastin i tok: «Long diwai kros Jisas i no karim pen na i dai tasol. Nogat. **Long diwai kros Jisas i skulim yumi long ol gutpela pasin yumi mas bihainim**». Diwai Kros bilong Jisas i mas kamap olsem wanpela skul, bai yumi olgeta i lukluk long em na kisim save long pasin bilong karim pen wantaim bel isi na amamas. Santu Tomas bilong Akwainas i tok: «Sapos yu laik painim wanpela

eksampel bilong peisens, orait lukluk long Jisas i hangamap long diwai kros. Em i no komplein na em i no kros. Em i ofarim olgeta pen bilong em i go long God Papa». Na em i tru, long wanem Jisas i no komplein long olgeta pen em i bin kisim bilong helpim yumi. Olsem wanem na planti taim yumi save komplein? Oltaim yumi mas tingim Pen na Indai bilong Jisas, na ofarim olgeta pen na hevi bilong yumi long em.

O santu Josep, yu man bilong karim pen wantaim amamas na bel isi! Yu namba wan eksampel bilong peisens! Helpim mipela long amamas oltaim namel long ol samting nogut i save kamap long laip bilong mipela! Strongim mipela, bai mipela tu i ken trastim God oltaim!

27

SANTU JOSEP, MAN BILONG WOK

Mama Sios i makim santu Josep olsem wasman bilong ol manmeri i save wok. Na yumi save selebretim dispela pestode long de namba 1 bilong mun Me, long de bilong tingim «Santu Josep i Wokman». Na **Mama Sios i makim santu Josep olsem wasman bilong ol wokmanmeri long wanem santu Josep em i man bilong wok strong.**

Yumi no ken lustingting olsem santu Josep i kam long lain bilong King Devit. Olsem na blut bilong santu Josep em i blut bilong ol king bilong Israel bilong bipo. Tasol em i no tingting planti long ol dispela samting, long wanem em i save olsem ol

bikman bilong graun i olsem samting nating long ai bilong God. Olsem na em i wok olsem kamda long ples bilong em Nasaret, na tu long ples Judia na tu long kantri Isip, taim Holi Famili i ranawe na i go hait long Isip.

Santu Josep em i man bilong tuhat tru long ples bilong wok, na em i no save tok olsem em i les long go long wok. Nogat olgeta. Santu Josep i save pinis olsem wok em i bikpela samting, olsem na sapos yumi laik kaikai, orait yumi tu i mas wok hat pastaim. Buk Baibel yet i tok: ***Sapos man i no laik mekim wok, orait em i no ken kisim kaikai*** (2 Tesalonaika 3:10). I no gutpela long yumi i stap nating long haus na bihain yumi laik kaikai na kisim planti samting. Nogat tru. Sapos yumi laik kaikai na yumi laik kisim planti samting, orait yumi mas wok hat olgeta de.

God yet i bin makim yumi ol manmeri bilong mekim wok. Taim God i kamapim heven na graun, orait em i givim graun long ol manmeri, bai ol manmeri i wok na kisim kaikai long em. Long Buk bilong Stat God yet i tokim Adam tupela Iv olsem: «*Mi givim yupela ol kain kain diwai na gras i karim pikinini bilong kaikai. Na yupela i ken kisim kaikai long ol dispela samting*» (Stat 1:29). I min olsem yumi mas wok hat pastaim, na bihain yumi mas kisim kaikai. **Na dispela lo i kam long God yet: ol manmeri i mas wok hat.** Sapos nogat, orait santu Pol i tok olsem ol manmeri bilong les i no gat rait long kisim kaikai, long wanem ol i no save bihainim dispela lo bilong God yet.

Buk Baibel i save kolim santu Josep olsem «*stretpela man*», long wanem em i bin i stap aninit long God oltaim. Olsem na santu Josep i no save giaman long wok bilong em. Nogat. Em i wok olsem kanda, na em i askim ol manmeri long givim mani long em inap long wok em i bin mekim. Em i no save trikim ol kastama bilong em. Nogat. Santu Josep i save wok hat bai wok bilong em i kamap gut, long wanem em i save pinis olsem **pasin bilong wok hat i save givim ona long God na i save helpim yumi long kamap santu**. Olsem na em i no save mekim ol wok bilong em hap hap tasol. Nogat. Em i save mekim gut ol wok bilong em, na em i no save malolo inap long em i bin pinisim gut ol wok bilong em.

Santu Maria yet i bin tokim santu Brigit olsem: «Planti taim mipela i bin sot long planti samting, long wanem planti taim i kamap olsem i no planti kastama i save kam na askim Josep long mekim wok. Tasol oltaim yumi bin trastim God. **Na taim mipela i sot long ol samting, mipela i no save mangal long ol manmeri i gat planti samting. Nogat tru**. Mipela i trastim God tasol, long wanem em i no save lustingting long ol manmeri bilong em».

Na Papa Santu Pop Lio namba 13 i tok: «Santu Josep i kam long lain bilong King Devit. God Papa yet i bin makim em bilong maritim santu Josep, em i Kwin bilong ol ensel na Kwin bilong ol santu. Santu Josep i bin i stap olsem papa bilong Jisas. Tasol santu Josep i no bin gat planti samting. Nogat. Em i bin wok hat olgeta de bilong laip bilong. Em i wok olsem kamda, na long wok kamda

bilang em, em i kisim ol kaikai samting bilang famili bilang em. Santu Josep i amamas long ol liklik samting em i gat, na em i no save mangal long ol manmeri i gat planti samting. Santu Josep i bin bihainim oltaim pasin bilang pikinini bilang em Jisas, long wanem santu Pol i tok olsem Jisas i bin daunim em yet na *i kamap olsem wokboi nating. Em i kamap olsem man na ol man i lukim em i stap man tru. Na em i daunim em yet na i bihainim tok bilang God* (Filipai 2:7-8)».

Olsem na yumi olgeta i mas bihainim pasin bilang santu Josep na wok hat. I no gutpela long ol papa i stap nating long haus. Nogat tru. I no gutpela long ol papa i sindaun nating long haus na i salim meri bilang ol long go long gaden o mekim maket. Nogat olgeta. Ol papa i mas go pas long mekim wok, na ol i mas tuhat bilang kisim ol kaikai samting i kam long haus.

O gutpela santu Josep! Planti taim yu bin sot long planti samting, tasol yu no save mangal long ol manmeri i gat planti samting! Oltaim yu bin soim mipela olsem mipela tu i mas wok hat tru bilang kisim ol kaikai samting i kam long haus, na bilang lukautim gut ol pikinini bilang mipela! Helpim mipela long bihainim oltaim dispela pasin bilang yu, long wanem pasin bilang wok hat i save givim ona long God na i save helpim mipela long kamap santu!

28

SANTU JOSEP, MAN I NO GAT PLANTI SAMTING

Buk Baibel yet i stori long yumi olsem santu Josep em i wanpela man i no gat planti samting. Em i tru olsem em i kam long lain bilong King Devit yet, tasol Josep em i wanpela man bilong ples Nasaret wankain olsem ol arapela manmeri, olsem na em i no gat planti samting. Ol tumbuna bilong em bilong bipo i bin gat planti samting, tasol em yet i no gat planti samting. Santu Josep em i wanpela tarangu man, na em i sot long planti samting.

Pastaim yumi mas tok olsem pasin bilong i stap tarangu i no wanpela samting nogut. Planti manmeri i save tingting olsem God i save blesim yumi wantaim planti gutpela samting long

dispela graun. Na dispela toktok bilong ol em i rong olgeta! Blesing bilong God em i narakain samting! God i no save blesim yumi wantaim planti mani o gol o graun. Nogat olgeta! God i save blesim yumi long ol samting bilong spirit na sol tasol. Ol mani samting i no wanpela blesing bilong God, olsem na yumi no ken tingting planti long kisim ol dispela samting. **Planti maniman i save go long hel, na planti tarangu i save go long heven.** Olsem na ol mani samting bilong dispela graun i no wanpela blesing i kam long han bilong God. Nogat tru.

Long Nupela Testamen planti taim Jisas i toktok long pasin bilong i stap tarangu. Na em i tok olsem dispela pasin em i gutpela samting, long wanem **pasin bilong i stap tarangu i save helpim yumi long tingting long God tasol.** Sapos yumi pulap long planti mani samting, orait lewa bilong yumi bai i pas long mani na long ol samting bilong dispela graun. **Tasol sapos yumi sot long planti samting, orait lewa bilong yumi bai i wok long painim God tasol.** Jisas yet i tok: *«Ol manmeri i save ol i stap rabis tru, em ol i ken amamas. Ol dispela manmeri bai i kisim ol gutpela samting bilong kingdom bilong heven»* (Matyu 5:3). Na em i tru, long wanem sapos yumi sot long planti samting taim yumi i stap hia long graun na yumi ofarim dispela hevi long Jisas, orait yumi bai i kisim bikpela pe long heven i winim tru olgeta gutpela samting bilong dispela graun.

Jisas yet i bin i stap tarangu, na em i bin sot long planti samting. Maski Jisas em i God tru na Bikpela bilong heven na graun, taim em i kam long graun em i bin i stap olsem wanpela tarangu man. Long heven Jisas i pulap long olgeta gutpela samting na ol ensel i save mekim wok bilong helpim em. Tasol taim em i kamap man na em i kam i stap namel long yumi, orait em i bin i stap tarangu olgeta. Em yet i tok: *«Ol weldok i gat hul long graun, na ol pisin i gat haus bilong ol. Tasol Pikinini Bilong Man em i no gat ples bilong slip»* (Luk 9:58). Na santu Pol tu i tok: *Yupela i mas holim wankain tingting olsem Krai Jisas i bin holim. Em i stap God tru, tasol em i no ting long holimpas dispela pasin bilong i stap wankain olsem God. Nogat. Em i lusim dispela pasin, na em i kamap olsem wokboi nating. Em i kamap olsem man na ol man i lukim em i stap man tru* (Filipai 2:5-8).

Long Gutnius i gat stori bilong wanpela man i askim Jisas long as bilong kamap stretpela man long ai bilong God, na Jisas i bekim tok bilong em olsem: *«Sapos yu laik kamap stretpela olgeta, orait yu go salim olgeta samting bilong yu na dispela mani yu kisim yu mas givim long ol rabisman. Yu mekim olsem, na bai yu gat ol gutpela samting tru long heven»* (Matyu 19:21). Dispela bekim bilong Jisas i skulim yumi olsem em bai i hat long go long heven sapos yumi hipim hipim planti samting, long wanem lewa bilong yumi bai i pas long ol samting bilong yumi na long ol samting bilong dispela graun tasol.

Olsem na sapos yumi no gat planti samting, orait em bai isi long yumi givim lewa bilong yumi long God tasol.

Pasin bilong hipim hipim planti samting em i rabis tru long ai bilong God. Long Gutnius bilong santu Luk i gat tok piksa bilong wanpela maniman i bisi tumas long hipim hipim planti samting, na bihain em i dai na sol bilong em i go long hel. Tasol taim dispela maniman i stap laip yet, em i tingting olsem em bai inap long i stap gut na em bai i no sot long wanpela samting, long wanem em i trastim long mani bilong em yet. Na Jisas i tok: *Tasol God i tokim em olsem: «Yu longlong man tru. Nau long dispela nait tasol bai yu dai. Na olgeta dispela samting yu bin redim i stap, em husat bai i kisim?»*. Na Jisas i tok: *«Dispela kain samting bai i kamap long ol man i hipim hipim planti samting bilong ol yet, tasol ol i stap rabis long ai bilong God»* (Luk 12:20-21). Jisas yet i kolim dispela man em i longlong man tru, long wanem em i tingting long mani tasol, na em i lustingting long sol bilong em!

Orait nau yumi toktok liklik long santu Josep. Santu Josep i bin i stap tarangu, long wanem em i bin sot long planti samting. Yumi tingim sampela stori i kam long Buk Baibel yet.

Namba wan stori yumi mas tingim em i stori bilong santu Maria i karim Jisas. Long ples Betlehem Josep i no inap long painim wanpela rum bilong halivim meri bilong em i laik karim bebi. Santu Josep i no gat wanpela bet o matres bilong givim long bebi Jisas, olsem na em i putim bebi Jisas long bokis kaikai bilong ol

bulmakau tasol. Na dispela samting i sutim tru lewa bilong em, long wanem em i laik givim planti gutpela samting long bebi Jisas na santu Maria, tasol em i no inap, long wanem em i tarangu. Tasol dispela samting i no mekim santu Josep i bel hevi o lusim hop. Nogat tru.

Bihain wankain samting i bin kamap long taim Holi Famili i ranawe na i go long Isip. Long dispela longpela wokabaut bilong ol, ol i bin sot long planti samting long ples wesana nating. Na santu Josep i no karim wanpela samting i go wantaim em long Isip, olsem na taim Holi Famili i kam kamap long Isip, orait ol i sot long olgeta samting. Long Isip santu Josep i no gat haus bilong em yet, em i no gat gaden bilong em, na em i no gat wanpela ples bilong mekim wok kamda bilong em. Tasol dispela samting tu i no mekim santu Josep i bel hevi o lusim hop. Nogat tru.

Na taim Holi Famili i kam bek long Nasaret, orait santu Josep i bin wok olsem kamda tasol long ples bilong em. Em i no wanpela maniman o bikman bilong ples Nasaret. Nogat tru. Santu Josep em i wanpela kamda tasol, olsem na em i no save winim planti mani. Liklik mani em i save winim long wok bilong em, em i save givim long meri bilong em na pikinini Jisas. Na tu em i save yusim liklik mani bilong em bilong mekim wok marimari long ol tarangu, olsem santu Maria yet i bin tokim long santu Brigit. Olsem na santu Josep i save gut long pasin bilong i stap tarangu na long pasin bilong sot long planti samting! Na ol dispela samting

i no bin mekim santu Josep i komplein. Nogat tru. Em i no bin mangal long ol samting bilong ol maniman bilong ples Nasaret. Nogat. Santu Josep i daunim em yet oltaim, na em i amamas long ol liklik samting bilong em yet, long wanem em i trastim God wanpela tasol.

Olsem na yumi mas kisim save long santu Josep, long wanem dispela pasin bilong i stap tarangu i no mekim santu Josep o santu Maria i bel hevi. Nogat. Ol i no save komplein long ol samting ol i sot long em. Holi Famili i amamas tasol long ol liklik samting ol i gat, na ol i no mangal long ol manmeri i gat planti samting. Ol i bel isi oltaim na amamas tasol, long wanem ol i no bisi long ol samting bilong dispela graun.

Laip bilong santu Josep, santu Maria na Jisas i no isi. Planti taim ol i bin sot long planti samting, tasol ol i no komplein long dispela samting. Nogat. Ol i trastim God, na ol i save olsem God yet i save helpim ol tarangu. Na tu dispela samting i bin helpim ol long tingting long heven na long ol samting bilong antap tasol. Santu Maria yet i tok olsem God i save helpim ol tarangu na les long ol manmeri i gat planti samting: *[God] Em i daunim ol strongpela king, na em i litimapim ol man i no gat nem. Em i givim planti gutpela samting long ol man i hangre, na bel bilong ol i pulap tru. Tasol ol man i gat planti samting, em i rausim ol i go nating* (Luk 1:52-53).

Nau yumi toktok liklik long yumi yet, na yumi skelim sol bilong yumi na ol pasin bilong yumi. Yumi save komplein taim

yumi sot long sampela samting, o nogat? Yumi save tingting long hipim hipim planti samting long dispela graun, o nogat? Yumi save mangal long ol manmeri i gat planti samting, o nogat? Yumi save wok bilong kisim ol nambawan sia o bilong kisim biknem na kamap bikman, o nogat?

Yumi no ken lustingting olsem pasin bilong i stap tarangu i save helpim yumi long tingting long ol samting bilong heven tasol. Nogut yumi pulap long planti mani samting hia long graun, na bihain yumi go long hel inap oltaim oltaim! Planti maniman i save bisi tumas long ol bisnis bilong ol, tasol ol i no save tingting long Jisas na long sol bilong ol. Olsem na taim indai i bungim ol, ol i no redi na ol i go stret long paia bilong hel. Na Jisas i laikim yumi tumas, olsem na planti taim em i tokim yumi olsem i no gutpela long yumi mangal long kamap maniman o wok bilong hipim hipim planti samting hia long graun. Jisas yet i tok: *«Mi tok tru long yupela, **ol maniman bai i hatwok tru long i go insait long kingdom bilong heven. Mi tokim yupela gen, kamel i laik i go insait long hul bilong nil bilong samap, em i no gat hatwok olsem maniman i laik i go insait long kingdom bilong God**»* (Matyu 19:23-24). Na Jisas tu i tok moa olsem: *«**Tasol yupela ol maniman, yupela lukaut! Yupela i kisim pinis samting bilong mekim gut bel bilong yupela. **Yupela ol lain nau yupela i save kaikai na pulap, yupela lukaut! Bihain bai yupela i hangre****»* (Luk 6:24-25).

Long Gutnius bilong santu Luk i gat wanpela tok piksa i tok klia olsem pasin bilong hipim hipim planti samting i save kisim planti manmeri i go long hel. Em i tok piksa bilong maniman na Lasarus. Dispela maniman bilong tok piksa oltaim em i save putim naispela naispela siot na gutpela retpela klos. Na olgeta de em i save kisim gutpela gutpela kaikai na dring na amamas wantaim ol pren bilong em. Na em i no wari liklik long rabisman i sindaun ausait long haus bilong em, nem bilong em Lasarus. Na wanem samting i kamap? Indai i bungim tupela wantaim, na tupela i dai. Lasarus i go long heven, na maniman i go long paia bilong hel. Na taim maniman i komplein long bikpela pen bilong paia bilong hel, Abraham i bekim tok bilong em olsem: «*Pikinini, yu mas tingim wanpela samting. Taim yu stap laip, yu bin kisim olgeta gutpela samting. Na Lasarus em i kisim olgeta samting nogut. **Tasol nau long dispela ples, bel bilong em i stap gutpela. Na yu kisim pen nogut***» (Luk 16:25).

O gutpela wasman bilong mipela, santu Josep! Helpim mipela long amamas long ol liklik samting yumi gat tasol! Helpim mipela long abrusim pasin bilong hipim hipim planti samting hia long graun! Helpim mipela long abrusim pasin bilong mangal! Lewa bilong mipela i mas pas long ol samting bilong heven tasol!

29

SANTU JOSEP, WAS SANTU BILONG KATOLIK SIOS

Long bipo tru long taim bilong ol Aposel yet i kam inap nau, Oltaim planti man na meri nogut i bin wok hat bilong egensim Katolik Sios bilong Jisas. Oltaim planti man na meri i bin toknogutim na rabisim Katolik Sios, olsem na Katolik Sios i gat planti birua tru. Oltaim planti man na meri i bin lusim Katolik Sios na i bin kamapim kain kain lotu i kam long tingting bilong ol yet, na ol i bin wok hat bilong daunim Katolik Sios.

Na yumi no ken kirap nogut long dispela samting i kamap, long wanem Jisas yet i bin tokim yumi olsem dispela samting bai i

kamap. Jisas i save pinis olsem planti man na meri bilong giaman bai i kamap na paulim tingting na bilip bilong ol Katolik manmeri. Em yet i tokim yumi olsem: «***Yupela lukaut long ol giaman profet!*** Ol i save mekim gutpela tok bilong grisim yupela, tasol tingting tru bilong ol em i bilong paulim yupela na bagarapim yupela. Ol i olsem ol weldok i pasim skin bilong sipsip, bai ol i ken i go klostu long ol sipsip na holimpas ol» (Matyu 7:15). Na tu em i tok: «***Planti giaman profet bai i kirap na giamanim planti manmeri... sampela man bai i kam na tok giaman olsem: “Mi dispela man God i makim bilong kisim bek ol manmeri bilong en”, o “Mi wanpela profet”***» (Matyu 24:11.24). Ol dispela manmeri i save giaman na paulim bilip na tingting bilong planti manmeri, olsem na Jisas i kolim ol «***giaman profet***». Ol i save tok olsem ol i stap long trupela Sios bilong Jisas, na ol i save tok olsem Katolik Sios em i samting nating.

Na bilong egensim ol dispela giaman profet, long bipo tru i kam inap nau God i bin kamapim planti santu insait long Katolik Sios. Katolik Sios i pulap tru long planti santu na saveman na Tisa i bin bekim tok bilong ol dispela giaman profet, olsem na Katolik Sios i stap yet na i sanap strong. Maski ol birua bilong Sios na ol arapela lotu i save sutim ston long Katolik Sios, ol bai i no inap long daunim em. Nogat tru. Jisas yet i bin makim santu Pita olsem namba wan Papa Santu na i promisim em olsem: «***Yu Pita, na bai mi wokim sios bilong mi antap long dispela ston. Na bai strong***

bilang Dai i no inap daunim dispela sios. Bai mi givim ol ki bilang kingdom bilang heven long yu. Samting yu pasim long graun, em bai God i pasim long heven tu. Na samting yu lusim long graun, em bai God i lusim long heven» (Matyu 16:18-19). Olsem na yumi ol Katolik i no save pret long ol man na meri i wok long egensim Sios bilong yumi. Yumi no save pret long ol arapela lotu i save toknogutim Katolik Sios. Nogat tru. Yumi save pinis olsem Katolik Sios em i trupela Sios bilong Jisas, na Jisas yet i bin promis olsem strong bilong Satan na strong bilong indai bai i no inap long daunim em.

Olsem na long yia 1870 Papa Santu Pop Pius namba 9 i bin makim santu Josep olsem Was Santu bilong Katolik Sios, bai santu Josep yet i ken was long Katolik Sios olsem em i bin was long Jisas yet, long wanem Katolik Sios em i bodi bilong Jisas, na Jisas em i het bilong Katolik Sios.

Papa Santu i raitim wanpela pas i go long olgeta Katolik manmeri bilong olgeta hap bilong graun, na long dispela pas em i tok:

«Taim God Papa i laik salim Pikinini bilong em i kam long graun, em i makim wanpela man, nem bilong em Josep, bilong was na lukautim gut Pikinini bilong em yet. God Papa i makim Josep olsem wasman bilong Jisas, na em i makim Josep olsem Lord na Prins bilong olgeta gutpela samting bilong em. Olsem na Josep i maritim

Maria, em i Virgo Oltaim na em i Klin Olgeta. Na long Maria yet Jisas i kam long graun. Jisas yet i bin i stap aninit long Josep, na ol manmeri bilong Israel i save tok olsem Josep em i "papa bilong Jisas", na Jisas em i "pikinini bilong Josep". Ol profet bilong bipo i mangal long lukim Mesaia, na Josep tasol i holim dispela Mesaia long han bilong em, em i toktok wantaim em, em i givim planti kis long em, na olgeta de em i givim kaikai long em. Jisas em i Bret bilong heven i kam long graun, tasol olgeta de Josep yet i save givim bret na kaikai long Jisas.

God yet i bin givim bikipela namba long santu Josep, na long dispela as tasol Katolik Sios i save onarim em na beten long em. Oltaim Katolik Sios i save askim santu Josep long was long em, bai em i ken helpim Katolik Sios long ol samting em i sot long em. Nau, long dispela taim stret, planti birua bilong Katolik Sios i bin kamap. Planti manmeri i wok long egensim Katolik Sios oltaim long olgeta hap bilong graun. Olsem na olgeta bisop bilong graun i bin askim mi, Pop Pius namba 9, long makim santu Josep olsem Was Santu bilong Katolik Sios.

Olsem na mi yet, Papa Santu Pop Pius namba 9, i bin harim singaut bilong ol bisop na tu bilong ol Katolik manmeri, na mi yet i makim santu Josep olsem Was Santu bilong Katolik Sios. Olgeta Katolik

manmeri i mas selebretim Pestode bilong em long de namba 19 bilong mun Mas. Olsem na long nau inap oltaim olgeta Katolik manmeri i mas bihainim dispela tok bilong mi, na i no gat wanpela man o meri i ken egensim dispela tok bilong mi.

*Mi raitim dispela pas long de namba 8 bilong mun Disemba, em i Bikpela Pestode bilong Maria i no gat sin,
Pop Pius namba 9»*

Papa Santu Pop Pius namba 9 i makim santu Josep olsem Was Santu bilong Katolik Sios, na dispela pasin bilong em i gat bikpela mining tru. Long wanem santu Josep i bin lukautim Jisas taim Jisas i bin i stap long graun. Em i bin lukautim bodi bilong Jisas oltaim, long wanem em i bin was long Jisas, givim kaikai long em, lukautim em long taim bilong sik, etc. **Na santu Pol yet i skulim yumi olsem Katolik Sios em i Bodi bilong Jisas tu! Olsem na wankain olsem bipo santu Josep i bin lukautim bodi bilong Jisas, wankain olsem nau santu Josep i save lukautim Katolik Sios, em i bodi bilong Jisas yet.**

Santu Pol yet i tok: *Bodi bilong man em i wanpela tasol, na i gat planti hap bilong em. Na dispela planti hap bilong bodi em olgeta i stap wanpela bodi tasol. Na Krai tu i stap olsem, long wanem, wanpela Holi Spirit tasol i bin baptaisim yumi olgeta na mekim yumi i kamap wanpela bodi tasol. (...) Yumi save, bodi em i no wanpela hap*

tasol. Nogat. Em i gat planti hap bilong em. (...) Orait yupela olgeta i stap bodi bilong Krai. Na yupela wan wan i stap hap bilong bodi bilong em (1 Korin 12:12-27). Olsem na Katolik Sios em i bodi bilong Jisas, na yumi olgeta i stap hap bilong bodi bilong em. Na wankain olsem bipo santu Josep i bin lukautim bodi bilong Jisas taim Jisas i bin i stap long graun, orait nau em i save lukautim Katolik Sios na yumi olgeta wan wan, long wanem yumi stap hap bilong bodi bilong Krai!

O gutpela wasman bilong mipela, santu Josep! Was long mipela na lukautim mipela oltaim! No ken larim ol birua bilong Sios i daunim mipela na paulim bilip na tingting bilong mipela! Helpim ol manmeri i slek long bilip long kam bek long trupela Sios bilong Jisas, em i Katolik Sios tasol!

30

SANTU JOSEP, WAS SANTU BILONG OL MANMERI I LAIK I DAI

Profet Devit i tok long Buk Baibel olsem: *Indai bilong ol manmeri i laikim God em i naispela tru long ai bilong em* (Buk Song 116:15). Em i tok olsem indai bilong ol gutpela manmeri em i naispela tru long ai bilong God, long wanem ol gutpela manmeri bai i go long heven na amamas wantaim em inap oltaim oltaim. Santu Bernard i tok: «Indai bilong ol gutpela manmeri em i naispela tru, long wanem ol bai i go long ples bilong malolo. Ol gutpela manmeri i dai bai i kisim pe bilong ol gutpela wok ol i bin mekim. Indai bilong ol em i dua bilong heven».

Sapos yumi dai wantaim grasia bilong God insait long sol bilong yumi, orait yumi tu bai i go long heven! Olsem na yumi no ken pret long indai. Nogat. Yumi mas redi oltaim na wok hat bilong abrusim ol sin i laik bagarapim grasia bilong God insait long sol bilong yumi. Long Buk bilong Revelesen santu Jon i tok: *«Mi harim maus bilong wanpela man i singaut long heven olsem: “Yu raitim tok olsem: ‘Nau na olgeta taim bihain, ol manmeri i bilip long Bikpela na ol i dai, ol i ken amamas’.” Na Holi Spirit em tu i tok: “Ol i ken amamas tru, long wanem, ol i lusim dispela hatwok ol i bin mekim, na ol i ken malolo. Na ol i no i go nating. Nogat. Gutpela pasin ol i bin mekim, em i go wantaim ol”»* (Revelesen 14:13).

Indai bilong ol gutpela manmeri em i naispela tru, long wanem ol gutpela pasin ol i bin mekim bai i go wantaim ol, na ol bai i kisim gutpela pe long han bilong Jisas yet! Olgeta hatwok bilong ol na olgeta pen bilong ol bai i pinis, na ol bai i malolo na amamas inap oltaim oltaim long heven. Buk Baibel i tok: *[God] Em bai i mekim drai wara i stap long ai bilong olgeta bilong ol. Na ol manmeri bai i no i dai moa, na ol bai i no bel hevi moa na krai moa, na ol bai i no inap kisim pen gen. Ol dispela samting bilong bipo ol i pinis olgeta* (Revelesen 21:4).

Indai bilong ol gutpela manmeri em i dua bilong i go long heven. Long taim bilong indai ol gutpela manmeri bai i harim ol ensel na ol santu i singsing amamas! Long taim bilong indai ol gutpela manmeri bai i harim nek bilong Jisas i tokim ol olsem: *«Yu gutpela*

wokboi, yu bin mekim gutpela wok tumas... Yu kam amamas wantaim mi» (Matyu 25:23). Ol gutpela manmeri bai i go insait long ples bilong amamas wantaim God na ol ensel na ol santu inap oltaim oltaim! Santu Pol i tok olsem amamas bilong heven i winim tru olgeta gutpela samting bilong graun, olsem na i no gat wanpela man i ken save gut long heven em i olsem wanem, long wanem heven i winim tru ol samting yumi save lukim long graun: *Ol samting bipo i no gat man i bin lukim o harim tok long em, na i no bin kamap long tingting bilong man tu, em ol samting God i bin redim i stap bilong ol man i save laikim em tru* (1 Korin 2:9).

Long dispela as tasol ol santu i bin mekim kain kain samting bilong winim heven! Ol i bin mekim planti sakrifais, na ol i bin wok hat bilong bihainim laik bilong God oltaim. I no isi long go long heven, long wanem taim yumi i stap hia long graun i gat planti traim na planti samting nogut i laik pulim yumi long mekim sin. Na taim yumi mekim mortal sin, yumi givim baksait long God na yumi go longwe long em. Olsem na sapos yumi laik go long heven, orait yumi mas redi oltaim long mekim sakrifais na sakim ol traim i laik pulim yumi long mekim sin. Yumi mas pait strong na egensim Satan na abrusim ol sin i laik pulim yumi long go long hel. Planti santu i save tok olsem: **«Mi no laik mekim sin. Mobeta mi laik i dai pastaim»**. Yumi tu i mas mekim wankain toktok! Yumi tu i mas sanap strong na sakim ol traim nogut! Mobeta yumi dai wantaim grasia bilong God insait long sol bilong yumi!

Katolik Sios i bin makim santu Josep olsem was santu bilong ol manmeri klostu i laik i dai. Na Katolik Sios i makim santu Josep, long wanem indai bilong santu Josep em i naispela tru. Yumi bin toktok pinis long indai bilong em long sapta 11 bilong dispela buk. Santu Josep i bin dai long haus bilong Nasaret wantaim Jisas na santu Maria. Long taim bilong indai, em i slip long bet, na Jisas tupela Maria i stap klostu long em na holim han bilong em. Indai bilong santu Josep em i naispela tru! Olsem na yumi olgeta i mas beten long em, bai yumi tu i ken dai wantaim Jisas na santu Maria insait long lewa bilong yumi. Yumi mas beten oltaim bai indai i ken bungim yumi long taim yumi i redi.

Tasol yumi no ken tingting olsem God bai i givim pe nating long yumi. Nogat tru! Buk Baibel i tok klia olsem: ***Laip na i dai i stap long han bilong ol manmeri. Na wanem samting ol manmeri i laik kisim, bai Bikpela i givim long ol*** (Sirak 15:17). I min olsem God bai i givim pe long yumi inap long pasin yumi bin mekim. Sapos ol pasin bilong yumi i gutpela na yumi dai wantaim grasia bilong God, orait God bai i givim gutpela pe long yumi long heven. Tasol sapos ol pasin bilong yumi i no gutpela na yumi no gat grasia bilong God insait long sol bilong yumi, orait yumi bai i kisim pe nogut long hel. Santu Pol i tok klia olsem: *Yumi save, yumi olgeta i mas kamap long kot bilong Krai. Na sapos yumi bin mekim gutpela pasin long taim yumi stap long bodi o sapos yumi bin mekim pasin nogut, yumi olgeta wan wan bai i kisim pe inap long pasin yumi bin mekim* (2 Korin 5:10).

Oltaim yumi mas wok hat bilong daunim laik bilong yumi yet na bihainim laik bilong God tasol. I no gat narapela rot bilong i go long heven. Nogat tru. Dispela tasol em i rot i save kisim yumi i go long heven. Buk Baibel i tok: *Na Jisas i tokim ol disaipel bilong em olsem: «Sapos wanpela man i laik bihainim mi, orait em i mas daunim laik bilong em yet, na em i mas karim diwai kros bilong em na bihainim mi. Long wanem, sapos wanpela man i laik holimpas laip bilong em yet, laip bilong em bai i lus. Tasol sapos wanpela man i ting long mi na i lusim laip bilong em, em bai i kisim laip bilong em»* (Matyu 16:24-25).

Olsem na oltaim yumi mas redi long bungim indai! Oltaim yumi mas wok hat bai sol bilong yumi i klin! Oltaim yumi mas wok hat bilong abrusim ol sin! Jisas yet i tok: *«Yupela tu i mas redi. Pikinini Bilong Man bai i kam long wanpela taim yupela i no ting em bai i kam»* (Luk 12:40). Yumi mas redi oltaim, long wanem Jisas yet i tok olsem yumi no inap save long wanem taim indai bai i bungim yumi. Yumi no save sapos yumi bai i dai long neks yia, long neks wik o tumora yet. Olsem na oltaim yumi mas redi, nogut indai i bungim yumi long taim yumi no redi, na yumi lus olgeta long hel.

Sapos yumi laik dai klostu long Jisas na wantaim grasia bilong God insait long sol bilong yumi, orait yumi harim ol dispela gutpela advais i kam long Buk Baibel yet. Buk Baibel i tok olsem yumi mas mekim 3-pela samting: **1)** Yumi mas was na prea oltaim.

2) Yumi mas sanap strong na abrusim ol samting nogut i laik pulim yumi long mekim sin. 3) Yumi mas kisim ol sakramen.

1) *Yumi mas was na prea oltaim*

Jisas yet i tokim ol disaipel olsem: «***Yupela i mas was na prea i stap. Nogut traim i kamap long yupela na yupela i pundaun***» (Matyu 26:41). Pasin bilong prea em i olsem klos bilong pait i save helpim yumi long winim ol traim nogut bilong Satan. Santu Teresia na santu Alfons i tok olsem: «Man o meri i save beten, em bai i go long heven. Na man o meri i no save beten, em bai i go long hel».

Santu Pol yet i tok olsem yumi no ken les long beten, long wanem oltaim Satan i save traim yumi. Olsem na sapos yumi no sanap strong, orait yumi tu bai i pundaun long sin. Em i tok: ***Olsem na sapos wanpela man i ting em i sanap strong, orait em i mas lukaut gut. Nogut em i pundaun*** (1 Korin 10:12).

Na long ol Kristen bilong Galesia em i mekim wankain toktok olsem: *Ol brata, sapos yupela i save olsem wanpela bilong yupela i bin mekim sin, orait yupela man i bihainim Holi Spirit, yupela i mas mekim pasin isi long dispela man na helpim em long stretim pasin bilong em. Tasol yupela i mas lukaut gut long yupela yet. Nogut Satan i traim yupela na yupela tu i pundaun long sin* (Galesia 6:1).

2) *Yumi mas sanap strong na abrusim
ol samting nogut i laik pulim yumi long mekim sin*

Yumi mas beten oltaim. Tasol yumi no ken tingting olsem sapos yumi beten, orait Satan bai no traim yumi gen. Nogat tru! Maski long ol prea bilong yumi, Satan i no save malolo! Em i save traim yumi planti taim tumas! Olsem na yumi mas pait long em, na sanap strong na sakim olgeta tok bilong em. **Na yumi mas lusim olgeta samting i save pulim yumi long mekim sin!** Planti taim i save kamap olsem yumi no laik mekim sin, tasol ol pren nogut i save pulim yumi long mekim sin. O sampela taim i gat ol ples we ol manmeri i save mekim sin, na yumi tu i go long ol dispela ples, olsem na bihain yumi tu i pundaun long sin.

Olsem na Jisas i tok klia olsem: **«Sapos han bilong yu o lek bilong yu i pulim yu long mekim sin, orait yu mas katim na tromoi i go. Mobeta yu gat wanpela han tasol, o wanpela lek tasol, na yu kisim laip bilong i stap oltaim. Nogut yu gat tupela han o tupela lek na ol i tromoi yu i go long paia i no save dai. Na sapos ai bilong yu i pulim yu long mekim sin, orait yu mas kamautim na tromoi i go. Mobeta yu gat wanpela ai tasol na yu kisim laip bilong i stap oltaim. Nogut yu gat tupela ai na ol i tromoi yu i go long paia bilong hel»** (Matyu 18:8-9). Yumi mas lusim ol pren nogut na ol samting nogut i save pulim yumi long mekim sin! Nogut yumi go het long mekim ol pasin nogut na

indai i bungim yumi, na yumi lus olgeta long paia bilong hel inap oltaim oltaim!

Santu Pol i givim dispela gutpela toktok long ol Galesia olsem: *Olgeta manmeri bilong lain bilong Kraia ol i kisim olupela bel wantaim ol laik na mangal nogut bilong em, na ol i nilim pinis long diwai kros na em i dai pinis* (Galesia 5:24). Yumi mas nilim long diwai kros olgeta pasin nogut bilong yumi! Yumi mas nilim ol samting i laik pulim yumi long mekim sin. Yumi mas pas wantaim Jisas tasol, na mekim sakrifais bilong bihainim gut ol lo na mandato bilong em!

Na long pas i go long ol Efesus, santu Pol i tok moa olsem: *Orait nau mi laik pinisim tok bilong mi olsem, yupela i pas wantaim Bikpela, olsem na yupela i mas tingting long olgeta bikpela strong bilong em, na **yupela i mas sanap strong**. Yupela i mas pasim olgeta klos pait God i save givim long yumi, na bai yupela inap long **sanap strong na sakim olgeta kain pasin bilong trik na giaman Satan i save hait na mekim**. Tingim gut. Yumi no save pait long ol manmeri. Nogat. Yumi pait long ol strongpela spirit na ol gavman na ol kain kain samting i gat strong, ol i save bosim graun long dispela taim bilong tudak. Yumi pait long olgeta spirit nogut i stap antap. **Olsem na yupela i mas kisim olgeta klos pait God i save givim yupela, na long taim nogut yupela bai inap sanap strong long pait. Na long taim pait i pinis, yupela bai i sanap strong i stap yet*** (Efesus 6:10-13).

Sapos yumi i laik dai klostu long Jisas, orait yumi mas pas wantaim em taim yumi i stap laip yet. Sapos yumi bihainim laik bilong yumi yet, orait sol bilong yumi bai i lus. Sapos yumi bihainim laik bilong God, orait sol bilong yumi bai i go long heven. Santu Jems i tok: *Olsem na yupela i mas daunim yupela yet na i stap aninit long God. Yupela i mas sakim Satan, na em bai i lusim yupela na ranawe. Yupela i mas i go klostu tru long God, na em bai i kam klostu tru long yupela* (Jems 4:7-8).

3) Yumi mas kisim ol sakramen

Jisas yet i givim ol sakramen long Sios bai olgeta manmeri i ken kisim ol na i go long heven. Dispela em i as bilong olgeta sakramen bilong Katolik Sios. Na ol sakramen i kam long Jisas yet, long wanem em yet i bin kamapim ol. I no Katolik Sios i bin kamapim ol sakramen. Nogat tru! **Jisas yet i bin kamapim ol 7-pela sakramen insait long Katolik Sios.**

Na namel long ol sakramen i gat tupela yumi mas kisim oltaim: em sakramen bilong yukaris na sakramen bilong konpesio.

1) Pastaim yumi toktok liklik long sakramen bilong yukaris. Jisas yet i tok olsem dispela sakramen em i trupela bodi na blut bilong em yet. Taim Jisas i kamapim dispela sakramen em i tok klia olsem: *«Yupela kisim na kaikai. Dispela em i bodi bilong mi... Dispela em i blut bilong mi bilong mekim kontrak. Mi*

kapsaitim bilong lusim sin bilong planti manmeri» (Matyu 26:26,28). Olsem na Katolik bilip bilong yumi i tok strong olsem: yukaris em i sakramen bilong bodi na blut bilong Jisas, na Jisas yet i stap long dispela sakramen. Maski ai bilong yumi i no inap lukim Jisas long yukaris, em i stap! Long dispela as tasol yukaris em i nambawan sakramen na i winim tru ol arapela sakramen! Dispela sakramen i winim olgeta gutpela samting bilong dispela graun, long wanem Jisas yet i stap long em, wantaim bodi, blut, sol na God pasin bilong em.

Na dispela sakramen em i dua bilong heven, long wanem Jisas i tok klia olsem: «*Tru tumas mi tokim yupela, sapos yupela i no kaikai bodi bilong Pikinini Bilong Man, na sapos yupela i no dringim blut bilong em bai yupela i no gat laip i stap long yupela*» (Jon 6:53). Na em i tok moa olsem: «*Man i save kaikai bodi bilong mi na dringim blut bilong mi, em i gat laip i stap gut oltaim oltaim, na bai mi kirapim em long las de... Man i kaikai bodi bilong mi na i dringim blut bilong mi, em i stap long mi, na mi stap long em*» (Jon 6:54-56).

Ol dispela toktok bilong Jisas i skulim yumi olsem yukaris em i bikpela samting tumas sapos yumi laik i go long heven! Sapos yumi laik dai wantaim grasia bilong God long sol bilong yumi, orait yumi mas kisim dispela sakramen oltaim!

2) Nau yumi toktok liklik long sakramen bilong konpesio.
Yumi mas tokaut klia olsem: Jisas yet i bin kamapim sakramen

bilang konpesio. Stori bilang Jisas i givim pawa long ol aposel bilang tekewe sin bilang olgeta manmeri i stap long Buk Baibel yet. Long Gutnius bilang santu Jon i gat tok olsem: *Ol disaipel i lukim Bikipela, na bel bilang ol i amamas. Na Jisas i tokim ol gen: «Bel bilang yupela i ken i stap isi. Papa i bin salim mi na mi kam, na olsem tasol mi salim yupela i go». Em i tok olsem, na em i winim win bilang em i go long ol, na i tokim ol olsem: «**Yupela kisim Holi Spirit. Sapos yupela i lusim sin bilang ol man, orait sin bilang ol bai i lus. Na sapos yupela i no lusim sin bilang ol man, orait sin bilang ol bai i stap yet***» (Jon 21:20-23). Dispela toktok bilang Jisas i soim yumi olsem Jisas yet i givim pawa long ol aposel, bai long strong bilang Holi Spirit ol tu i ken lusim sin bilang ol manmeri! Na dispela pawa Jisas i givim long ol aposel i kam inap nau long han bilang ol bisop na ol pris.

Olsem na yumi no ken tingting planti long dispela sakramen. Yumi no ken tubel. Nogat tru. Yumi mas trastim Jisas, long wanem em yet i laik tekewe ol sin bilang yumi. Tasol yumi mas wok long painim pris na konpes wantaim em. Yumi mas autim olgeta sin bilang yumi long em, na sapos yumi sori tru long ol sin yumi bin mekim, orait Jisas yet bai i tekewe ol sin bilang yumi, na sol bilang yumi bai i kamap klin na kisim grasia bilang God gen. Na taim pris i apim han bilang em na i tok «...olsem na mi tekewe olgeta sin bilang yu long nem bilang Papa, na bilang Pikinini na bilang Holi Spirit» ol sin bilang yumi i pinis! Jisas i marimari long yumi na

pogivim olgeta rong yumi mi bin mekim, na sol bilong yumi i kamap klinpela gen, olsem na yumi inap long go long heven! Oltaim sol bilong yumi i mas klin olgeta, long wanem yumi no save long wanem taim indai bai i kam na kisim yumi.

* * *

Yumi no kes lustingting olsem yumi mas wok hat wantaim olgeta strong bilong i go long heven. Yumi no ken lustingting olsem indai em i pinis bilong ol samting bilong dispela graun, tasol sol bilong yumi bai i go long eterniti. Na eterniti em i laip bilong oltaim oltaim, na i no gat pinis o arere bilong em. Nogat tru. Olsem na oltaim yumi mas redi long indai, nogut em i kam taim yumi no redi na yumi lus olgeta long hel inap oltaim oltaim.

O gutpela santu Josep! Yu was santu bilong ol manmeri i laik i dai! Helpim mipela long prea bilong yu, bai mipela tu i ken dai wantaim grasia bilong God long sol bilong mipela! Strongim mipela, bai mipela i ken abrusim ol traim na pasin nogut bilong dispela graun! Helpim mipela long kisim ol sakramen planti taim, bai mipela i ken redi gut long taim bilong indai!

31

SANTU JOSEP, WAS SANTU BILONG OL PAPA

Santu Maria em i nambawan santu tru, long wanem em i Mama bilong God, na dispela nem bilong «Mama bilong God» em i bikpela tru na i winim olgeta samting. Tasol bihain long santu Maria yumi painim santu Josep.

Santu Josep em i no wanpela martir, tasol em i winim ol martir. Em i no wanpela bikpela Tisa bilong Sios, tasol em i winim ol Tisa na ol saveman bilong Sios. Em i no wanpela bisop o pris i bin mekim wok misen long ol longwe ples, tasol em i winim ol pris na ol bisop na ol pop tu. **Santu Josep em i wanpela marit man tasol.**

Na glori na bilas bilong santu Josep long heven i winim tru glori na bilas bilong ol arapela santu. Santu Josep i winim tru ol martir. Em i winim tru ol bikpela Tisa bilong Sios. Em i winim tru ol pris na ol bisop i bin mekim planti wok aposel na helpim planti tausen manmeri long go long heven. Santu Josep i winim tru ol virgo na ol manmeri i bin givim ol yet long God olsem pris na sista. Santu Josep i winim olgeta santu, na santu Maria tasol inap long winim em long heven. ***Na santu Josep em i wanem samting? Santu Josep em i wanpela marit man. Santu Josep em i wanpela papa. Santu Josep em i wanpela wokman.*** Olsem na yumi no ken tingting olsem ol martir na ol pris na ol bisop tasol bai inap long kamap santu. Nogat tru! Santu Josep em i wanpela marit man, em i wanpela papa na em i wanpela kamda, na em i winim ol arapela santu bilong heven! **Namel long yumi hia long Papua Niugini yumi gat eksampel bilong Bleset Pita ToRot.** Em i namba wan man bilong kantri bilong yumi Katolik Sios i bin makim olsem «bleset», na em tu em i wanpela marit man. Bleset Pita ToRot em i no wanpela bisop o pater o bikpela Tisa bilong Sios. Nogat. Em i wanpela maritman i bin laikim tru meri bilong em na ol pikinini bilong em, na em i bin inapim gut wok katekis bilong em. Bleset Pita Torot em i wanpela man wankain olsem ol manmeri bilong kantri bilong yumi.

Olsem na long dispela as tasol Mama Sios i makim santu Josep olsem was santu bilong olgeta Katolik papa, long wanem em i

bin inapim gut tru wok bilong em olsem marit man, olsem papa na olsem wokman. Na ol Katolik papa i sapos long bihainim dispela 3-pela pasin bilong santu Josep. Ol Katolik papa tu i mas i stap gutpela marit man, ol i mas i stap gutpela papa bilong ol pikinini bilong ol, na ol i mas i stap gutpela wokman.

Olsem na long dispela sapta yumi bai i toktok liklik long dispela 3-pasin ol Katolik papa i mas mekim: 1) Laikim meri na mekim gut long em. 2) Laikim ol pikinini na mekim gut long ol. 3) Mekim wok bilong helpim famili.

*1) Ol papa i mas laikim meri bilong ol,
na mekim gut long em*

Dispela em i nambawan samting ol papa i mas mekim: ol i mas laikim tru meri bilong ol, na mekim gut long em. Taim wanpela man i maritim wanpela meri, tupela i kamap wanpela bodi tasol. Bipo bipo tru God yet i bin tok: **«Man i save lusim papamama na i pas wantaim meri bilong em, na tupela i kamap wanpela bodi tasol»** (Stat 2:24). Olsem na ol man i mas laikim meri bilong ol wankain olsem ol i save laikim ol yet.

Planti taim i save kamap olsem planti man i tingting olsem meri bilong ol em i samting nating. O sampela man i save tingting olsem ol man i go pas, na ol meri i kam bihain. Na dispela kain tingting em i rong olgeta. Man i mas laikim meri bilong em olsem

em i laikim em yet. Olsem na ol i mas mekim gut long meri bilong ol, na olgeta taim ol i mas lukautim ol.

Yumi skelim pasin bilong santu Josep. Em i bin laikim meri bilong em wantaim olgeta strong bilong em. Em i bin lukautim meri oltaim. Oltaim santu Josep i mekim meri bilong em i go pas, na em yet i go bihain. Long taim Holi Famili i bungim hevi, orait santu Josep i bin wok hat bilong halivim meri bilong em, na em i bin mekim planti sakrifas bilong helpim meri long i stap gut.

Tasol planti taim namel long yumi dispela samting i no save kamap. Planti taim yumi harim olsem ol man i save paitim meri bilong ol. O planti taim ol man i save toknogutim meri bilong ol. O planti taim ol man i save kaikai gut na larim ol meri i kaikai bihain na kaikai liklik tasol. Orait, ol dispela pasin i rong long ai bilong God. Ol man i no gat rait long paitim meri bilong ol, maski sampela taim ol meri i save bikhet. Ol man i no gat rait long toknogutim meri bilong ol, maski sampela taim ol meri i save mekim ol samting i no stret tu. Sapos i gat hevi namel long man o meri, orait ol i mas sindaun tasol na stretim toktok. Na sapos kros em i bikpela na tupela i no inap toktok gut, orait ol i mas toktok long neks de. Tasol sapos wanpela man i paitim meri bilong em o toknogutim em, orait dispela samting i soim olsem man i no save laikim meri bilong em olsem em i laikim em yet.

Na i gat narapela pasin nogut tu i save kamap namel long yumi, na dispela pasin em i rabis tru. Planti taim yumi harim olsem sampela marit man i save raun raun wantaim ol arapela meri. O sampela man i save lukim ol piksa na video i doti. Sori tumas long ol dispela man! Ol i wok long mekim bikpela sin long ai bilong God, na God bai i givim pe long ol inap long rabis pasin ol i bin mekim! Maski ol man i save hait bilong mekim ol dispela sin, God inap long lukim olgeta samting! Olsem na ol i tingting olsem ol i inap long giamanim meri bilong ol, tasol ol i no inap long giamanim God. Dispela pasin em i nogut tru na yumi mas abrusim em wantaim olgeta strong bilong yumi. Na tu yumi no ken i stap pren bilong ol man i save mekim ol dispela rabis pasin, long wanem wanpela de bai i kamap na ol bai i pulim yumi tu long mekim dispela sin.

*2) Ol papa i mas laikim ol pikinini bilong ol,
na mekim gut long ol*

Dispela pasin tu em i bikpela tru. **Yumi no ken lustingting olsem ol pikinini i kam long han bilong God, olsem na ol pikinini i no samting bilong papamama tasol.** Nogat tru. Ol pikinini ol i samting bilong God pastaim, na God yet i givim long papamama, bai papamama i lukautim gut dispela pikinini. Olsem na ol papamama i no inap long mekim long pikinini long laik

bilang ol yet tasol. Nogat. Ol papamama i mas bihainim laik bilang God na inapim gut wok papamama bilang ol, long wanem God yet i bin trastim ol pikinini long ol.

Yumi skelim pasin bilang santu Josep. Oltaim em i bin mekim gut long pikinini Jisas. Oltaim santu Josep i bin lukautim pikinini Jisas, na em i bin wok hat bai pikinini i no ken sot long wanpela samting. Santu Josep i bin mekim planti sakrifais bilang inapim gut wok papa bilang em. Oltaim em i bin putim Jisas olsem namba wan samting, na em i putim em yet olsem namba 2.

Planti taim namel long yumi i save kamap olsem yumi lukim ol pikinini i sot long planti samting, tasol papa bilang ol i save yusim planti mani bilang baim bia na ol samting bilang em yet. Planti taim yumi save lukim klos bilang ol pikinini i doti na i bruk nabaut, tasol papa bilang ol i gat ol naispela klos na i no sot long wanpela samting. Na dispela pasin bilang ol dispela papa em i rong olgeta long ai bilang God. Ol papa i sapos long putim pikinini bilang ol olsem namba wan samting, na ol papa i mas i stap namba 2. Kain olsem, sapos i no gat planti kaikai long haus, orait ol papa i mas larim ol pikinini i kaikai gut pastaim, na ol papa i mas kaikai bihain.

Na planti taim yumi save harim ol papa i krosim nating ol pikinini bilang ol, na sampela taim ol i save toknogutim ol na paitim ol nogut tru. Sori tumas long ol dispela papa! Ol i no inapim gut dipela wok olsem papa God yet i bin givim ol bilang

mekim! Sori long ol, long wanem God i no amamas long wok bilong ol!

3) Ol papa i mas mekim wok bilong helpim famili

Buk Baibel i tok olsem God yet i bin kamapim dispela graun wantaim olgeta gutpela samting i stap long em. Na God i bin kamapim graun bai ol man i ken wok hat na painim ol kaikai samting long em. **Olsem na God yet i tok olsem ol man i mas wok hat.** I no gutpela long ol man i stap nating long haus. Nogat tru. Dispela pasin bilong i stap nating long haus em i rong long ai bilong God!

Yumi skelim santu Josep. Buk Baibel i tok olsem em i wok olsem kamda. Santu Josep i tuhat tru long stoa bilong em long Nasaret. Olgeta de em i save wok hat na tuhat, bai wok bilong em i ken helpim em long baim ol samting Maria na Jisas i sot long em. Santu Josep i no save stap nating long haus. Nogat tru! Santu Josep em i man bilong wok tru, na yumi toktok pinis long dispela samting long sapta 27 bilong dispela buk.

Planti taim namel long yumi i gat sampela ol papa i save sindaun nating long haus. Ol i stap nating long taim san i kamap inap long taim san i go daun. Ol i save salim ol meri i go long gaden bilong kisim kaikai, tasol ol papa yet i no save go. Nogat. Ol i save salim ol meri na pikinini long mekim wok, tasol ol yet i sindaun nating

long haus o long ol ples bung. Sori tumas long ol dispela papa! Ol i wok long sakim tok bilong God, long wanem God yet i bin makim ol papa long go pas long mekim wok! Sori tumas long ol man i sindaun nating na i les long mekim wok! Ol dispela man bai i kisim pe inap long lespasin bilong ol!

* * *

Olsem na long dispela sotpela meditesen yumi laik askim santu Josep long strongim ol man, bai ol i ken inapim gut dispela misen God yet i bin givim long ol. Yumi askim santu Josep long givim gutpela tingting long ol man, bai ol i ken laikim tru meri bilong ol, bai ol i ken lukautim gut ol pikinini bilong ol, na bai ol i ken kamap man bilong wok na helpim famili bilong ol oltaim.

O gutpela santu Josep! Yu go pas long ol papa bilong dispela graun! Helpim mipela long bihainim oltaim ol gutpela pasin na eksampel bilong yu! Mipela tu i laik kamap santu na go long heven, olsem na mipela tu i mas laikim meri bilong mipela, mipela tu i mas mekim gut long ol pikinini bilong mipela, na mipela tu i mas tuhat na mekim wok bilong helpim famili bilong mipela oltaim!

OL PREA NA LITANI
BILONG SANTU JOSEP



*Prea bilong putim yumi yet
aninit long lukaut bilong santu Josep*

O gutpela santu Josep! Yu papa bilong Jisas. Yu man bilong Maria. Yu go pas long Holi Famili. Yu was santu bilong Katolik Sios. Yu was santu bilong ol famili bilong dispela graun. Tude mi makim yu olsem spesel was santu bilong mi. Mi laik ran i kam long yu long taim bilong hevi na wari. Givim gutpela tingting na strong long mi, bai mi ken bihainim ol gutpela pasin bilong yu. Helpim mi long prea gut, long wanem oltaim yu bin toktok wantaim Jisas, em i God tru na Bikpela bilong Mipela. Mi laik pas wantaim Jisas, Maria na yu oltaim. Helpim mi long bihainim gut ol mandato bilong God. Na long taim indai i laik kisim mi, helpim mi long i dai wantaim grasia bilong God long sol bilong mi. Long taim mi i stap laip yet na long taim bilong indai mi laik givim glori long God tasol. Amen.

*Prea bilong askim ol santing
long santu Josep*

Santu Josep, yu gutpela man bilong santu Maria na gutpela wasman bilong mi. I no gat wanpela man o meri i bin singaut long yu, na yu bin les long harim singaut bilong em. Nogat. Olsem na mi tu i laik singaut long yu, long wanem mi trastim yu na mi save olsem yu bai i harim ol singaut bilong mi. Yu gutpela tumas, olsem na yu no inap long sakim tok bilong ol manmeri i askim yu long helpim ol. Santu Josep, yu papa bilong Jisas, em i Bikpela bilong yumi. Mi askim yu long harim ol prea bilong mi na marimari long mi oltaim. Amen.

*Prea long santu Josep
Pop santu Pius namba 10 i bin mekim*

O santu Josep, yu pulap long glori! Yu wasman na eksampel bilong ol wok manmeri. Helpim mi long inapim gut olgeta wok bilong mi. Mi laik ofarim olgeta wok bilong mi olsem penans, bai God i ken tekewe olgeta sin bilong mi. Mi laik wok gut, long wanem mi save olsem mi mas bihainim laik bilong God na mi no ken bihainim lespasin bilong mi. Mi laik wok wantaim amamas na tok tenkyu i go long God Triwan, long wanem God yet i givim sans long mi long mekim wok, na em yet inapim mi long mekim gut wok bilong mi. Mi laik wok wantaim peisens na bel isi, bai gutpela sindaun i ken i stap oltaim long ples bilong wok. Mi laik winim lespasin bilong mi na mi no laik ranawe long ol samting i hat long mekim. Mi laik lustingting long mi yet na givim mi yet olgeta long God tasol. Oltaim mi laik tingim indai bilong mi, long wanem long de bilong kot mi mas tok long as bilong olgeta pasin bilong mi, na tu mi mas tok long as bilong olgeta taim mi bin les long mekim wok. Long taim bilong kot

God bai i askim mi long as bilong olgeta samting mi bin mekim long taim bilong wok. Olsem na nau mi laik mekim wok bilong mi wantaim bel bilong mi olgeta. Na mi laik givim wok bilong mi long Jisas, long santu Maria na long yu yet, o gutpela wasman bilong mi, santu Josep! Mi laik i stap wantaim yupela long heven inap oltaim oltaim. Amen.

*Prea long santu Josep
Pop Lia namba 13
i bin mekim*

O gutpela wasman bilong mi, santu Josep! Tude mi kam long yu bilong askim yu long helpim mi. Mi beten pinis long meri bilong yu, santu Maria, tasol nau mi laik beten long yu tu. Tingim laik bilong yu i go long santu Maria na helpim mi long ol samting i save mekim bel bilong mi i hevi. Tingim laik bilong yu i go long Pikinini Jisas na helpim mi long go long heven. Jisas i bin kapsaitim blut bilong em bilong kisim bek mipela, olsem na mi askim yu long tingim dispela sakrifais bilong Jisas, bai yu tu i ken marimari long mi na harim olgeta singaut bilong mi.

O gutpela wasman bilong Holi Famili! Sambai long mipela tu, ol manmeri i stap lain bilong Jisas. Helpim mipela long abrusim ol pasin nogut na long winim olgeta tingting i laik paulim bilip bilong mipela. Yu i stap antap tru long heven, olsem na yu gat strong bilong helpim mipela oltaim. Satan na ol spirit nogut i

laik bagarapim mipela na pulim mipela long mekim sin na i go long hel, tasol strong bilong yu inap long daunim ol traim nogut bilong em. Na mipela i askim yu tu long was long Katolik Sios bilong God, long wanem planti manmeri nogut i wok hat long daunim em na rabisim em.

O gutpela santu Josep! Sambai long mipela oltaim! Strongim mipela long bihainim ol gutpela eksampel bilong yu, bai mipela tu i ken i go long heven wantaim yu, Jisas na santu Maria. Helpim mipela long i dai wankain olsem yu bin i dai, klostu long Jisas na santu Maria. Amen.

*Prea bilong askim santu Josep
long dai wantaim grasia bilong God*

O gutpela wasman bilong mi, santu Josep! Mi askim yu long was long mi long taim mi i stap laip na long taim bilong indai. Helpim mi long prea gut na long mekim wok bilong Jisas oltaim. Sambai long mi bai mi ken abrusim ol sin i laik pulim mi i go long hel. No ken larim indai i bungim mi long taim mi no redi. Nogat. Givim sans long mi long redim mi yet gut long bungim Jisas na long sanap long kot bilong em. Helpim mi long kisim ol sakramen bilong Sios long taim mi laik i dai. Mi laik redim mi yet gut long indai, bai long las win bilong mi, mi ken tok «Jisas, Maria na Josep, mi givim sol bilong mi long han bilong yupela». Amen.

*Prea bilong askim santu Josep
long helpim ol manmeri i laik i dai*

O santu Josep, yu was santu bilong ol manmeri klostu i laik i dai! Marimari long dispela man (o meri) i sik nogut tru na klostu i laik i dai. Em i wok long karim bikipela pen nau, na i no longtaim em bai i sanap long kot bilong God. No ken lustingting long em. Nogat. Givim strong long em, bai em i ken pilim marimari bilong yu na bilong Jisas na santu Maria. Yu gutpela papa bilong Jisas, olsem na mi askim yu long sambai long dispela man (o meri) wankain olsem yu bin sambai long Jisas oltaim. Na askim Jisas long welkamim em long taim em i lusim dispela graun.

O gutpela santu Josep! Marimari long mi tu long taim indai i laik bungim mi. Amen.

Ol litani bilong santu Josep 1

Lord, marimari long mipela

Krais, marimari long mipela

Lord, marimari long mipela

Krais, harim prea bilong mipela

God Papa bilong heven

Marimari long mipela

God Pikinini, Ridima bilong ol manmeri

Marimari long mipela

God Holi Spirit

Marimari long mipela

Holi Trinit, wanpela God tasol

Marimari long mipela

Santu Maria, meri bilong santu Josep

Prea bilong helpim mipela

Santu Josep, wasman bilong Holi Famili

Prea bilong helpim mipela

Santu Josep, man bilong Maria

Prea bilong helpim mipela

Santu Josep, yu bin lukautim Mama bilong God

Prea bilong helpim mipela

Santu Josep, papa bilong Jisas

Prea bilong helpim mipela

Santu Josep, yu papa bilong King bilong heven na graun

Prea bilong helpim mipela

Santu Josep, yu bin lukautim bebi Jisas

Prea bilong helpim mipela

Santu Josep, yu bin givim kaikai long pikinini Jisas

Prea bilong helpim mipela

Santu Josep, yu bin was long pikinini Jisas

Prea bilong helpim mipela

Santu Josep, yu bin givim haus long Jisas

Prea bilong helpim mipela

Santu Josep, Pikinini Jisas i bin harim tok bilong yu

Prea bilong helpim mipela

Santu Josep, yu go pas long ol tumbuna bilong Israel

Prea bilong helpim mipela

Santu Josep, yu save helpim mipela long ol hevi na wari

Prea bilong helpim mipela

Santu Josep, yu papa bilong ol tarangu

Prea bilong helpim mipela

Santu Josep, yu pulap long grasia

Prea bilong helpim mipela

Santu Josep, yu go pas long ol santu

Prea bilong helpim mipela

Santu Josep, yu man bilong harim tok bilong God

Prea bilong helpim mipela

Santu Josep, yu stretpela man tru

Prea bilong helpim mipela

Santu Josep, yu virgo oltaim

Prea bilong helpim mipela

Santu Josep, yu klin olgeta

Prea bilong helpim mipela

Santu Josep, yu man bilong daunpasin

Prea bilong helpim mipela

Santu Josep, yu man bilong prea

Prea bilong helpim mipela

Santu Josep, was santu bilong ol manmeri klostu i laik i dai

Prea bilong helpim mipela

Santu Josep, was santu bilong Katolik Sios

Prea bilong helpim mipela

Santu Josep, was santu bilong ol wokman

Prea bilong helpim mipela

Santu Josep, was santu bilong ol papa

Prea bilong helpim mipela

Santu Josep, was santu bilong mipela

Prea bilong helpim mipela

Ol litani bilong santu Josep 2

Lord, marimari long mipela

Krais, marimari long mipela

Lord, marimari long mipela

Krais, harim prea bilong mipela

God Papa bilong heven

Marimari long mipela

God Pikinini, Ridima bilong ol manmeri

Marimari long mipela

God Holi Spirit

Marimari long mipela

Holi Trinita, wanpela God tasol

Marimari long mipela

Santu Maria

Prea bilong helpim mipela

Santu Josep

Prea bilong helpim mipela

Tumbuna bilong Devit

Prea bilong helpim mipela

Yu go pas long ol Tumbuna bilong Israel

Prea bilong helpim mipela

Man bilong Mama bilong God

Prea bilong helpim mipela

Klinpela man bilong Virgo Maria

Prea bilong helpim mipela

Papa bilong Jisas

Prea bilong helpim mipela

Yu lukautim pikinini Jisas

Prea bilong helpim mipela

Yu het bilong Holi Famili

Prea bilong helpim mipela

Santu Josep, yu stretpela man

Prea bilong helpim mipela

Santu Josep, yu klin olgeta

Prea bilong helpim mipela

Santu Josep, yu man bilong skelim gut ol samting

Prea bilong helpim mipela

Santu Josep, sol bilong yu i strong tumas

Prea bilong helpim mipela

Santu Josep, yu man bilong harim tok

Prea bilong helpim mipela

Santu Josep, yu man bilong peisens

Prea bilong helpim mipela

Santu Josep, yu man i no gat planti samting

Prea bilong helpim mipela

Santu Josep, yu go pas long ol wok manmeri

Prea bilong helpim mipela

Santu Josep, yu save lukautim ol manmeri i stap virgo

Prea bilong helpim mipela

Santu Josep, yu save lukautim ol famili

Prea bilong helpim mipela

Santu Josep, yu save givim bel isi long ol manmeri i bel hevi

Prea bilong helpim mipela

Santu Josep, yu save givim hop long ol manmeri i sik

Prea bilong helpim mipela

Santu Josep, yu save helpim ol manmeri i laik i dai

Prea bilong helpim mipela

Santu Josep, Satan i pret nogut tru long yu

Prea bilong helpim mipela

Santu Josep, yu was santu bilong Katolik Sios

Prea bilong helpim mipela

*Ol litani bilong santu Josep
santu Jon Eudes i bin mekim*

Lord, marimari long mipela

Krais, marimari long mipela

Lord, marimari long mipela

Krais, harim prea bilong mipela

God Papa bilong heven

Marimari long mipela

God Pikinini, Ridima bilong ol manmeri

Marimari long mipela

God Holi Spirit

Marimari long mipela

Holi Trinit, wanpela God tasol

Marimari long mipela

Santu Maria

Prea bilong helpim mipela

Santu Josep, piksa bilong God Papa

Prea bilong helpim mipela

Santu Josep, papa bilong God Pikinini

Prea bilong helpim mipela

Santu Josep, tabernakel bilong God Holi Spirit

Prea bilong helpim mipela

Santu Josep, wasman bilong Sevia bilong mipela

Prea bilong helpim mipela

Santu Josep, man bilong santu Virgo Maria

Prea bilong helpim mipela

Santu Josep, tumbuna bilong King Devit

Prea bilong helpim mipela

Santu Josep, yu lainim Jisas long olgeta samting

Prea bilong helpim mipela

Santu Josep, yu givim kaikai long Jisas

Prea bilong helpim mipela

Santu Josep, God Papa i laikim yu tumas

Prea bilong helpim mipela

Santu Josep, God Papa i makim yu olsem papa bilong Jisas

Prea bilong helpim mipela

Santu Josep, Jisas yet i kolim yu "papa"

Prea bilong helpim mipela

Santu Josep, Holi Spirit i pulapim yu long olgeta gracia

Prea bilong helpim mipela

Santu Josep, wasman bilong santu Maria

Prea bilong helpim mipela

Santu Josep, yu redim olgeta samting long groto bilong Betlehem

Prea bilong helpim mipela

Santu Josep, yu namba wan man i bin adorim bebi Jisas

Prea bilong helpim mipela

Santu Josep, yu givim nem long bebi Jisas

Prea bilong helpim mipela

Santu Josep, yu helpim Jisas long ranawe long kantri Isip

Prea bilong helpim mipela

Santu Josep, yu kisim Jisas i kam bek long ples Nasaret

Prea bilong helpim mipela

Santu Josep, yu wok bilong painim Jisas taim em i lus long Tempel

Prea bilong helpim mipela

Santu Josep, yu lainim Jisas long wok olsem kamda

Prea bilong helpim mipela

Santu Josep, Jisas na Maria i harim tok bilong yu oltaim

Prea bilong helpim mipela

Santu Josep, Jisas na Maria i trastim yu oltaim

Prea bilong helpim mipela

Santu Josep, yu dai long han bilong Jisas na Maria

Prea bilong helpim mipela

Devosen bilong 30-pela de i go long santu Josep

Tok i go pas long dispela devosen

Dispela devosen em i bikpela samting tru. Long bipo tru i kam inap nau planti tausen Katolik manmeri i bin beten wantaim dispela devosen. Dispela devosen i save kamap tru long yau bilong santu Josep, na i save mekim kain kain mirakel i kamap insait long laip bilong yumi. Tasol yumi no ken lustingting olsem yumi mas askim santu Josep ol gutpela samting tasol, na sapos dispela samting yumi askim em i gutpela na em bai i helpim yumi long go long heven, orait santu Josep bai i givim long yumi. Sapos yumi askim long kisim ol samting bilong graun tasol, em bai i hat long santu Josep i bekim singaut bilong yumi.

Na rot bilong beten dispela devosen em i isi tru: yumi mas beten dispela devosen 30-pela de olgeta, na yumi no ken lusim wanpela de. Em i gutpela long yumi statim dispela devosen long namba 1 de bilong mun, bai long pinis bilong dispela mun yumi ken inapim ol 30-pela de bilong em.

Em i gutpela tru long yumi beten dispela devosen klostu long wanpela statu o piksa bilong santu Josep.

DEVOSEN BILONG 30-PELA DE I GO LONG SANTU JOSEP

O gutpela wasman bilong mi, santu Josep! Mi man (o meri) nating na mi daunim mi yet long ai bilong yu, long wanem mi samting nating na mi pulap long sin. Tasol mi tingting long yu i stap long heven na sol bilong mi i amamas tru. Mi tingting long gutpela sia yu kisim long heven, na mi tingting tu olsem ol santu bilong heven i save givim glori long yu na amamas long yu. Mi save tu olsem yu gutpela papa bilong ol manmeri i sot long planti samting na i stap olsem pikinini i no gat papamama. Mi save olsem yu save givim bel isi na amamas long ol manmeri i bel hevi. Mi save olsem yu save harim ol prea bilong ol ensel na ol santu i singaut long God. Mi save olsem yu save harim ol prea bilong ol ensel na ol santu i singaut long Jisas na long meri bilong yu, Maria.

Tude mi kam long yu, long wanem mi i stap tarangu long ai bilong God. Bel bilong mi i hevi na mi sot long planti samting. Olsem na mi askim yu long lukim aiwara bilong mi na harim ol hevi na wari bilong mi. Sol bilong mi i singaut long yu, na mi askim yu long harim mi. Mi sori tru long ol sin mi bin mekim, na mi

hop long yu bai i harim ol prea bilong mi. Olsem na mi kam long yu bilong givim ol hevi na wari bilong mi long yu. Mi kam long yu bai yu ken stretim ol samting nogut bilong laip bilong mi. Mi kam long yu bai yu ken helpim mi long ol samting nogut i laik kamap long mi. Mi kam long yu bai yu ken halivim mi long ol samting mi sot long em. Mi kam long yu bai yu ken givim grasia long mi na long famili na ol pren bilong mi tu.

Na bai yu ken harim dispela prea bilong mi, bai mi beten 30-pela de olgeta, long wanem yu bin i stap 30-pela yia olgeta wantaim Jisas na Maria. Mi trastim yu tumas, olsem na mi laik kolim gen olgeta gutpela pasin yu bin mekim taim yu i stap yet long graun, long wanem ol gutpela pasin bilong yu i givim hop long mi. Mi save olsem yu bai i no les long harim ol singaut bilong mi na helpim mi. Bilip na hop bilong mi i go long yu em i bikpela tru, olsem na mi trastim yu oltaim. Na mi save tu olsem yu gutpela tumas, olsem na yu bai i givim long mi ol samting mi no bin askim long yu tu.

1) Tingim bikpela laikim pasin bilong Tok bilong God i kamap man na i kam i stap namel long yumi. Em i Pikinini bilong God, em yet em i God tru na em i God bilong ol manmeri.

2) Tingim bikipela bel hevi bilong yu long taim yu tingting long lusim santu Maria, long wanem yu save olsem em i kisim bel long Holi Spirit.

3) Tingim bikipela bel hevi bilong yu long taim yu daunim yu yet na yu wok hat bilong painim wanpela groto bilong Maria i ken karim Jisas, na dispela groto i kamap olsem haus king bilong God i kamap man na i kam i stap namel long yumi.

4) Tingim bikipela daunpasin bilong yu long taim ol i katim skin bilong pikinini Jisas, na yu givim nem long em olsem Bikipela yet i bin tokim yu.

5) Tingim bikipela bel hevi bilong yu long taim ensel i tokim yu olsem ol i laik kilim pikinini Jisas i dai. Tingim tu daunpasin bilong yu long taim yu harim tok bilong God na yu ranawe na i go long Isip. Tingim olgeta pen na hevi yu bin karim long wokabaut namel long ples wesan nating. Tingim tu olsem long Isip yu bin sot long planti samting. Na tingim tu long wokabaut bilong yu i kam long Nasaret.

6) Tingim bel hevi bilong yu long taim pikinini Jisas i lus long Tempel 3-pela de olgeta. Tingim amamas bilong yu long taim yu painim em. Tingim tu bikipela amamas bilong yu long 30-pela yia yu bin i stap wantaim Jisas na Maria long haus bilong Nasaret.

Tingim tu long Jisas na santu Maria i harim tok bilong yu oltaim.

7) Tingim bikipela sakrifais bilong yu long taim yu ofarim pikinini Jisas long God Papa, long wanem yu save pinis olsem ol bai i nilim em long diwai kros, na em bai i dai bilong pogivim ol sin bilong yumi na kisim bek yumi.

8) Tingim gen long olgeta taim yu bin holim han bilong pikinini Jisas long han bilong yu, na yu tingting olsem wanpela de ol nil bai i sutim dispela tupela han long diwai kros. Tingim tu long olgeta taim pikinini Jisas i bin slipim het bilong em long bros bilong yu, na yu tingting olsem wanpela de bai i kamap na ol bai i putim rop i gat nil long het bilong em. Tingim gen long olgeta taim yu bin holimpasim bodi bilong pikinini Jisas long han bilong yu, na yu tingting olsem wanpela de bodi bilong Jisas bai i hangamap long diwai kros. Tingim gen long olgeta taim yu bin tingting long Pen na Indai bilong Jisas, na yu bin sori long Jisas i mas i dai long diwai kros.

9) Tingim gen long indai bilong yu long han bilong Jisas na Maria. Tingim gen long taim yu go insait long ples bilong ol i dai pinis, na bihain Jisas i kisim yu i go long heven.

10) Tingim gen long bikpela amamas na glori long taim yu lukim Jisas i kirap long indai. Tingim gen long bikpela amamas na glori taim yu lukim Asensio bilong Jisas na yu lukim em i go insait long heven wantaim bikpela glori na bilas bilong em. Tingim gen long bikpela amamas taim yu lukim Jisas i kisim sia bilong em long heven olsem King bilong olgeta samting.

11) Tingim gen long bikpela amamas bilong yu long taim yu lukim meri bilong yu i kirap long matmat na ol ensel i kisim em i go long heven. Tingim gen long amamas bilong yu long taim yu lukim ol ensel na God Papa yet i mekim santu Maria i sindaun antap tru long heven.

12) Tingim gen long olgeta hatwok bilong yu, na olgeta taim nogut bilong yu, na olgeta sakrifais bilong yu. Tingim gen long bikpela amamas na glori yu bin kisim long heven wantaim Jisas na meri bilong yu, santu Maria.

O gutpela wasman bilong mi, santu Josep! Holi Katolik Sios, na ol Tisa, na santu na saveman bilong Sios i tok olsem pawa bilong yu i bikpela tumas long heven. Olsem na mi trastim yu, na mi kam long yu bilong askim yu long harim ol singaut bilong mi. Mi

save olsem yu bai i harim ol prea bilong mi, olsem na nau mi laik putim long ai bilong yu olgeta wari na hevi bilong mi:

*(nau yumi mas kolim dispela grasia
yumi laik askim long santu Josep)*

O gutpela santu Josep! Helpim tu ol man na meri i bin askim mi long prea bilong helpim ol. Givim long ol tu olgeta samting ol i sot long em.

Santu Josep, prea bilong helpim mipela, bai mipela i ken kisim olgeta samting Jisas i bin promisim mipela pinis.

Las prea: O God, yu yet i bin makim santu Josep olsem man bilong Mama bilong yu, Santu Maria. Mipela ol manmeri bilong graun i onarim em, olsem na mekim santu Josep i kamap namelman bilong mipela na yu long heven. O God, yu i stap laip na yu King oltaim oltaim. Amen.

*Ol 7-pela sori na amamas
bilang santu Josep*

Tok i go pas long dispela devosen

Plantu manmeri i save long devosen long ol 7-pela sori bilang santu Maria. Tasol i no plantu manmeri i save long devosen long ol 7-pela sori na amamas bilang santu Josep. Dispela devosen long ol 7-pela sori na amamas bilang santu Josep em i olupela tru insait long Katolik Sios, na i save helpim plantu manmeri long kisim kain kain grasia.

I gat tupela rot bilang beten dispela devosen. **1) Namba wan rot**, sampela manmeri i save beten dispela devosen long 7-pela de bilang wanpela wik, olsem na namel long wanpela wik tasol ol i pinisim dispela devosen. **2) Namba tu rot**, sampela manmeri i save beten dispela devosen long Sande tasol, olsem na ol i mas beten 7-pela Sande, long taim ol i go long santu Misa. Na dispela rot em i gutpela moa yet, long wanem long santu Misa yumi kisim Jisas.

Na rot bilang beten dispela devosen em i olsem: pastaim yumi mas kolim wan wan sori na amamas bilang santu Josep. Bihain yumi mas sarap liklik taim na tingting long dispela sori na amamas bilang em. Bihain yumi mas beten 1-pela Papa bilang mipela, 1-pela Ave Maria na 1-pela Ona.

OL 7-PELA SORI NA AMAMAS BILONG SANTU JOSEP

NAMBA 1 SORI NA AMAMAS BILONG SANTU JOSEP

SORI: Santu Josep i luksave olsem Maria i gat bel, na em i laik lusim em isi tasol (Matyu 1:19).

AMAMAS: Ensel i toksave long em olsem dispela pikinini em i Pikinini bilong God Antap (Matyu 1:20).

O klinpela santu Josep! Yu gutpela man bilong santu Maria, olsem na yu tingting planti long taim yu luksave olsem Maria i gat bel. Na yu sori tumas, long wanem yu laik lusim em isi tasol. Tasol bikpela amamas i kamap long yu long taim wanpela ensel i toksave long yu olsem dispela pikinini i stap long bel bilong Maria em i Pikinini bilong God, na dispela pikinini em i God tru i kamap man.

Tingim dispela sori na amamas bilong yu na strongim sol bilong mipela, bai mipela i ken pas wantaim Jisas long taim mipela i stap laip na tu long taim mipela bai i dai. Mipela tu i laik dai wantaim Jisas na santu Maria.

Papa bilong mipela... Ave Maria... Ona...

NAMBA 2 SORI NA AMAMAS BILONG SANTU JOSEP

SORI: Long groto bilong Betlehem Jisas i no gat wanpela samting (Luk 2:7).

AMAMAS: Sevia bilong olgeta manmeri i kamap man na em bai i kisim bek mipela (Luk 2:7).

O gutpela santu Josep! Yu winim tru ol tumbuna bilong Israel, long wanem God Papa yet i bin makim yu bilong lukautim Pikinini Jisas, em i God yet na Bikpela bilong yumi. Yu sori tumas, long wanem long groto bilong Betlehem Jisas i sot long olgeta samting, na yu no inap long halivim em. Tasol bikpela amamas i kamap long yu long taim yu lukim planti tausen ensel bilong heven i kam bilong adorim dispela liklik bebi.

Tingim dispela sori na amamas bilong yu na helpim mipela long lustingting long ol samting bilong graun, bai long taim bilong indai mipela tu i ken harim ol ensel i singsing amamas na welkamim mipela i go insait long heven.

Papa bilong mipela... Ave Maria... Ona...

NAMBA 3 SORI NA AMAMAS BILONG SANTU JOSEP

SORI: Ol i katim skin bilong bebi Jisas (Luk 2:21).

AMAMAS: Josep i givim nem «Jisas» long bebi (Matyu 1:25).

O gutpela santu Josep! Yu man bilong harim tok bilong God na yu save bihainim gut ol lo bilong Israel. Yu sori tumas, long wanem ol i katim skin bilong bebi Jisas, na yu lukim blut bilong em i kapsait. Tasol bikpela amamas i kamap long yu long taim yu yet i givim nem «Jisas» long em, long wanem dispela nem i save givim laip bilong oltaim long mipela.

Tingim dispela sori na amamas bilong yu na helpim mipela long abrusim ol sin i laik pulim mipela long sakim ol tok na lo bilong God, long wanem mipela i laik i stap gut na i dai wantaim nem bilong Jisas long sol bilong mipela oltaim.

Papa bilong mipela... Ave Maria... Ona...

NAMBA 4 SORI NA AMAMAS BILONG SANTU JOSEP

SORI: Tok profet bilong Simeon (Luk 2:34).

AMAMAS: Jisas bai i kisim bek ol manmeri (Luk 2:34).

O gutpela santu Josep! God Papa yet i bin makim yu bilong lukautim Jisas, em i Sevia na Ridima bilong mipela. Yu sori tumas, long wanem profet Simeon i tok klia olsem pikinini Jisas i mas karim bikipela pen na wanpela spia i mas sutim tru lewa bilong Maria, em meri bilong yu. Tasol bikipela amamas i kamap long yu long wanem yu save olsem dispela pikinini bai i kisim bek ol manmeri, na long namba 3 de em bai i kirap bek long matmat.

Tingim dispela sori na amamas bilong yu na askim Jisas long kisim mipela olsem wokboi na wokmeri nating bilong em, long wanem mipela tu i laik i stap lain bilong em na amamas wantaim em long heven inap oltaim oltaim.

Papa bilong mipela... Ave Maria... Ona...

NAMBA 5 SORI NA AMAMAS BILONG SANTU JOSEP

SORI: Holi Famili i ranawe long Isip (Matyu 2:14).

AMAMAS: Jisas i winim tru ol giaman god bilong ol Isip (Aisaia 19:1).

O gutpela santu Josep! God Papa yet i bin askim yu long kisim bebi Jisas wantaim mama bilong em na i ranawe i go long Isip. Yu sori tumas, long wanem dispela wokabaut em i longpela tumas, na yu painim hat tru long halivim meri bilong yu wantaim bebi Jisas. Tasol bikpela amamas i kamap long yu long wanem yu bringim Jisas i go long dispela kantri i pulap long ol giaman God, olsem na yu givim sans long ol manmeri bilong Isip long lukim Jisas, em i trupela God, long ai bilong ol.

Tingim dispela sori na amamas bilong yu na helpim mipela long ranawe long ol samting bilong dispela graun i laik pulim yumi long mekim sin, long wanem mipela i laik i stap oltaim aninit long Jisas, em i trupela God bilong mipela.

Papa bilong mipela... Ave Maria... Ona...

NAMBA 6 SORI NA AMAMAS BILONG SANTU JOSEP

SORI: Holi Famili i lusim Isip na i kam bek long Nasaret (Matyu 2:22).

AMAMAS: Santu Josep i stap wantaim Jisas na santu Maria long haus bilong Nasaret (Luk 2:39).

O gutpela santu Josep! Yu harim tok bilong God Papa, olsem na yu lusim kantri Isip na kam bek long Nasaret. Yu sori tumas, long wanem dispela wokabaut i no isi, na tu yu pret long wanem yu save olsem Arkelaus i kisim ples King Herot, na Arkelaus em i wanpela man nogut tu. Tasol bikipela amamas i kamap long yu taim yu kam kamap long ples Nasaret na yu bin i stap 30-pela yia olgeta wantaim Jisas na Maria long haus bilong Nasaret.

Tingim dispela sori na amamas bilong yu na strongim mipela long winim ol samting i save mipela i pret, bai mipela i ken i stap wantaim Jisas na santu Maria long lewa bilong mipela inap oltaim oltaim.

Papa bilong mipela... Ave Maria... Ona...

NAMBA 7 SORI NA AMAMAS BILONG SANTU JOSEP

SORI: Mangi Jisas i lus long Tempel (Luk 2:45).

AMAMAS: Maria na Josep i painim Jisas namel long ol tisa insait long Tempel (Luk 2:46).

O gutpela santu Josep! Yu go pas long ol santu bilong heven. Yu sori tumas, long wanem mangi Jisas i lus long Tempel na yu wantaim meri bilong yu i bin tingting planti na bel hevi. Tasol bikpela amamas i kamap long yu taim yu painim em i sindaun namel long ol tisa bilong Israel, na ol i kirap nogut tru long save bilong dispela mangi.

Tingim dispela sori na amamas bilong yu na strongim mipela bai mipela i no ken mekim mortal sin na lusim Jisas. Nogat tru. Na sapos mipela i lusim Jisas long ol sin bilong mipela, orait helpim mipela long painim em gen long konpesio, bai mipela i ken dai wantaim grasia bilong em insait long sol bilong mipela.

Papa bilong mipela... Ave Maria... Ona...

OL BUK LONG TOK PISIN
OL PRIS BILONG INSTITUTE OF THE INCARNATE WORD
(IVE FATHERS) I BIN MEKIM



Buk bilong Gutnius
wantaim Katolik
eksplanesen
230 pes



Santu Alfons Maria
bilong Liguori

Visitim Jisas long
Santu Sakramen
142 pes




Santu Alfons Maria
bilong Liguori
Ol 7-pela sori na ol
gutpela pasin bilong
santu Maria
213 pes




Santu Alfons Maria
bilong Liguori

Rot bilong Diwai Kros na
15-pela meditesen bilong
Pen na Indai bilong Jisas
168 pes




Santu Alfons Maria
bilong Liguori

Indai, kot,
heven na hel
165 pes



Santu Alfons Maria
bilong Liguori

Rot bilong Salvesen
230 pes




Santu Alfons Maria
bilong Liguori
Ol meditesen bilong
Krismas
177 pes




Santu Alfons Maria
bilong Liguori

Santu Hat bilong Jisas
96 pes



*Santu Alfons Maria
bilong Liguori*


**Novena bilong
santu Maikel**
64 pes



Mi laikim Jisas
Buk bilong ol pikinini
186 pes



**Ol prea bilong
Divain Mersi**
52 pes



Fr Tomás Ravaoli, IVE
Ol Aposel bilong Jisas
*Laip stori bilong
ol 12-pela Aposel*
368 pes



Fr Tomás Ravaoli, IVE

Santu Josep
*Laip stori na ol prea
bilong santu Josep*
232 pes

Sapos yu laik kisim ol dispela buk yu ken salim e-mail:
ive.png@gmail.com

Sapos yu laik save long ol IVE Fathers yu ken visitim web site bilong ol:
www.ive.org